

अथ नवमं मण्डलम् ।

प्रथमोऽनुवाकः

। सू० १-२४ ।

(१) प्रथमं सूक्तम्

(१-१०) दशर्चस्यास्य सूक्तस्य वैश्वामित्रो मधुच्छन्दा ऋषिः । पवमानः सोमो देवता । गायत्री छन्दः

स्वादिष्ठया मदिष्ठया पर्वस्व सोम धारया । इन्द्राय पातवे सुतः १
रक्षोहा विश्वर्षणि रभि योनिमयोहतम् । द्रुणा सधस्थमासदत् २
वरिवोधातमो भव मंहिष्ठो वृत्रहन्तमः । पर्षि राधौ मघोनाम् ३
अभ्यर्ष महाना देवाना वीतिमन्धसा । अभि वाजमुत श्रवः ४
त्वामच्छा चरामसि तदिदर्थं दिवेदिवे । इन्दो त्वे न आशसः ५
पुनाति ते परिस्तुतं सोमं सूर्यस्य दुहिता । वारैण शश्वता तना ६
तमीमरवीः समर्य आ गृभ्णन्ति योषणो दश । स्वसारः पार्ये दिवि ७
तमीं हिन्वन्त्यगुवो धर्मन्ति बाकुरं दृतिम् । त्रिधातु वारणं मधु ८
अभीर्भमघ्न्या उत श्रीणन्ति धेनवः शिशुम् । सोममिन्द्राय पातवे ९
अस्येदिन्द्रो मदेष्वा विश्वा वृत्राणि जिघ्रते । शूरौ मघा च मंहते १०

(२) द्वितीयं सूक्तम्

(१-१०) दशर्चस्यास्य सूक्तस्य कारवो मेधातिथिर्ऋषिः । पवमानः सोमो देवता । गायत्री छन्दः

पर्वस्व देववीरति पवित्रं सोम रंह्या । इन्द्रमिन्द्रो वृषा विश १
आ वच्यस्व महि प्सरो वृषेन्दो द्युम्वरत्तमः । आ योनिं धर्णसिः सदः २
अधुक्षत प्रियं मधु धारा सुतस्य वैधसः । अपो वसिष्ठ सुक्रतुः ३
महान्तं त्वा महीर न्वापो अर्षन्ति सिन्धवः । यद्गोभिर्वासयिष्यसे ४
समुद्रो अप्सु मामृजे विष्टम्भो धरुणो दिवः । सोमः पवित्रं अस्मयुः ५
अचिक्रददृषा हरिं महान् मित्रो न दर्शतः । सं सूर्येण रोचते ६
गिरस्त इन्द्र ओर्जसा मर्मृज्यन्ते अपस्युवः । याभिर्मदाय शुम्भसे ७
तं त्वा मदाय घृष्वय उ लोककृत्तुमीमहे । तव प्रशस्तयो महीः ८
अस्मभ्यमिन्द्रविन्द्रयुर्मध्वः पवस्व धारया । पर्जन्यौ वृष्टिमाँ इव ९

गोषा इन्दो नृषा अस्य श्वसा वाजसा उत । आत्मा यज्ञस्य पूर्व्यः १०

(३) तृतीयं सूक्तम्

(१-१०) दशर्चस्यास्य सूक्तस्याजीगर्तिः शुनःशेषः (कृत्रिमो वैश्वामित्रो देवरातः)

ऋषिः । पवमानः सोमो देवता । गायत्री छन्दः

एष देवो अमर्त्यः पर्णवीरिव दीयति । अभि द्रोणान्यासदम् १
 एष देवो विपा कृतो ऽति हरांसि धावति । पवमानो अदाभ्यः २
 एष देवो विपन्युभिः पवमान ऋतायुभिः । हरिर्वाजाय मृज्यते ३
 एष विश्वानि वार्या शूरो यन्निव सत्वभिः । पवमानः सिषासति ४
 एष देवो रथर्यति पवमानो दशस्यति । आविष्कृणोति वग्वनुम् ५
 एष विप्रैरभिष्टुतो ऽपो देवो वि गाहते । दधद्रत्नानि दाशुषे ६
 एष दिवं वि धावति तिरो रजांसि धारया । पवमानः कर्निक्रदत् ७
 एष दिवं व्यासरत् तिरो रजांस्यस्पृतः । पवमानः स्वध्वरः ८
 एष प्रत्नेन जन्मना देवो देवेभ्यः सुतः । हरिः पवित्रै अर्षति ९
 एष उ स्य पुरुव्रतो जज्ञानो जनयन्निषः । धारया पवते सुतः १०

(४) चतुर्थं सूक्तम्

(१-१०) दशर्चस्यास्य सूक्तस्याङ्गिरसो हिरण्यस्तूप ऋषिः । पवमानः सोमो देवता

। गायत्री छन्दः

सना च सोम जेषि च पवमान महि श्रवः । अथा नो वस्यसस्कृधि १
 सना ज्योतिः सना स्वर् विश्वा च सोम सौभगा । अथा नो वस्यसस्कृधि
 २
 सना दक्षमुत क्रतु मप सोम मृधौ जहि । अथा नो वस्यसस्कृधि ३
 पर्वीतारः पुनीतन सोममिन्द्राय पातवे । अथा नो वस्यसस्कृधि ४
 त्वं सूर्ये न आ भज तव क्रत्वा तवोतिभिः । अथा नो वस्यसस्कृधि ५
 तव क्रत्वा तवोतिभि ज्योक् पश्येम सूर्यम् । अथा नो वस्यसस्कृधि ६
 अभ्यर्ष स्वायुध सोम द्विबर्हस रयिम् । अथा नो वस्यसस्कृधि ७
 अभ्यर्षानपच्युतो रयिं समत्सु सासहिः । अथा नो वस्यसस्कृधि ८
 त्वां यज्ञैरवीवृधन् पवमान विधर्मणि । अथा नो वस्यसस्कृधि ९
 रयिं नश्चित्रमश्विन मिन्दौ विश्वायुमा भर । अथा नो वस्यसस्कृधि १०

(५) पञ्चमं सूक्तम्

(१-११) एकादशर्चस्यास्य सूक्तस्य काश्यपोऽसितो देवलो वा ऋषिः । (१) प्रथमर्च इध्मः समिद्धो वाग्निः, (२) द्वितीयायास्तनूनपात्, (३) तृतीयाया इळः, (४) चतुर्थ्या बर्हिः, (५) पञ्चम्या देवीर्दारः, (६) षष्ठ्या उषासानक्ता, (७) सप्तम्या दैव्यौ होतारौ प्रचेतसौ, (८) अष्टम्यास्तिस्त्रो देव्यः सरस्वतीळाभारत्यः, (९) नवम्यास्त्वष्टा, (१०) दशम्या वनस्पतिः, (११) एकादश्याश्च स्वाहाकृतयो देवताः । (१-७) प्रथमादिसप्तर्चा गायत्री, (८-११)

अष्टम्यादिचतसृणाञ्चानुष्टुप् छन्दसी

समिद्धो विश्वतस्पतिः पर्वमानो वि रंजति । प्रीणन् वृषा कनिक्रदत् १
तनूनपात् पर्वमानः शृङ्गे शिशानो अर्षति । अन्तरिक्षेण ररंजत् २
ईळैन्यः पर्वमानो रयिर्वि रंजति द्युमान् । मधोर्धाराभिरोजसा ३
बर्हिः प्राचीनमोजसा पर्वमान स्तृणन् हरिः । देवेषु देव ईयते ४
उदातैर्जिहते बृहद् द्वारौ देवीर्हिरण्ययीः । पर्वमानेन सुष्टुताः ५
सुशिल्पे बृहती मही पर्वमानो वृषणयति । नक्तोषासा न दर्शति ६
उभा देवा नृचक्षसा होतारा दैव्या हुवे । पर्वमान इन्द्रो वृषा ७
भारती पर्वमानस्य सरस्वतीळा मही ।
इमं नो यज्ञमा गमन् तिस्रो देवीः सुपेशसः ८
त्वष्टारमग्रजां गोपां पुरोयावानमा हुवे ।
इन्दुरिन्द्रो वृषा हरिः पर्वमानः प्रजापतिः ९
वनस्पतिं पर्वमान मध्वा समङ्गधि धारया ।
सहस्रवल्शं हरितं भ्राजमानं हिरण्ययम् १०
विश्वे देवाः स्वाहाकृतिं पर्वमानस्या गत ।
वायुर्बृहस्पतिः सूर्योऽग्निरिन्द्रः सजोषसः ११

(६) षष्ठं सूक्तम्

(१-६) नवर्चस्यास्य सूक्तस्य काश्यपोऽसितो देवलो वा ऋषिः । पर्वमानः सोमो देवता । गायत्री छन्दः

मन्द्रया सोम धारया वृषा पवस्व देव्युः । अव्यो वारिष्वस्म्युः १
अभि त्यं मद्यं मद मिन्द्रविन्द्र इति क्षर । अभि वाजिनो अर्वतः २
अभि त्यं पूर्व्यं मद सुवानो अर्ष पवित्र आ । अभि वाजमुत श्रवः ३

अनु द्रुप्सास इन्द्रव आपो न प्रवतासरन् । पुनाना इन्द्रमाशत ४
यमत्यमिव वाजिनं मृजन्ति योषणो दश । वने क्रीळन्तमत्यविम् ५
तं गोभिर्वृषणं रसं मदाय देववीतये । सुतं भराय सं सृज ६
देवो देवाय धारयेन्द्राय पवते सुतः । पयो यदस्य पीपयत् ७
आत्मा यज्ञस्य रंह्या सुष्वाणः पवते सुतः । प्रबं नि पाति काव्यम् ८
एवा पुनान इन्द्रयु मर्दं मदिष्ठ वीतर्ये । गुहा चिद्दधिषे गिरः ९

(७) सप्तमं सूक्तम्

(१-६) नवर्चस्यास्य सूक्तस्य काश्यपोऽसितो देवलो वा ऋषिः । पवमानः सोमो
देवता । गायत्री छन्दः

असृग्रमिन्द्रवः पथा धर्मनृतस्य सुश्रियः । विदाना अस्य योजनम् १
प्र धारा मध्वो अग्रियो महीरपो वि गाहते । हविर्हविष्णु वन्द्यः २
प्र युजो वाचो अग्रियो वृषाव चक्रद्वनै । सद्याभि सत्यो अर्ध्वरः ३
परि यत् काव्या क्वि नृम्णा वसानो अर्षति । स्वर्वाजी सिषासति ४
पवमानो अभि स्पृधो विशो राजैव सीदति । यदीमृगवन्ति वेधसः ५
अव्यो वारे परि प्रियो हरिर्वनेषु सीदति । रेभो वनुष्यते मती ६
स वायुमिन्द्रमश्विना साकं मर्देन गच्छति । रणा यो अस्य धर्मभिः ७
आ मित्रावरुणा भगं मध्वः पवन्त ऊर्मयः । विदाना अस्य शक्यभिः ८
अस्मभ्यं रोदसी रयिं मध्वो वाजस्य सातर्ये । श्रवो वसूनि सं जितम् ९

(८) अष्टमं सूक्तम्

(१-६) नवर्चस्यास्य सूक्तस्य काश्यपोऽसितो देवलो वा ऋषिः । पवमानः सोमो
देवता । गायत्री छन्दः

एते सोमा अभि प्रिय मिन्द्रस्य काममक्षरन् । वर्धन्तो अस्य वीर्यम् १
पुनानासंश्चमूषदो गच्छन्तो वायुमश्विना । ते नो धान्तु सुवीर्यम् २
इन्द्रस्य सोमं राधसे पुनानो हार्दि चोदय । ऋतस्य योनिमासदम् ३
मृजन्ति त्वा दश क्षिपो हिन्वन्ति सप्त धीतर्यः । अनु विप्रा अमादिषुः ४
देवेभ्यस्त्वा मदाय कं सृजानमति मेष्यः । सं गोभिर्वासयामसि ५
पुनानः कलशेष्वा वस्त्राणयरुषो हरिः । परि गव्यान्यव्यत ६
मघोन् आ पवस्व नो जहि विश्वा अप द्विषः । इन्द्रो सखायमा विश ७

वृष्टिं दिवः परिं स्रव द्युमं पृथिव्या अधि । सहो नः सोम पृत्सु धाः ८
नृचक्षसं त्वा वयमिन्द्रपीतं स्वर्विदम् । भृक्षीमहि प्रजामिषम् ९

(९) नवमं सूक्तम्

(१-९) नवर्चस्यास्य सूक्तस्य काश्यपोऽसितो देवलो वा ऋषिः । पवमानः सोमो
देवता । गायत्री छन्दः

परिं प्रिया दिवः क्विर्वयांसि नप्तयौर्हितः । सुवानो याति क्विक्रतुः १
प्रप्र क्षयाय पन्यसे जनाय जुष्टौ अद्रुहे । वीत्यर्ष चनिष्ठया २
स सूनुमार्तरा शुचिर्जातो जाते अरोचयत् । महान् मही ऋतावृधा ३
स सप्त धीतिभिर्हितो नद्यो अजिन्वद्द्रुहे । या एकमक्षि वावृधुः ४
ता अभि सन्तमस्तृतं महे युवानमा दधुः । इन्दुमिन्द्र तव वृते ५
अभि वह्निरमर्त्यः सप्त पश्यति वार्वहिः । क्रिविर्देवीरतर्पयत् ६
अवा कल्पेषु नः पुमस्तमांसि सोम योर्ध्या । तानि पुनान जङ्घनः ७
नू नव्यसे नवीयसे सूक्ताय साधया पथः । प्रवद्रौचया रुचः ८
पवमान महि श्रवो गामश्च रासि वीरवत् । सना मेधां सना स्वः ९

(१०) दशमं सूक्तम्

(१-९) नवर्चस्यास्य सूक्तस्य काश्यपोऽसितो देवलो वा ऋषिः । पवमानः सोमो
देवता । गायत्री छन्दः

प्र स्वानासो रथा इवाऽर्वन्तो न श्रवस्यवः । सोमासो राये अक्रमुः १
हिन्वानासो रथा इव दधन्विरे गर्भस्त्योः । भरासः कारिणामिव २
राजानो न प्रशस्तिभिः सोमासो गोभिरञ्जते । यज्ञो न सप्त धातृभिः ३
परि सुवानास इन्दवो मदाय बर्हणा गिरा । सुता अर्षन्ति धारया ४
आपानासो विवस्वतो जनन्त उषसो भगम् । सूरु अणवं वि तन्वते ५
अप द्वारा मतीनां प्रत्वा ऋणवन्ति कारवः । वृष्णो हरस आयवः ६
समीचीनास आसते होतारः सप्तजामयः । पदमेकस्य पिप्रतः ७
नाभा नाभिं न आ ददे चक्षुश्चित् सूर्ये सचा । क्वेरपत्यमा दुहे ८
अभि प्रिया दिवस्पद मध्वर्युभिर्गुहा हितम् । सूरः पश्यति चक्षसा ९

(११) एकादशं सूक्तम्

(१-६) नवर्चस्यास्य सूक्तस्य काश्यपोऽसितो देवलो वा ऋषिः । पवमानः सोमो
देवता । गायत्री छन्दः

उपास्मै गायता नरः पवमानायेन्दवे । अभि देवाँ इयक्षते १
अभि ते मधुना पयो ऽथर्वाणो अशिश्रयुः । देवं देवार्य देवयु २
स नः पवस्व शं गवे शं जनायु शमवते । शं राजन्नोषधीभ्यः ३
बभ्रवे नु स्वतवसे ऽरुणाय दिविस्पृशे । सोमाय गाथमर्चत ४
हस्तच्युतेभिरद्रिभिः सुतं सोमं पुनीतन । मधावा धावता मधु ५
नमसेदुपं सीदत दध्रेदभि श्रीणीतन । इन्दुमिन्द्रै दधातन ६
अमित्रहा विचर्षणिः पवस्व सोमं शं गवे । देवेभ्यो अनुकामकृत् ७
इन्द्राय सोमं पातवे मदायु परि षिच्यसे । मनुश्चिन्मनसस्पतिः ८
पवमान सुवीर्यं रयिं सोम रिरीहि नः । इन्द्रविन्द्रेण नो युजा ९

(१२) द्वादशं सूक्तम्

(१-६) नवर्चस्यास्य सूक्तस्य काश्यपोऽसितो देवलो वा ऋषिः । पवमानः सोमो
देवता । गायत्री छन्दः

सोमा असृगमिन्दवः सुता ऋतस्य सादने । इन्द्राय मधुमत्तमाः १
अभि विप्रां अनूषत गावो वत्सं न मातरः । इन्द्रं सोमस्य पीतये २
मदच्युत् क्षैति सादने सिन्धोरूर्मा विपश्चित् । सोमो गौरी अधि श्रितः ३
दिवो नाभा विचक्षणो ऽव्यो वारै महीयते । सोमो यः सुक्रतुः कविः ४
यः सोमः कलशेष्वाँ अन्तः पवित्र आहितः । तमिन्दुः परि षस्वजे ५
प्र वाचमिन्दुरिष्यति समुद्रस्याधि विष्टपि । जिन्वन् कोशं मधुश्रुतम् ६
नित्यस्तोत्रो वनस्पतिर्धीनामन्तः सबर्दुर्घः । हिन्वानो मानुषा युगा ७
अभि प्रिया दिवस्पदा सोमो हिन्वानो अर्षति । विप्रस्य धारया कविः ८
आ पवमान धारय रयिं सहस्रवर्चसम् । अस्मे इन्दो स्वाभुवम् ९

अष्टमोऽध्यायः

। व० १ । ३३ ।

(१३) त्रयोदशं सूक्तम्

(१-६) नवर्चस्यास्य सूक्तस्य काश्यपोऽसितो देवलो वा ऋषिः । पवमानः सोमो
देवता । गायत्री छन्दः

सोमः पुनानो अर्षति सहस्रधारो अत्यविः । वायोरिन्द्रस्य निष्कृतम् १
 पवमानमवस्यवो विप्रमभि प्र गायत । सुष्वाणं देववीतये २
 पवन्ते वाजसातये सोमाः सहस्रपाजसः । गृणाना देववीतये ३
 उत नो वाजसातये पवस्व बृहतीरिषः । द्युमदिन्दो सुवीर्यम् ४
 ते नः सहस्त्रिणं रयिं पवन्तामा सुवीर्यम् । सुवाना देवास इन्द्रवः ५
 अत्या हियाना न हेतृभि रसृगं वाजसातये । वि वारमव्यमाशवः ६
 वाश्रा अर्षन्तीन्दवो ऽभि वत्सं न धेनवः । दधन्विरे गर्भस्त्योः ७
 जुष्ट इन्द्राय मत्सरः पवमान् कनिक्रदत् । विश्वा अप् द्विषो जहि ८
 अपघ्नन्तो अराव्णः पवमानाः स्वर्दृशः । योनावृतस्य सीदत ९

(१४) चतुर्दशं सूक्तम्

(१-८) अष्टर्चस्यास्य सूक्तस्य काश्यपोऽसितो देवलो वा ऋषिः । पवमानः सोमो
 देवता । गायत्री छन्दः

परि प्रासिष्यदत् क्विः सिन्धोरूर्मावधिं श्रितः । कारं बिभ्रत् पुरुस्पृहम् १
 गिरा यदी सबन्धवः पञ्च व्राता अपस्यवः । परिष्कृणवन्ति धर्णसिम् २
 आदस्य शष्मिणो रसे विश्वे देवा अमत्सत । यदी गोभिर्वसायते ३
 निरिणानो वि धावति जहृच्छयाणि तान्वा । अत्रा सं जिघ्रते युजा ४
 नृप्तीभिर्यो विवस्वतः शभ्रो न मामृजे युवा । गाः कृणवानो न निर्णिजम् ५
 अति श्रिती तिरश्चता गुव्या जिगात्यणव्या । वृमुर्मियर्ति यं विदे ६
 अभि क्षिपः समगमत मर्जयन्तीरिषस्पतिम् । पृष्ठा गृभ्णत वाजिनः ७
 परि दिव्यानि मर्मशद् विश्वानि सोम् पार्थिवा । वसूनि याह्यस्मयुः ८

(१५) पञ्चदशं सूक्तम्

(१-८) अष्टर्चस्यास्य सूक्तस्य काश्यपोऽसितो देवलो वा ऋषिः । पवमानः सोमो
 देवता । गायत्री छन्दः

एष धिया यात्यणव्या शूरो रथेभिराशुभिः । गच्छन्निन्द्रस्य निष्कृतम् १
 एष पुरु धियायते बृहते देवतातये । यत्रामृतास आसते २
 एष हितो वि नीयते ऽन्तः शभ्रावता पथा । यदी तुञ्जन्ति भूर्णयः ३
 एष शृङ्गाणि दोधुव च्छिर्षीते यूथ्योर्षु वृषा । नृम्णा दधान् ओजसा ४

एष रुक्मिभिरीयते वाजी शुभ्रेभिरंशुभिः । पतिः सिन्धूनां भवन् ५
 एष वसूनि पिबन्ना परुषा ययिवाँ अति । अव शादैषु गच्छति ६
 एतं मृजन्ति मर्ज्यं मुपु द्रोणैष्वायवः । प्रचक्राणं महीरिषः ७
 एतमु त्यं दश क्षिपौ मृजन्ति सप्त धीतर्यः । स्वायुधं मदिन्तमम् ८

(१६) षोडशं सूक्तम्

(१-८) अष्टर्चस्यास्य सूक्तस्य काश्यपोऽसितो देवलो वा ऋषिः । पवमानः सोमो
 देवता । गायत्री छन्दः

प्र तै सोतारं ओणयोर् रसं मदायु घृष्वये । सर्गो न तक्त्येतशः १
 क्रत्वा दक्षस्य रथ्यं मुपो वसानमन्धसा । गोषामणवेषु सञ्चिम २
 अनप्तमप्सु दुष्टं सोमं पवित्रं आ सृज । पुनीहीन्द्राय पातवे ३
 प्र पुनानस्य चेतसा सोमः पवित्रं अर्षति । क्रत्वा सधस्थमासदत् ४
 प्र त्वा नमोभिरिन्द्रव इन्द्र सोमा असृक्षत । महे भराय कारिणः ५
 पुनानो रूपे अव्यये विश्वा अर्षन्नभि श्रियः । शूरो न गोषु तिष्ठति ६
 दिवो न सानु पिप्युषी धारा सुतस्य वेधसः । वृथा पवित्रं अर्षति ७
 त्वं सोम विपश्चितं तना पुनान आयुषु । अव्यो वारं वि धावसि ८

(१७) सप्तदशं सूक्तम्

(१-८) अष्टर्चस्यास्य सूक्तस्य काश्यपोऽसितो देवलो वा ऋषिः । पवमानः सोमो
 देवता । गायत्री छन्दः

प्र निम्नेनैव सिन्धवो घन्तौ वृत्राणि भूर्णयः । सोमा असृग्रमाशवः १
 अभि सुवानास इन्द्रवो वृष्टयः पृथिवीमिव । इन्द्रं सोमासो अक्षरन् २
 अत्यूर्मिर्मत्सरो मदः सोमः पवित्रं अर्षति । विघ्नन् रक्षासि देवयुः ३
 आ कलशेषु धावति पवित्रे परिं पिच्यते । उक्थैर्यज्ञेषु वर्धते ४
 अति त्री सोम रोचना रोहन् न भ्राजसे दिवम् । इष्णान् त्सूर्यं न चौदयः ५
 अभि विप्रां अनूषत मूर्धन् यज्ञस्य कारवः । दर्धानाश्चक्षसि प्रियम् ६
 तमु त्वा वाजिनं नरो धीभिर्विप्रां अवस्यवः । मृजन्ति देवतातये ७
 मधोर्धारामनुं क्षर तीव्रः सधस्थमासदः । चारुर्भृताय पीतये ८

(१८) अष्टादशं सूक्तम्

(१-७) सप्तर्चस्यास्य सूक्तस्य काश्यपोऽसितो देवलो वा ऋषिः । पवमानः सोमो
देवता । गायत्री छन्दः

परि सुवानो गिरिष्ठाः पवित्रे सोमो अक्षाः । मदैषु सर्वधा असि १
त्वं विप्रस्त्वं कविर्मधु प्र जातमन्धसः । मदैषु सर्वधा असि २
तव विश्वे सजोषसो देवासः पीतिमाशत । मदैषु सर्वधा असि ३
आ यो विश्वानि वार्या वसूनि हस्तयोर्दधे । मदैषु सर्वधा असि ४
य इमे रोदसी मही सं मातरैव दोहते । मदैषु सर्वधा असि ५
परि यो रोदसी उभे सद्यो वाजैभिरर्षति । मदैषु सर्वधा असि ६
स शुष्मी कलशेष्वा पुनानो अचिक्रदत् । मदैषु सर्वधा असि ७

(१६) एकोनविंशं सूक्तम्

(१-७) सप्तर्चस्यास्य सूक्तस्य काश्यपोऽसितो देवलो वा ऋषिः । पवमानः सोमो
देवता । गायत्री छन्दः

यत् सोम चित्रमुक्थ्यं दिव्यं पार्थिवं वसु । तन्नः पुनान आ भर १
युवं हि स्थः स्वर्पती इन्द्रश्च सोम गोपती । ईशाना पिप्यतं धियः २
वृषा पुनान आयुषु स्तनयन्नधि बर्हिषि । हरिः सन् योनिमासदत् ३
अवावशन्त धीतयौ वृषभस्याधि रेतसि । सूनोर्वत्सस्य मातरः ४
कुविद्वृषयन्तीभ्यः पुनानो गर्भमादधत् । याः शक्रं दुहते पयः ५
उप शिन्नापतस्थुषौ भियसमा धैहि शत्रुषु । पवमान विदा रयिम् ६
नि शत्रोः सोम वृष्यं नि शुष्मं नि वयस्तिर । दूरे वा सतो अन्ति वा ७

(२०) विंशं सूक्तम्

(१-७) सप्तर्चस्यास्य सूक्तस्य काश्यपोऽसितो देवलो वा ऋषिः । पवमानः सोमो
देवता । गायत्री छन्दः

प्र कविर्देववीतये ऽव्यो वारैभिरर्षति । साह्वान् विश्वा अभि स्पृधः १
स हि ष्मा जरितृभ्य आ वाजं गोमन्तमिन्वति । पवमानः सहस्त्रिणाम् २
परि विश्वानि चेतसा मृशसे पवसे मृती । स नः सोम श्रवो विदः ३
अभ्यर्ष बृहद्यशो मघर्वद्भ्यो ध्रुवं रयिम् । इषं स्तोतृभ्य आ भर ४
त्वं राजैव सुव्रतो गिरः सोमा विवेशिथ । पुनानो वहे अद्भुत ५
स वह्निरप्सु दुष्टरौ मृज्यमानो गर्भस्त्योः । सोमश्चमूषु सीदति ६

क्रीळुर्मखो न मंहयुः पवित्रं सोम गच्छसि । दधत् स्तोत्रे सुवीर्यम् ७

(२१) एकविंशं सूक्तम्

(१-७) सप्तर्चस्यास्य सूक्तस्य काश्यपोऽसितो देवलो वा ऋषिः । पवमानः सोमो देवता । गायत्री छन्दः

एते धावन्तीन्दवः सोमा इन्द्राय घृष्वयः । मत्सरासः स्वर्विदः १
प्रवृणवन्तौ अभियुजः सुष्वये वरिवोविदः । स्वयं स्तोत्रे वयस्कृतः २
वृथा क्रीळन्त इन्दवः सधस्थमभ्येकमित् । सिन्धौरुर्मा व्यक्षरन् ३
एते विश्वानि वार्या पर्वमानास आशत । हिता न सप्तयो रथे ४
आस्मिन् पिशङ्गमिन्दवो दधाता वेनमादिशै । यो अस्मभ्यमरावा ५
ऋभुर्न रथ्यं नवं दधाता केतमादिशै । शक्राः पवध्वमर्णासा ६
एत उ त्वे अवीवशन् काष्ठा वाजिनौ अक्रत । सतः प्रासाविषुर्मतिम् ७

(२२) द्वाविंशं सूक्तम्

(१-७) सप्तर्चस्यास्य सूक्तस्य काश्यपोऽसितो देवलो वा ऋषिः । पवमानः सोमो देवता । गायत्री छन्दः

एते सोमास आशवो रथा इव प्र वाजिनः । सर्गाः सृष्टा अहेषत १
एते वाता इवोरवः पर्जन्यस्येव वृष्टयः । अग्नेरिव भ्रमा वृथा २
एते पूता विपश्चितः सोमासो दध्याशिरः । विपा व्यानशर्धियः ३
एते मृष्टा अमर्त्याः ससृवांसो न शश्रमुः । इयक्षन्तः पृथो रजः ४
एते पृष्ठानि रोदसो विप्रयन्तो व्यानशुः । उतेदमुत्तमं रजः ५
तन्तुं तन्वानमुत्तमं मनु प्रवत आशत । उतेदमुत्तमाय्यम् ६
त्वं सोम पणिभ्य आ वसु गव्यानि धारयः । त्तं तन्तुमचिक्रदः ७

(२३) त्रयोविंशं सूक्तम्

(१-७) सप्तर्चस्यास्य सूक्तस्य काश्यपोऽसितो देवलो वा ऋषिः । पवमानः सोमो देवता । गायत्री छन्दः

सोमा असृग्रमाशवो मधोर्मदस्य धारया । अभि विश्वानि काव्या १
अनु प्रतास आयवः पदं नवीयो अक्रमुः । रुचे जनन्त सूर्यम् २

आ पवमान नो भराऽर्यो अदाशुषो गयम् । कृधि प्रजावतीरिषः ३
 अभि सोमास आयवः पवन्ते मद्यं मदम् । अभि कोशं मधुश्रुतम् ४
 सोमो अर्षति धर्णासि र्दधान इन्द्रियं रसम् । सुवीरो अभिशस्तिपाः ५
 इन्द्राय सोम पवसे देवेभ्यः सधमाद्यः । इन्द्रो वाजं सिषाससि ६
 अस्य पीत्वा मदाना मिन्द्रो वृत्रायप्रति । जघान जघनञ्च नु ७

(२४) चतुर्विंशं सूक्तम्

(१-७) सप्तर्चस्यास्य सूक्तस्य काश्यपोऽसितो देवलो वा ऋषिः । पवमानः सोमो
 देवता । गायत्री छन्दः

प्र सोमासो अधन्विषुः पवमानास इन्द्रवः । श्रीणाना अप्सु मृञ्जत १
 अभि गावो अधन्विषु रापो न प्रवता यतीः । पुनाना इन्द्रमाशत २
 प्र पवमान धन्वसि सोमेन्द्राय पातवे । नृभिर्यतो वि नीयसे ३
 त्वं सोम नृमार्दनुः पवस्व चर्षणीसहे । सस्त्रियो अनुमाद्यः ४
 इन्द्रो यदद्रिभिः सुतः पवित्रं परिधावसि । अरमिन्द्रस्य धाम्ने ५
 पवस्व वृत्रहन्तमो क्थेभिरनुमाद्यः । शुचिः पावको अद्भुतः ६
 शुचिः पावक उच्यते सोमः सुतस्य मध्वः । देवावीरघशंसहा ७
 द्वितीयोऽनुवाकः

। सू० २५-६० ।

(२५) पञ्चविंशं सूक्तम्

(१-६) षडृचस्यास्य सूक्तस्यागस्त्यो दृव्हहच्युत ऋषिः । पवमानः सोमो देवता ।
 गायत्री छन्दः

पवस्व दक्षसाधनो देवेभ्यः पीतये हरे । मरुद्धो वायवे मदः १
 पवमान धिया हितोऽभि योनिं कनिक्रदत् । धर्मणा वायुमा विंश २
 सं देवैः शोभते वृषा क्विर्योनावधि प्रियः । वृत्रहा देववीरमः ३
 विश्वा रूपाण्याविशन् पुनानो याति हर्यतः । यत्रामृतास आसते ४
 अरुषो जनयन् गिरः सोमः पवत आयुषक् । इन्द्रं गच्छन् क्विक्रतुः ५
 आ पवस्व मदिन्तम पवित्रं धारया कवे । अर्कस्य योनिमासदम् ६

(२६) षड्विंशं सूक्तम्

(१-६) षडृचस्यास्य सूक्तस्य दाळ्हच्युत इध्मवाह ऋषिः । पवमानः सोमो देवता
। गायत्री छन्दः

तममृक्षन्त वाजिनं मुपस्थे अदितेरधि । विप्रांसो अशव्या धिया १
तं गावो अभ्यनूषत सहस्रधारमक्षितम् । इन्दुं धर्तारमा दिवः २
तं वेधां मेधयाह्यन् पवमानमधि द्यवि । धर्णसिं भूरिधायसम् ३
तमह्यन् भुरिजौर्धिया संवसानं विवस्वतः । पतिं वाचो अदाभ्यम् ४
तं सानावधिं जामयो हरिं हिन्वन्त्यद्रिभिः । हर्यतं भूरिचक्षसम् ५
तं त्वां हिन्वन्ति वेधसः पवमान गिरावृधम् । इन्दुविन्द्राय मत्सरम् ६

(२७) सप्तविंशं सूक्तम्

(१-६) षडृचस्यास्य सूक्तस्याङ्गिरसो नृमेध ऋषिः । पवमानः सोमो देवता ।
गायत्री छन्दः

एष क्विरभिष्टुतः पवित्रे अधि तोशते । पुनानो घन्नप स्त्रिधः १
एष इन्द्राय वायवे स्वर्जित् परि षिच्यते । पवित्रे दक्षसाधनः २
एष नृभिर्वि नीयते दिवो मूर्धा वृषा सुतः । सोमो वनेषु विश्ववित् ३
एष गव्युरचिक्रदत् पवमानो हिरण्ययुः । इन्दुः सत्राजिदस्तृतः ४
एष सूर्येण हासते पवमानो अधि द्यवि । पवित्रे मत्सरो मदः ५
एष शुष्यसिष्यद दन्तरिद्धे वृषा हरिः । पुनान इन्दुरिन्द्रमा ६

(२८) अष्टाविंशं सूक्तम्

(१-६) षडृचस्यास्य सूक्तस्याङ्गिरसः प्रियमेध ऋषिः । पवमानः सोमो देवता ।
गायत्री छन्दः

एष वाजी हितो नृभिर्विश्वविन्मनसस्पतिः । अव्यो वारं वि धावति १
एष पवित्रे अक्षरत् सोमो देवेभ्यः सुतः । विश्वा धामान्याविशन् २
एष देवः शुभायते ऽधि योनावमर्त्यः । वृत्रहा देववीतमः ३
एष वृषा कर्निक्रद दशभिर्जामिभिर्यतः । अभि द्रोणानि धावति ४
एष सूर्यमरोचयत् पवमानो विचर्षणिः । विश्वा धामानि विश्ववित् ५
एष शुष्यदाभ्यः सोमः पुनानो अर्षति । देवावीरघशंसहा ६

(२९) एकोनत्रिंशं सूक्तम्

(१-६) षडृचस्यास्य सूक्तस्याङ्गिरसो नृमेध ऋषिः । पवमानः सोमो देवता ।

गायत्री छन्दः

प्रास्य धारां अक्षरन् वृष्णः सुतस्यौजसा । देवाँ अनु प्रभूषतः १
 सप्ति मृजन्ति वेधसौ गृणन्तः कारवौ गिरा । ज्योतिर्जज्ञानमुक्थ्यम् २
 सुषर्हा सोम तानि ते पुनानाय प्रभूवसो । वर्धा समुद्रमुक्थ्यम् ३
 विश्वा वसूनि संजयन् पर्वस्व सोम धारया । इनु द्वेषासि सध्वयक ४
 रक्षा सु नो अररुषः स्वनात् समस्य कस्य चित् । निदो यत्र मुमुचमहे ५
 एन्दो पार्थिवं रयिं दिव्यं पवस्व धारया । द्युमन्तं शुष्ममा भर ६

(३०) त्रिंशं सूक्तम्

(१-६) षड्चस्यास्य सूक्तस्याङ्गिरसो बिन्दुर्ऋषिः । पवमानः सोमो देवता ।

गायत्री छन्दः

प्र धारां अस्य शष्मिणो वृथा पवित्रे अक्षरन् । पुनानो वाचमिष्यति १
 इन्दुर्हियानः सोतृभिर्मृज्यमानः कनिक्रदत् । इयति वृष्टुमिन्द्रियम् २
 आ नः शुष्मं नृषाह्यं वीरवन्तं पुरुस्पृहम् । पर्वस्व सोम धारया ३
 प्र सोमो अति धारया पवमानो असिष्यदत् । अभि द्रोणान्यासदम् ४
 अप्सु त्वा मधुमत्तमं हरिं हिन्वन्त्यद्रिभिः । इन्दुविन्द्राय पीतये ५
 सुनोता मधुमत्तमं सोममिन्द्राय वृजिणै । चारुं शर्धाय मत्सरम् ६

(३१) एकत्रिंशं सूक्तम्

(१-६) षड्चस्यास्य सूक्तस्य राहूगणो गोतम ऋषिः । पवमानः सोमो देवता ।

गायत्री छन्दः

प्र सोमासः स्वाध्यः पवमानासो अक्रमुः । रयिं कृणवन्ति चेतनम् १
 दिवस्पृथिव्या अधि भवेन्दो द्युम्वर्धनः । भवा वाजानां पतिः २
 तुभ्यं वार्ता अभिप्रियं स्तुभ्यमर्षन्ति सिन्धवः । सोम वर्धन्ति ते महः ३
 आ प्यायस्व समेतु ते विश्वतः सोम वृष्यम् । भवा वाजस्य संगुथे ४
 तुभ्यं गावो घृतं पयो बभ्रौ दुदुहे अक्षितम् । वर्षिष्ठे अधि सानवि ५
 स्वायुधस्य ते सतो भुवनस्य पते वयम् । इन्दो सखित्वमुश्मसि ६

(३२) द्वात्रिंशं सूक्तम्

(१-६) षड्चस्यास्य सूक्तस्यात्रेयः श्यावाश्व ऋषिः । पवमानः सोमो देवता ।

गायत्री छन्दः

प्र सोमांसो मदच्युतः श्रवसे नो मघोनः । सुता विदथे अक्रमुः १
आदीं त्रितस्य योषणो हरिं हिन्वन्त्यद्रिभिः । इन्दुमिन्द्राय पीतये २
आदीं हंसो यथा गुणं विश्वस्यावीवशन्मतिम् । अत्यो न गोभिरज्यते ३
उभे सौमावचाकशन् मृगो न तक्तो अर्षसि । सीदन्नृतस्य योनिमा ४
अभि गावो अनूषत् योषां जारमिव प्रियम् । अगन्नाजिं यथा हितम् ५
अस्मे धैहि द्युमद्यशौ मघवद्भ्यश्च मह्यं च । सनिं मेधामुत श्रवः ६

(३३) त्रयस्त्रिंशं सूक्तम्

(१-६) षडृचस्यास्य सूक्तस्याप्तचस्त्रित ऋषिः । पवमानः सोमो देवता । गायत्री
छन्दः

प्र सोमांसो विपश्चितो ऽपां न यन्त्यूर्मयः । वनानि महिषा इव १
अभि द्रोणानि बभ्रवः शक्रा ऋतस्य धारया । वाजं गोमन्तमक्षरन् २
सुता इन्द्राय वायवे वरुणाय मरुद्भ्यः । सोमा अर्षन्ति विष्णावे ३
तिस्रो वाच उदीरते गावो मिमन्ति धेनवः । हरिरिति कनिक्रदत् ४
अभि ब्रह्मीरनूषत् यहीर्नृतस्य मातरः । मर्मृज्यन्ते दिवः शिशुम् ५
रायः समुद्रांश्चतुरो ऽस्मभ्यं सोम विश्वतः । आ पवस्व सहस्त्रिणः ६

(३४) चतुस्त्रिंशं सूक्तम्

(१-६) षडृचस्यास्य सूक्तस्याप्तचस्त्रित ऋषिः । पवमानः सोमो देवता । गायत्री
छन्दः

प्र सुवानो धारया तने न्दुर्हिन्वानो अर्षति । रुजद्वृळहा व्योर्जसा १
सुत इन्द्राय वायवे वरुणाय मरुद्भ्यः । सोमो अर्षति विष्णावे २
वृषाणं वृषभिर्यतं सुन्वन्ति सोममद्रिभिः । दुहन्ति शक्मना पर्यः ३
भुवत् त्रितस्य मज्यो भुवदिन्द्राय मत्सरः । सं रूपैरज्यते हरिः ४
अभीमृतस्य विष्टपं दुहते पृश्निमातरः । चारु प्रियतमं हविः ५
समैनुमहुता इमा गिरौ अर्षन्ति सस्तुतः । धेनूर्वाश्रो अवीवशत् ६

(३५) पञ्चत्रिंशं सूक्तम्

(१-६) षडृचस्यास्य सूक्तस्याङ्गिरसः प्रभूवसुर्ऋषिः । पवमानः सोमो देवता ।
गायत्री छन्दः

आ नः पवस्व धारया पवमान रयिं पृथुम् । यया ज्योतिर्विदासि नः १
 इन्दो समुद्रमीङ्ख्य पवस्व विश्वमेजय । रायो धर्ता न ओजसा २
 त्वया वीरेण वीरवो ऽभि ष्याम पृतन्यतः । क्षरा णो अभि वार्यम् ३
 प्र वाजमिन्दुरिष्यति सिषासन् वाजसा ऋषिः । वृता विदान आयुधा ४
 तं गीर्भिर्वाचमीङ्ख्यं पुनानं वासयामसि । सोमं जनस्य गोपतिम् ५
 विश्वो यस्य वृते जनो दाधार धर्मणस्पतैः । पुनानस्य प्रभूवसोः ६

(३६) षट्त्रिंशं सूक्तम्

(१-६) षड्चस्यास्य सूक्तस्याङ्गिरसः प्रभूवसुर्ऋषिः । पवमानः सोमो देवता ।
 गायत्री छन्दः

असर्जि रथ्यो यथा पवित्रै चम्बोः सुतः । कार्ष्मन् वाजी न्यक्रमीत् १
 स वह्निः सोम जागृविः पवस्व देववीरति । अभि कोशं मधुश्चुतम् २
 स नो ज्योतीषि पूर्य पवमान वि रौचय । क्रत्वे दक्षाय नो हिनु ३
 शुम्भमान ऋतायुभिर्मुज्यमानो गर्भस्त्योः । पवते वारै अव्ययै ४
 स विश्वा दाशुषे वसु सोमो दिव्यानि पार्थिवा । पवतामान्तरिन्द्या ५
 आ दिवस्पृष्टमश्वयु गव्ययुः सोम रोहसि । वीरयुः शवसस्पते ६

(३७) सप्तत्रिंशं सूक्तम्

(१-६) षड्चस्यास्य सूक्तस्याङ्गिरसो रहूगण ऋषिः । पवमानः सोमो देवता ।
 गायत्री छन्दः

स सुतः पीतये वृषा सोमः पवित्रै अर्षति । विघ्नन् रक्षांसि देवयुः १
 स पवित्रै विचक्ष्णो हरिरर्षति धर्णासिः । अभि योनिं कर्निक्रदत् २
 स वाजी रौचना दिवः पवमानो वि धावति । रक्षोहा वारमव्ययम् ३
 स त्रितस्याधि सानवि पवमानो अरोचयत् । जामिभिः सूर्य सह ४
 स वृत्रहा वृषा सुतो वरिवोविददाभ्यः । सोमो वाजमिवासरत् ५
 स देवः क्विनैषितोर्ऽभि द्रोणानि धावति । इन्दुरिन्द्राय मंहना ६

(३८) अष्टात्रिंशं सूक्तम्

(१-६) षड्चस्यास्य सूक्तस्याङ्गिरसो रहूगण ऋषिः । पवमानः सोमो देवता ।
 गायत्री छन्दः

एष उ॒ स्य वृषा॑ रथो ऽव्यो॒ वारै॑भिरर्षति । गच्छन्॑ वाजं सहस्रिणाम् १
 ए॒तं त्रि॒तस्य॑ योषणो॒ हरिं॑ हि॒न्वन्त्य॑द्रिभिः । इ॒न्दुमि॒न्द्राय॑ पी॒तयै॑ २
 ए॒तं त्यं॑ ह॒रितो॑ द॒शं म॑र्मृ॒ज्यन्तै॑ अप॒स्युर्वः॑ । या॒भिर्म॑दाय॒ शुम्भ॑ते ३
 ए॒ष स्य॑ मा॒नुषी॑ष्वा श्ये॒नो न वि॒क्षु सी॑दति । गच्छ॑ञ्जारो न योषितम् ४
 ए॒ष स्य॑ म॒द्यो र॑सो ऽर्वं च॒ष्टे दि॒वः शि॑शुः । य इ॒न्दुर्वार॑मा॒र्विशत् ५
 ए॒ष स्य॑ पी॒तयै॑ सु॒तो ह॑रि॒रर्षति॑ ध॒र्णसिः॑ । क्र॒न्दन् यो॒निम॑भि प्रि॒यम् ६

(३६) एकोनचत्वारिंशं सूक्तम्

(१-६) षडृचस्यास्य सूक्तस्याङ्गिरसो बृहन्मतिर्ऋषिः । पवमानः सोमो देवता ।
 गायत्री छन्दः

आशु॑र्ष बृहन्मते परि॑ प्रि॒येण॑ धाम्ना । यत्र॑ दे॒वा इति॑ ब्र॒वन् १
 प॒रिष्कृ॑णवन्ननिष्कृतं॒ जना॑य या॒तय॑न्निषः । वृ॒ष्टिं दि॒वः परि॑ स्रव २
 सु॒त ए॒ति प॒वित्र॑ आ त्विषिं॑ द॒धानु॑ ओजसा । वि॒चक्षा॑णो वि॒रोच॑र्यन् ३
 अ॒यं स यो॑ दि॒वस्प॑रि॒ रघु॑यामा॒ पवि॑त्र आ । सि॒न्धौरू॑र्मा व्य॒क्षरत् ४
 आ॒विवा॑सन् प॒राव॑तो अ॒थौ अ॒र्वाव॑तः सु॒तः । इ॒न्द्राय॑ सि॒च्यते॑ म॒धु ५
 स॒मीची॑ना अ॒नूष॑त॒ हरिं॑ हि॒न्वन्त्य॑द्रिभिः । यो॒ना॒वृ॒तस्य॑ सीदत ६

(४०) चत्वारिंशं सूक्तम्

(१-६) षडृचस्यास्य सूक्तस्याङ्गिरसो बृहन्मतिर्ऋषिः । पवमानः सोमो देवता ।
 गायत्री छन्दः

पु॒ना॒नो अ॒क्रमी॑द्भि विश्वा॒ मृधो॑ वि॒चर्ष॑णिः । श॒म्भन्ति॑ वि॒प्रं धी॑तिभिः १
 आ यो॒निम॑रु॒णो रु॒ह द॑म॒दिन्द्रं॑ वृषा॒ सुतः॑ । ध्रु॒वे स॑द॒सि सी॑दति २
 नू नो॑ र॒यिं म॒हामि॑न्द्रो ऽस्म॒भ्यं सोम॑ वि॒श्वतः॑ । आ प॑वस्व सहस्रिणाम् ३
 विश्वा॑ सोम पवमान द्यु॒म्रानी॑न्द्र॒वा भर॑ । वि॒दाः स॑हस्रिणी॒रिषः॑ ४
 स नः॑ पु॒नान॑ आ भर॒ रयिं॑ स्तो॒त्रे सु॑वीर्यम् । ज॒रितु॑र्व॒र्धया॑ गिरः ५
 पु॒नान॑ इ॒न्द्रवा॑ भर॒ सोमं॑ द्वि॒बर्ह॑सं र॒यिम् । वृ॒षन्नि॑न्द्रो न उ॒क्थ्य॑म् ६

(४१) एकचत्वारिंशं सूक्तम्

(१-६) षडृचस्यास्य सूक्तस्य कारवो मेध्यातिथिर्ऋषिः । पवमानः सोमो देवता ।
 गायत्री छन्दः

प्र ये गावो न भूर्णय स्त्वेषा अयासो अक्रमुः । घन्तः कृष्णामपु त्वचम् १
 सुवितस्य मनामहे ऽति सेतुं दुराव्यम् । साहांसो दस्युमव्रतम् २
 शृगवे वृष्टेरिव स्वनः पवमानस्य शष्मिणः । चरन्ति विद्युतौ दिवि ३
 आ पवस्व महीमिषुं गोमदिन्दो हिरण्यवत् । अश्वावृद्वाजवत् सुतः ४
 स पवस्व विचर्षण आ मही रोदसी पृण । उषाः सूर्यो न रश्मिभिः ५
 परि णः शर्मयन्त्या धारया सोम विश्वतः । सरो रसेव विष्टपम् ६

(४२) द्विचत्वारिंशं सूक्तम्

(१-६) षड्चस्यास्य सूक्तस्य कारवो मेध्यातिथिर्ऋषिः । पवमानः सोमो देवता ।

गायत्री छन्दः

जनयन् रोचना दिवो जनयन्नप्सु सूर्यम् । वसानो गा अपो हरिः १
 एष प्रत्नेन मन्मना देवो देवेभ्यस्परि । धारया पवते सुतः २
 वावृधानाय तूर्वये पवन्ते वाजसातये । सोमाः सहस्रपाजसः ३
 दुहानः प्रत्नित् पर्यः पवित्रे परि षिच्यते । क्रन्दन् देवाँ अजीजनत् ४
 अभि विश्वानि वार्या ऽभि देवाँ ऋतावृधः । सोमः पुनानो अर्षति ५
 गोमन्नः सोम वीरवृ दश्वावृद्वाजवत् सुतः । पवस्व बृहतीरिषः ६

(४३) त्रिचत्वारिंशं सूक्तम्

(१-६) षड्चस्यास्य सूक्तस्य कारवो मेध्यातिथिर्ऋषिः । पवमानः सोमो देवता ।

गायत्री छन्दः

यो अत्यं इव मृज्यते गोभिर्मदाय हर्यतः । तं गीर्भिर्वासयामसि १
 तं नो विश्वा अवस्युवो गिरः शुम्भन्ति पूर्वथा । इन्दुमिन्द्राय पीतये २
 पुनानो याति हर्यतः सोमो गीर्भिः परिष्कृतः । विप्रस्य मेध्यातिथेः ३
 पवमान विदा रयि मस्मभ्यं सोम सुश्रियम् । इन्दो सहस्रवर्चसम् ४
 इन्दुरत्यो न वाजसृत् कनिक्रन्ति पवित्र आ । यदक्षारति देवयुः ५
 पवस्व वाजसातये विप्रस्य गृणतो वृधे । सोम रास्व सुवीर्यम् ६
 इति षष्ठोऽष्टकः

अथ सप्तमोऽष्टकः

प्रथमोऽध्यायः

। व० १-४१ ।

(४४) चतुश्चत्वारिंशं सूक्तम्

(१-६) षडृचस्यास्य सूक्तस्याङ्गिरस अयास्य ऋषिः । पवमानः सोमो देवता ।
गायत्री छन्दः

प्र णं इन्दो म॒हे तन॑ ऊ॒र्मि न बिभ्र॑दर्षसि । अ॒भि दे॒वाँ अ॒यास्यः॑ १
म॒ती जुष्टो॑ धि॒या हि॒तः सोमो॑ हि॒न्वे प॒राव॑ति । वि॒प्रस्य॑ धार॒या क॒विः २
अ॒यं दे॒वेषु॑ जा॒गृविः॑ सु॒त ए॑ति प॒वित्र॑ आ । सोमो॑ या॒ति वि॒चर्ष॑णिः ३
स नः॑ पव॒स्व वा॒ज्युश्च॑क्रा॒णश्चारु॑मध्व॒रम् । ब॒र्हिष्माँ॑ आ वि॒वास॑ति ४
स नो॑ भगा॒य वा॒यवे॑ वि॒प्रवीरः॑ स॒दावृ॑धः । सोमो॑ दे॒वेष्वा य॑मत् ५
स नो॑ अ॒द्य वसु॑त्तये क्र॒तुवि॑द्गा॒तुवि॑त्तमः । वा॒जं जे॒षि श्रवो॑ बृ॒हत् ६

(४५) पञ्चचत्वारिंशं सूक्तम्

(१-६) षडृचस्यास्य सूक्तस्याङ्गिरस अयास्य ऋषिः । पवमानः सोमो देवता ।
गायत्री छन्दः

स प॑व॒स्व मदा॑य॒ कं नृ॑च॒क्षा दे॒ववी॑तये । इ॒न्दुवि॒न्द्राय॑ पी॒तये॑ १
स नो॑ अ॒र्षाभि॑ दू॒त्यंश् त्व॑मि॒न्द्राय॑ तो॒शसे॑ । दे॒वान् त्स॑खि॒भ्य आ व॑रम् २
उ॒त त्वाम॑रु॒णं व॒यं गो॑भि॒रञ्ज॑मो मदा॑य॒ कम् । वि नो॑ रा॒ये दुरो॑ वृ॒धि ३
अ॒त्यू प॒वित्र॑म॒क्रमी॑द् वा॒जी धु॑रं न या॒मनि॑ । इ॒न्दुर्दे॒वेषु॑ प॒त्यते॑ ४
समी॑ सखा॒यो अ॒स्वर॑न् वने॒ क्रीळ॑न्त॒मत्य॑विम् । इ॒न्दुं ना॒वा अ॒नूष॑त ५
तया॑ पव॒स्व धार॑या॒ यया॑ पी॒तो वि॒चक्ष॑से । इ॒न्दो स्तो॒त्रे सु॒वीर्य॑म् ६

(४६) षट्चत्वारिंशं सूक्तम्

(१-६) षडृचस्यास्य सूक्तस्याङ्गिरस अयास्य ऋषिः । पवमानः सोमो देवता ।
गायत्री छन्दः

असृ॑ग्रन् दे॒ववी॑तये ऽत्या॒सः कृ॒त्या इ॒व । क्षर॑न्तः प॒र्वता॑वृ॒धः १
परि॑ष्कृ॒तास॑ इ॒न्दवो॑ योषे॒व पि॒त्र्या॑वती । वा॒युं सोमा॑ असृ॒क्षत॑ २
ए॒ते सोमा॑स॒ इन्द॑वः प्र॒यस्व॑न्तश्च॒मू सु॒ताः । इ॒न्द्रं वर्ध॑न्ति॒ कर्म॑भिः ३
आ धा॑वता सु॒हस्त्यः॑ शु॒क्रा गृ॑ष्णीत म॒न्थिना॑ । गो॒भिः श्री॑णीत मत्स॒रम् ४
स प॑व॒स्व धन॑जय प्र॒यन्ता॑ रा॒धसो॑ म॒हः । अ॒स्मभ्य॑ सोम गा॒तुवि॑त् ५

एतं मृजन्ति मर्ज्यं पवमानं दश क्षिपः । इन्द्राय मत्सरं मदम् ६

(४७) सप्तचत्वारिंशं सूक्तम्

(१-५) पञ्चर्चस्यास्य सूक्तस्य भार्गवः कविर्ऋषिः । पवमानः सोमो देवता ।
गायत्री छन्दः

अया सोमः सुकृत्यया महश्चिदभ्यवर्धत । मन्दान उद्वृषायते १
कृतानीदस्य कर्त्वा चेतन्ते दस्युतर्हणा । ऋणा च धृष्णुश्चयते २
आत् सोम इन्द्रियो रसो वज्रः सहस्रसा भुवत् । उक्थं यदस्य जायते ३
स्वयं कविर्विधर्तरि विप्राय रत्नमिच्छति । यदी मर्मृज्यते धियः ४
सिषासतू रयीणां वाजेष्वर्वतामिव । भरेषु जिग्युषामसि ५

(४८) अष्टचत्वारिंशं सूक्तम्

(१-५) पञ्चर्चस्यास्य सूक्तस्य भार्गवः कविर्ऋषिः । पवमानः सोमो देवता ।
गायत्री छन्दः

तं त्वा नृम्णानि बिभ्रतं सधस्थेषु महो दिवः । चारुं सुकृत्ययैमहे १
संवृक्तधृष्णुमुक्थ्यं महामहिव्रतं मदम् । शतं पुरो रुरुक्षणिम् २
अतस्त्वा रयिमभि राजानं सुक्रतो दिवः । सुपर्णो अव्यथिर्भरत् ३
विश्वस्मा इत् स्वर्दृशे साधारणं रजस्तुरम् । गोपामृतस्य विर्भरत् ४
अधा हिन्वान इन्द्रियं ज्यायो महित्वमानशे । अभिष्टिकृद्विचर्षणिः ५

(४९) एकोनपञ्चाशं सूक्तम्

(१-५) पञ्चर्चस्यास्य सूक्तस्य भार्गवः कविर्ऋषिः । पवमानः सोमो देवता ।
गायत्री छन्दः

पवस्व वृष्टिमा सु नो ऽपामूर्मि दिवस्परि । अयुक्ष्मा बृहतीरिषः १
तया पवस्व धारया यया गाव इहागमन् । जन्यास उप नो गृहम् २
घृतं पवस्व धारया यज्ञेषु देववीतमः । अस्मभ्यं वृष्टिमा पव ३
स न ऊर्जे व्यश्व्ययं पवित्रं धाव धारया । देवासः शृणवन् हि कम् ४
पवमानो असिष्यद् दक्षास्यपुजङ्घनत् । प्रवद्रोचयन् रुचः ५

(५०) पञ्चाशं सूक्तम्

(१-५) पञ्चर्चस्यास्य सूक्तस्याङ्गिरस उचथ्य ऋषिः । पवमानः सोमो देवता ।

गायत्री छन्दः

उत् ते शुष्मास ईरते सिन्धोरूर्मेरिव स्वनः । वाणस्य चोदया पविम् १
प्रसवे त उदीरते तिस्रो वाचो मखस्युवः । यदव्य एषि सानवि २
अव्यो वारे परि प्रियं हरिं हिन्वन्त्यद्रिभिः । पवमानं मधुश्चुतम् ३
आ पवस्व मदिन्तम पवित्रं धारया कवे । अर्कस्य योनिमासदम् ४
स पवस्व मदिन्तम् गोभिरञ्जानो अक्तुभिः । इन्द्रविन्द्राय पीतये ५

(५१) एकपञ्चाशं सूक्तम्

(१-५) पञ्चर्चस्यास्य सूक्तस्याङ्गिरस उचथ्य ऋषिः । पवमानः सोमो देवता ।

गायत्री छन्दः

अध्वर्यो अद्रिभिः सुतं सोमं पवित्रं आ सृज । पुनीहीन्द्राय पातवे १
दिवः पीयूषमुत्तमं सोममिन्द्राय वज्रिणे । सुनोता मधुमत्तमम् २
तव त्य इन्द्रो अन्धसो देवा मधोर्व्यश्नते । पवमानस्य मरुतः ३
त्वं हि सोम वर्धयन् त्सुतो मदाय भूरण्ये । वृषन् तस्तोतारमूतये ४
अभ्यर्ष विचक्षणं पवित्रं धारया सुतः । अभि वाजमुत श्रवः ५

(५२) द्विपञ्चाशं सूक्तम्

(१-५) पञ्चर्चस्यास्य सूक्तस्याङ्गिरस उचथ्य ऋषिः । पवमानः सोमो देवता ।

गायत्री छन्दः

परि द्युक्षः सनद्रयिर्भरद्वाजं नो अन्धसा । सुवानो अर्ष पवित्रं आ १
तव प्रत्नेभिरध्वभि रव्यो वारे परि प्रियः । सहस्रधारो यात् तना २
चरुर्न यस्तमीङ्खये न्दो न दानमीङ्खय । वधैर्वधस्त्रवीङ्खय ३
नि शुष्ममिन्दवेषां पुरुहूत जनानाम् । यो अस्माँ आदिदैशति ४
शतं न इन्द्र ऊतिभिः सहस्रं वा शुचीनाम् । पवस्व मंहयद्रयिः ५

(५३) त्रिपञ्चाशं सूक्तम्

(१-४) चतुर्ऋचस्यास्य सूक्तस्य काश्यपोऽवत्सार ऋषिः । पवमानः सोमो देवता

। गायत्री छन्दः

उत् ते शुष्मासो अस्थु रक्षो भिन्दन्तौ अद्रिवः । नुदस्व याः परिस्पृधः १
 अया निजघ्निरोजसा रथसङ्गे धने हिते । स्तवा अर्बिभ्युषा हृदा २
 अस्य वृतानि नाधृषे पर्वमानस्य दूढया । रुज यस्त्वा पृतन्यति ३
 तं हिन्वन्ति मदच्युतं हरिं नदीषु वाजिनम् । इन्दुमिन्द्राय मत्सरम् ४

(५४) चतुष्पञ्चाशं सूक्तम्

(१-४) चतुर्ऋचस्यास्य सूक्तस्य काश्यपोऽवत्सार ऋषिः । पवमानः सोमो देवता
 । गायत्री छन्दः

अस्य प्रत्नामनु द्युतं शुक्रं दुदुहे अहयः । पर्यः सहस्रसामृषिम् १
 अयं सूर्य इवोपट्टु गयं सरासि धावति । सप्त प्रवतु आ दिवम् २
 अयं विश्वानि तिष्ठति पुनानो भुवनोपरि । सोमो देवो न सूर्यः ३
 परि णो देववीतये वाजा अर्षसि गोमतः । पुनान इन्दविन्द्रयुः ४

(५५) पञ्चपञ्चाशं सूक्तम्

(१-४) चतुर्ऋचस्यास्य सूक्तस्य काश्यपोऽवत्सार ऋषिः । पवमानः सोमो देवता
 । गायत्री छन्दः

यवयवं नो अन्धसा पुष्टंपुष्टं परि स्रव । सोम विश्वा च सौभगा १
 इन्दो यथा तव स्तवो यथा ते जातमन्धसः । नि बर्हिषि प्रिये सदः २
 उत नो गोविदंश्चवित् पवस्व सोमन्धसा । मद्भूतमेभिरहभिः ३
 यो जिनाति न जीयते हन्ति शत्रुमभीत्य । स पवस्व सहस्रजित् ४

(५६) षट्पञ्चाशं सूक्तम्

(१-४) चतुर्ऋचस्यास्य सूक्तस्य काश्यपोऽवत्सार ऋषिः । पवमानः सोमो देवता
 । गायत्री छन्दः

परि सोमं ऋतं बृहदाशुः पवित्रं अर्षति । विघ्नन् रक्षासि देवयुः १
 यत् सोमो वाजमर्षति शतं धारा अपस्युवः । इन्द्रस्य सख्यमाविशन् २
 अभि त्वा योषणो दशं जारं न कन्यानूषत । मृज्यसै सोम सातयै ३
 त्वमिन्द्राय विष्णावे स्वादुरिन्दो परि स्रव । नृचफट्टन् स्तोतृन् पाह्यंहसः ४

(५७) सप्तपञ्चाशं सूक्तम्

(१-४) चतुर्ऋचस्यास्य सूक्तस्य काश्यपोऽवत्सार ऋषिः । पवमानः सोमो देवता
। गायत्री छन्दः

प्र ते धारा असञ्चतौ दिवो न यन्ति वृष्टयः । अच्छा वाजं सहस्त्रिणम् १
अभि प्रियाणि काव्या विश्वा चक्षारो अर्षति । हरिस्तुञ्जान आयुधा २
स मर्मजान आयुभि रिभो राजैव सुव्रतः । श्येनो न वंसु षीदति ३
स नो विश्वा दिवो वसू तो पृथिव्या अर्धि । पुनान इन्दवा भर ४

(५८) अष्टपञ्चाशं सूक्तम्

(१-४) चतुर्ऋचस्यास्य सूक्तस्य काश्यपोऽवत्सार ऋषिः । पवमानः सोमो देवता
। गायत्री छन्दः

तरत् स मन्दी धावति धारा सुतस्यान्धसः । तरत् स मन्दी धावति १
उस्त्रा वैद वसूनां मर्तस्य देव्यवसः । तरत् स मन्दी धावति २
ध्वस्त्रयोः पुरुषन्त्यो रा सहस्त्राणि दद्यहे । तरत् स मन्दी धावति ३
आ ययौस्त्रिंशत् तना सहस्त्राणि च दद्यहे । तरत् स मन्दी धावति ४

(५९) एकोनषष्टितमं सूक्तम्

(१-४) चतुर्ऋचस्यास्य सूक्तस्य काश्यपोऽवत्सार ऋषिः । पवमानः सोमो देवता
। गायत्री छन्दः

पवस्व गोजिदंश्चजि द्विश्चजित् सौम रययजित् । प्रजावद्रत्नमा भर १
पवस्वाद्भ्यो अदाभ्यः पवस्वौषधीभ्यः । पवस्व धिषणाभ्यः २
त्वं सौम पवमानो विश्वानि दुरिता तर । कविः सीद नि बर्हिषि ३
पवमान स्वर्विदो जायमानोऽभवो महान् । इन्दो विश्वाँ अभीदसि ४

(६०) षष्टितमं सूक्तम्

(१-४) चतुर्ऋचस्यास्य सूक्तस्य काश्यपोऽवत्सार ऋषिः । पवमानः सोमो देवता
। (१-२, ४) प्रथमाद्वितीययोर्ऋचोश्चतुर्थ्याश्च गायत्री, (३) तृतीयायाश्च पुर
उष्णिक् छन्दसी

प्र गायत्रेण गायत् पवमानं विचर्षणिम् । इन्दुं सहस्रचक्षसम् १
तं त्वा सहस्रचक्षस मथो सहस्रभर्णसम् । अति वारमपाविषुः २

अति वारान् पर्वमानो असिष्यदत् कलशाँ अभि धावति । इन्द्रस्य
हाद्याविशन् ३

इन्द्रस्य सोम राधसे शं पवस्व विचर्षणे । प्रजावद्रेत् आ भर ४

तृतीयोऽनुवाकः

। सू० ६१-६७ ।

(६१) एकषष्टितमं सूक्तम्

(१-३०) त्रिंशदृचस्यास्य सूक्तस्याङ्गिरसोऽमहीयुर्ऋषिः । पवमानः सोमो देवता ।

गायत्री छन्दः

अया वीती परि स्रव यस्त इन्द्रो मदेष्वा । अवाहन् नवतीर्नव १
पुरः सद्य इत्थाधिये दिवोदासाय शम्बरम् । अध त्यं तुर्वशं यदुम् २
परि णो अश्वमश्ववि द्गोमदिन्द्रो हिरण्यवत् । क्षरा सहस्रिणीरिषः ३
पर्वमानस्य ते वयं पवित्रमभ्युन्दतः । सखित्वमा वृणीमहे ४
ये तै पवित्रमूर्मयो ऽभिक्षरन्ति धारया । तेभिर्नः सोम मृळय ५
स नः पुनान आ भर रयिं वीरवतीमिषम् । ईशानः सोम विश्वतः ६
एतमु त्यं दश क्षिपो मृजन्ति सिन्धुमातरम् । समादित्येभिरख्यत ७
समिन्द्रैणोत वायुना सुत एति पवित्र आ । सं सूर्यस्य रश्मिभिः ८
स नो भर्गाय वायवे पूष्णे पवस्व मधुमान् । चारुमित्रे वरुणे च ९
उच्चा तै जातमन्धसो दिवि षड्म्या ददे । उग्रं शर्म महि श्रवः १०
एना विश्वान्यर्य आ द्युम्नानि मानुषाणाम् । सिषासन्तो वनामहे ११
स न इन्द्राय यज्यवे वरुणाय मरुद्भ्यः । वरिवोवित् परि स्रव १२
उपो षु जातमसुरं गोभिर्भृङ्गं परिष्कृतम् । इन्दु देवा अयासिषुः १३
तमिद्वर्धन्तु नो गिरौ वत्सं संशिश्वरीरिव । य इन्द्रस्य हृदंसनिः १४
अर्षा णः सोम शं गवे धुक्षस्व पिप्युषीमिषम् । वर्धा समुद्रमुक्थ्यम् १५
पर्वमानो अजीजनद्विचित्रं न तन्यतुम् । ज्योतिर्वैश्वानरं बृहत् १६
पर्वमानस्य ते रसो मदौ राजन्नदुच्छुनः । वि वारमव्यमर्षति १७
पर्वमान रसस्तव दक्षो वि राजति द्युमान् । ज्योतिर्विश्वं स्वर्दृशे १८
यस्ते मदो वरैरय स्तेना पवस्वान्धसा । देवावीरघशंसहा १९
जघ्निर्वृत्रमित्रियं सस्त्रिर्वाज दिवेदिवे । गोषा उ अश्वसा असि २०
संमिश्लो अरुषो भव सूपस्थाभिर्न धेनुभिः । सीदञ्छ्येनो न योनिमा २१

स पवस्व य आविथेन्द्रं वृत्राय हन्तवे । वृत्रिवांसं महीरपः २२
सुवीरासो वयं धना जयैम सोम मीढ्वः । पुनानो वर्ध नो गिरः २३
त्वोतासस्तवावसा स्याम वन्वन्त आमुरः । सोम वृतेषु जागृहि २४
अपघ्नन् पवते मृधो ऽपु सोमो अराव्णः । गच्छन्निन्द्रस्य निष्कृतम् २५
महो नो राय आ भर पवमान जही मृधः । रास्वेन्दो वीरवद्यशः २६
न त्वा शतं चन हुतो राधो दित्सन्तमा मिनन् । यत् पुनानो मखस्यसै २७
पवस्वेन्दो वृषा सुतः कृधी नो यशसो जनै । विश्वा अप द्विषौ जहि २८
अस्य ते सख्ये वयं तवेन्दो द्युम्न उत्तमे । सासह्याम पृतन्यतः २९
या तै भीमान्यायुधा तिग्मानि सन्ति धूर्वणे । रक्षा समस्य नो निदः ३०

(६२) द्विषष्टितमं सूक्तम्

(१-३०) त्रिंशदृचस्यास्य सूक्तस्य भार्गवो जमदग्निर्ऋषिः । पवमानः सोमो देवता
। गायत्री छन्दः

एते असृग्रमिन्दव स्तिरः पवित्रमाश्वः । विश्वान्यभि सौभगा १
विघ्नन्तो दुरिता पुरु सुगा तोकार्य वाजिनः । तना कृणवन्तो अर्वाते २
कृणवन्तो वरिवो गवे ऽभ्यर्षन्ति सुष्टुतिम् । इळाम्स्मभ्य संयतम् ३
असाव्यंशुर्मदाया ऽप्सु दक्षौ गिरिष्ठाः । श्येनो न योनिमासदत् ४
शुभ्रमन्धो देववात मप्सु धूतो नृभिः सुतः । स्वदन्ति गावः पयोभिः ५
आदीमश्वं न हेतारो ऽशुशुभन्नमृताय । मध्वो रसं सधमादे ६
यास्ते धारा मधुश्चुतो ऽसृग्रमिन्द ऊतयै । ताभिः पवित्रमासदः ७
सो अर्षेन्द्राय पीतयै तिरो रोमाण्यव्यया । सीदन् योना वनेष्वा ८
त्वमिन्दो परि स्रव स्वादिष्टो अङ्गिरोभ्यः । वरिवोविद्घृतं पयः ९
अयं विचर्षणिर्हितः पवमानः स चैतति । हिन्वान आप्यं बृहत् १०
एष वृषा वृषव्रतः पवमानो अशस्तिहा । करद्वसूनि दाशुर्षे ११
आ पवस्व सहस्त्रिणं रयिं गोमन्तमश्विनम् । पुरुश्चन्द्रं पुरुस्पृहम् १२
एष स्य परि षिच्यते मर्मृज्यमान आयुभिः । उरुगायः कविक्रतुः १३
सहस्रौतिः शतामघो विमानो रजसः कविः । इन्द्राय पवते मदः १४
गिरा जात इह स्तुत इन्दुरिन्द्राय धीयते । वियोना वसताविव १५
पवमानः सुतो नृभिः सोमो वाजमिवासरत् । चमूषु शक्मनासदम् १६
तं त्रिपृष्ठे त्रिवन्धुरे रथे युञ्जन्ति यातवे । ऋषीणां सप्त धीतिभिः १७

तं सौतारो धनुस्पृतं माशं वाजाय यातवे । हरिं हिनोत वाजिनम् १८
 आविशन् कलशं सुतो विश्वा अर्षन्नभि श्रियः । शूरो न गोषु तिष्ठति १९
 आ तं इन्द्रो मदाय कं पयो दुहन्त्यायवः । देवा देवेभ्यो मधु २०
 आ नः सोमं पवित्र आ सृजता मधुमत्तमम् । देवेभ्यो देवश्रुत्तमम् २१
 एते सोमा असृजत गृणानाः श्रवसे महे । मदिन्तमस्य धारया २२
 अभि गव्यानि वीतये नृम्णा पुनानो अर्षसि । सनद्वाजः परि स्रव २३
 उत नो गोमतीरिषो विश्वा अर्ष परिष्ठभः । गृणानो जमदग्निना २४
 पवस्व वाचो अग्रियः सोमं चित्राभिरूतिभिः । अभि विश्वानि काव्या २५
 त्वं समुद्रिया अपौ ऽग्रियो वाच ईरयन् । पवस्व विश्वमेजय २६
 तुभ्येमा भुवना कवे महिम्ने सोम तस्थिरे । तुभ्यमर्षन्ति सिन्धवः २७
 प्र ते दिवो न वृष्टयो धारा यन्त्यसञ्चतः । अभि शक्रामुपस्तिरम् २८
 इन्द्रायेन्दु पुनीतनो ग्रं दत्ताय साधनम् । ईशानं वीतिराधसम् २९
 पवमान ऋतः कविः सोमः पवित्रमासदत् । दधत् स्तोत्रे सुवीर्यम् ३०

(६३) त्रिषष्टितमं सूक्तम्

(१-३०) त्रिंशदृचस्यास्य सूक्तस्य काश्यपो निधुविर्ऋषिः । पवमानः सोमो देवता
। गायत्री छन्दः

आ पवस्व सहस्रिणं रयिं सोम सुवीर्यम् । अस्मे श्रवांसि धारय १
 इषमूर्जं च पिन्वस इन्द्राय मत्सरिन्तमः । चमूष्वा नि षीदसि २
 सुत इन्द्राय विष्णावे सोमः कलशं अक्षरत् । मधुमाँ अस्तु वायवे ३
 एते असृग्रमाशवो ऽति हरांसि बभ्रवः । सोमा ऋतस्य धारया ४
 इन्द्रं वर्धन्तो अमुरः कृणवन्तो विश्वमार्यम् । अपघ्नन्तो अराव्णः ५
 सुता अनु स्वमा रजो ऽभ्यर्षन्ति बभ्रवः । इन्द्रं गच्छन्त इन्दवः ६
 अया पवस्व धारया यया सूर्यमरौचयः । हिन्वानो मानुषीरपः ७
 अयुक्त सूर एतंशं पवमानो मनावधि । अन्तरिक्षेण यातवे ८
 उत त्या हरितो दश सूरौ अयुक्त यातवे । इन्दुरिन्द्र इति ब्रुवन् ९
 परीतो वायवे सुतं गिर इन्द्राय मत्सरम् । अव्यो वारेषु सिञ्चत १०
 पवमान विदा रयि म्स्मर्भ्यं सोम दुष्टरम् । यो दूणाशौ वनुष्यता ११
 अभ्यर्ष सहस्रिणं रयिं गोमन्तमश्विनम् । अभि वाजमुत श्रवः १२
 सोमो देवो न सूर्यो ऽद्रिभिः पवते सुतः । दधानः कलशे रसम् १३

एते धामान्यायां शक्रा ऋतस्य धारया । वाजं गोमन्तमक्षरन् १४
सुता इन्द्राय वज्रिणे सोमासो दध्याशिरः । पवित्रमत्यक्षरन् १५
प्र सौम मधुमत्तमो राये अर्ष पवित्र आ । मदो यो देववीतमः १६
तमी मृजन्त्यायवो हरि नदीषु वाजिनम् । इन्दुमिन्द्राय मत्सरम् १७
आ पवस्व हिरण्यव दक्षावत् सोम वीरवत् । वाजं गोमन्तमा भर १८
परि वाजे न वाजयु मव्यो वारेषु सिञ्चत । इन्द्राय मधुमत्तमम् १९
क्विं मृजन्ति मर्ज्य धीभिर्विप्रा अवस्यवः । वृषा कर्निक्रदर्षति २०
वृषणं धीभिरमुरं सोममृतस्य धारया । मती विप्राः समस्वरन् २१
पवस्व देवायुष गिन्द्रं गच्छतु ते मदः । वायुमा रोह धर्मणा २२
पवमान नि तौशसे रयिं सौम श्रवाय्यम् । प्रियः समुद्रमा विश २३
अपघ्नन् पवसे मृधः क्रतुवित् सौम मत्सरः । नुदस्वादवयुं जनम् २४
पवमाना असृक्षत सोमाः शक्रास इन्दवः । अभि विश्वानि काव्या २५
पवमानास आशवः शभ्रा असृग्मिन्दवः । घन्तो विश्वा अप द्विषः २६
पवमाना दिवस्प र्यन्तरिक्षादसृक्षत । पृथिव्या अधि सानवि २७
पुनानः सौम धारयेन्दो विश्वा अप स्त्रिधः । जहि रक्षांसि सुक्रतो २८
अपघ्नन् त्सौम रक्षसो ऽभ्यर्ष कर्निक्रदत् । द्युमन्तं शुष्ममुत्तमम् २९
अस्मे वसूनि धारयु सोम दिव्यानि पार्थिवा । इन्दो विश्वानि वार्या ३०

(६४) चतुःषष्टितमं सूक्तम्

(१-३०) त्रिंशदृचस्यास्य सूक्तस्य मारीचः कश्यप ऋषिः । पवमानः सोमो देवता
। गायत्री छन्दः

वृषा सोम द्युमाँ असि वृषा देव वृषवतः । वृषा धर्माणि दधिषे १
वृष्णास्ते वृष्णयं शवो वृषा वनं वृषा मदः । सत्यं वृषन् वृषेदसि २
अश्वो न चक्रदो वृषा सं गा इन्दो समवतः । वि नो राये दुरो वृधि ३
असृक्षत प्र वाजिनो गव्या सोमासो अश्वया । शक्रासौ वीरयाशवः ४
शम्भमाना ऋतायुभिर्मृज्यमाना गर्भस्त्योः । पवन्ते वारो अव्ययै ५
ते विश्वा दाशुषे वसु सोमा दिव्यानि पार्थिवा । पवन्तामान्तरिक्ष्या ६
पवमानस्य विश्ववित् प्र ते सर्गा असृक्षत । सूर्यस्येव न रश्मयः ७
केतुं कृणवन् दिवस्प रि विश्वा रूपाभ्यर्षसि । समुद्रः सौम पिन्वसे ८

हिन्वानो वाचमिष्यसि पवमान विधर्मणि । अक्रान् देवो न सूर्यः ६
 इन्दुः पविष्ट चेतनः प्रियः कवीनां मृती । सृजदश्च रथीरिव १०
 ऊर्मिर्यस्तै पवित्र आ देवावीः पर्यक्षरत् । सीदन्नृतस्य योनिमा ११
 स नो अर्ष पवित्र आ मदो यो देववीतमः । इन्द्रविन्द्राय पीतये १२
 इषे पवस्व धारया मृज्यमानो मनीषिभिः । इन्दो रुचाभि गा इहि १३
 पुनानो वरिवस्कृध्यूर्ज जनाय गिर्वणः । हरे सृजान आशिरम् १४
 पुनानो देववीतय इन्द्रस्य याहि निष्कृतम् । द्युतानो वाजिभिर्यतः १५
 प्र हिन्वानास इन्द्रो ऽच्छा समुद्रमाशर्वः । धिया जूता असृक्षत १६
 मर्मजानास आयवो वृथा समुद्रमिन्द्रवः । अगमन्नृतस्य योनिमा १७
 परि णो याह्यस्मयु विश्वा वसून्योर्जसा । पाहि नः शर्म वीरवत् १८
 मिमाति वहिरेतशः पदं युजान ऋक्वभिः । प्र यत् समुद्र आहितः १९
 आ यद्योनिं हिरण्यय माशुर्नृतस्य सीदति । जहात्यप्रचेतसः २०
 अभि वेना अनूषते यक्षन्ति प्रचेतसः । मज्जन्त्यविचेतसः २१
 इन्द्रायेन्दो मरुत्वते पवस्व मधुमत्तमः । ऋतस्य योनिमासदम् २२
 तं त्वा विप्रा वचोविद्ः परिष्कृणवन्ति वेधसः । सं त्वा मृजन्त्यायवः २३
 रसं ते मित्रो अर्यमा पिबन्ति वरुणः कवे । पवमानस्य मरुतः २४
 त्वं सोम विपुश्चितं पुनानो वाचमिष्यसि । इन्दो सहस्रभर्णसम् २५
 उतो सहस्रभर्णसं वाचं सोम मखस्युर्वम् । पुनान इन्द्रवा भर २६
 पुनान इन्द्रवेषां पुरुहूत जनानाम् । प्रियः समुद्रमा विश २७
 दविद्युतत्या रुचा परिष्टोभन्त्या कृपा । सोर्माः शक्रा गवाशिरः २८
 हिन्वानो हेतृभिर्यत आ वाजं वाज्यक्रमीत् । सीदन्तो वनुषो यथा २९
 ऋधक् सोम स्वस्तये संजग्मानो दिवः कविः । पवस्व सूर्यो दृशे ३०
 द्वितीयोऽध्यायः

। व० १-३३ ।

(६५) पञ्चषष्टितमं सूक्तम्

(१-३०) त्रिंशदृचस्यास्य सूक्तस्य वारुणिर्भृगुर्भार्गवो जमदग्निर्वा ऋषिः । पवमानः
सोमो देवता । गायत्री छन्दः

हिन्वन्ति सूरमुस्रयः स्वसारो जामयस्पतिम् । महामिन्दुं महीयुवः १
पवमान रुचारुचा देवो देवेभ्यस्परि । विश्वा वसून्या विश २

आ पवमान सुष्टुतिं वृष्टिं देवेभ्यो दुर्वः । इषे पवस्व संयतम् ३
 वृषा ह्यसि भानुना द्युमन्तं त्वा हवामहे । पवमान स्वाध्यः ४
 आ पवस्व सुवीर्यं मन्दमानः स्वायुध । इहो ष्विन्दवा गहि ५
 यद्विद्विः परिषिच्यसे मृज्यमानो गर्भस्त्योः । दुर्गा सधस्थमश्नुषे ६
 प्र सोमाय व्यश्ववत् पवमानाय गायत । महे सहस्रचक्षसे ७
 यस्य वर्णं मधुश्रुतं हरिं हिन्वन्त्यद्रिभिः । इन्दुमिन्द्राय पीतये ८
 तस्य ते वाजिनो वयं विश्वा धनानि जिग्युषः । सखित्वमा वृणीमहे ९
 वृषा पवस्व धारया मरुत्वते च मत्सरः । विश्वा दधान् ओजसा १०
 तं त्वा धर्तारिमोरयोः पवमान स्वर्दृशम् । हिन्वे वाजेषु वाजिनम् ११
 अया चित्तो विपानया हरिः पवस्व धारया । युजं वाजेषु चोदय १२
 आ न इन्दो महीमिषं पवस्व विश्वदर्शतः । अस्मभ्यं सोम गातुवित् १३
 आ कलशा अनूषतेन्दो धाराभिरोजसा । एन्द्रस्य पीतये विश १४
 यस्य ते मद्यं रसं तीव्रं दुहन्त्यद्रिभिः । स पवस्वाभिमातिहा १५
 राजा मेधाभिरीयते पवमानो मनावधि । अन्तरिक्षेण यातवे १६
 आ न इन्दो शतग्विनं गवां पोषं स्वश्वयम् । वहा भर्गत्तिमूतये १७
 आ नः सोम सहो जुवो रूपं न वर्चसे भर । सुष्वाणो देववीतये १८
 अर्षा सोम द्युमन्तमो ऽभि द्रोणानि रोर्ववत् । सीदञ्छयेनो न योनिमा १९
 अप्सा इन्द्राय वायवे वरुणाय मरुद्भिः । सोमो अर्षति विष्णावे २०
 इषं तोकार्यं नो दधं दस्मभ्यं सोम विश्वतः । आ पवस्व सहस्त्रिणाम् २१
 ये सोमांसः परावति ये अर्वावति सुन्विरे । ये वादः शर्यणावति २२
 य अर्जिकेषु कृत्वसु ये मध्ये पुस्त्यानाम् । ये वा जनैषु पञ्चसु २३
 ते नो वृष्टिं दिवस्परि पवन्तामा सुवीर्यम् । सुवाना देवास इन्दवः २४
 पवते हर्षतो हरिं गृणानो जमदग्निना । हिन्वानो गोरधि त्वचि २५
 प्र शक्रासौ वयोजुवो हिन्वानासो न सप्तयः । श्रीणाना अप्सु मञ्जत २६
 तं त्वा सुतेष्वाभुवो हिन्विरे देवतातये । स पवस्वानया रुचा २७
 आ ते दक्षं मयोभुवं वह्निमद्या वृणीमहे । पान्तमा पुरुस्पृहम् २८
 आ मन्द्रमा वरेण्यमा विप्रमा मनीषिणाम् । पान्तमा पुरुस्पृहम् २९
 आ रयिमा सुचेतुन् मा सुक्रतो तनूष्वा । पान्तमा पुरुस्पृहम् ३०

(६६) षट्षष्टितमं सूक्तम्

(१-३०) त्रिंशदृचस्यास्य सूक्तस्य शतं वैखानसा ऋषयः । (१-१८, २२-३०)

प्रथमाद्यष्टादशर्चा द्वाविंश्यादिनवानाञ्च पवमानः सोमः, (१६-२१)

एकोनविंश्यादितृचस्य च पवमानोऽग्निर्देवते । (१-१७, १६-३०)

प्रथमादिसप्तदशर्चामेकोनविंश्यादिद्वादशानाञ्च गायत्री,

(१८) अष्टादश्याश्चानुष्टुप् छन्दसी

पवस्व विश्वचर्षणे ऽभि विश्वानि काव्या । सखा सखिभ्य ईड्यैः १
ताभ्यां विश्वस्य राजसि ये पवमान धामनी । प्रतीची सोम तस्थतुः २
परि धामानि यानिते त्वं सोमासि विश्वतः । पवमान ऋतुभिः कवे ३
पवस्व जनयन्निषो ऽभि विश्वानि वार्या । सखा सखिभ्य ऊतयै ४
तव शक्रासौ अर्चयौ दिवस्पृष्टे वि तन्वते । पवित्रं सोम धामभिः ५
तवेमे सप्त सिन्धवः प्रशिषं सोम सिस्त्रते । तुभ्यं धावन्ति धेनवः ६
प्र सोम याहि धारया सुत इन्द्राय मत्सरः । दधानो अक्षिति श्रवः ७
समु त्वा धीभिरंस्वरन् हिन्वतीः सप्त जामयः । विप्रमाजा विवस्वतः ८
मृजन्ति त्वा समग्रुवो ऽव्यै जीरावधि ष्वणि । रेभो यदृज्यसे वने ९
पवमानस्य ते कवे वाजिन् त्सर्गा असृक्षत । अर्वन्तो न श्रवस्यवः १०
अच्छा कोशं मधुश्चुत मसृग्रं वारं अव्ययै । अवावशन्त धीतयः ११
अच्छा समुद्रमिन्दवो ऽस्तं गावो न धेनवः । अगमन्वृतस्य योनिमा १२
प्र णा इन्दो महे रण आपौ अर्षन्ति सिन्धवः । यद्गोभिर्वासयिष्यसे १३
अस्य ते सख्ये वय मियक्षन्तस्त्वोतयः । इन्दो सखित्वमुश्मसि १४
आ पवस्व गर्विष्टये महे सोम नृचक्षसे । एन्द्रस्य जठरं विश १५
महाँ असि सोम ज्येष्ठं उग्राणामिन्द्र ओजिष्ठः । युध्वा सञ्चञ्जिगेथ १६
य उग्रेभ्यश्चिदोजीया ज्छूरैभ्यश्चिच्छूरतरः । भूरिदाभ्यश्चिन्मंहीयान् १७
त्वं सोम सूर एषं स्तोकस्य साता तनूनाम् । वृणीमहे सख्याय वृणीमहे
युज्याय १८

अग्र आरूषि पवस आ सुवोर्जमिषं च नः । आरे बाधस्व दुच्छुनाम् १९
अग्निर्ऋषिः पवमानः पाञ्चजन्यः पुरोहितः । तमीमहे महागयम् २०
अग्ने पवस्व स्वपा अस्मे वर्चः सुवीर्यम् । दधद्रयिं मयि पोषम् २१
पवमानो अति स्त्रिधो ऽभ्यर्षति सुष्टतिम् । सूरु न विश्वदर्शतः २२
स मर्मजान आयुभिः प्रयस्वान् प्रयसे हितः । इन्दुरत्यौ विचक्षणः २३
पवमान ऋतं बृहच्छुक्रं ज्योतिरजीजनत् । कृष्णा तमांसि जङ्घनत् २४

पवमानस्य जङ्घनतो हरैश्चन्द्रा असृक्षत । जीरा अजिरशौचिषः २५
पवमानो रथीतमः शभ्रेभिः शभ्रशस्तमः । हरिश्चन्द्रो मरुद्गणः २६
पवमानो व्यंशनव द्रुश्मभिर्वाजसातमः । दधत् स्तोत्रे सुवीर्यम् २७
प्र सुवान इन्दुरक्षाः पवित्रमत्यव्ययम् । पुनान इन्दुरिन्द्रमा २८
एष सोमो अधि त्वचि गवां क्रीळत्यद्रिभिः । इन्द्रं मदायु जोहुवत् २९
यस्य ते द्युम्वत् पयः पवमानाभृतं दिवः । तेन नो मृळ जीवसै ३०

(६७) सप्तषष्टितमं सूक्तम्

(१-३२) द्वात्रिंशदृचस्यास्य सूक्तस्य सप्तर्षयः-(१-३) प्रथमादितृचस्य बार्हस्पत्यो
भरद्वाजः, (४-६) चतुर्थ्यादितृचस्य मारीचः कश्यपः, (७-९) सप्तम्यादितृचस्य
राहूगणो गोतमः, (१०-१२) दशम्यादितृचस्य भौमोऽग्निः, (१३-१५)
त्रयोदश्यादितृचस्य गाथिनो विश्वामित्रः, (१६-१८) षोडश्यादितृचस्य भार्गवो
जमदग्निः, (१९-२१) एकोनविंश्यादितृचस्य मैत्रावरुणिर्वसिष्ठः, (२२-३२)
द्वाविंश्याद्येकादशर्चाञ्जाङ्गिरसः पवित्रो वसिष्ठो वोभौ वा ऋषयः । (१-६, १३-२२,
२८-३०) प्रथमादिनवर्चा त्रयोदश्यादिदशानामष्टाविंश्यादितृचस्य च पवमानः
सोमः, (१०-१२) दशम्यादितृचस्य पवमानः पूषा सोमो वा, (२३-२४)
त्रयोविंशीचतुर्विंशयोः पवमानोऽग्निः, (२५) पञ्चविंश्याः पवमानोऽग्निः सविता वा,
(२६) षड्विंश्याः पवमानोऽग्निः पवमानाग्निसवितारो वा, (२७) सप्तविंश्याः
पवमानोऽग्निर्विश्वे देवा वा, (३१-३२) एकत्रिंशीद्वात्रिंशयोश्च
पावमान्यध्येतृस्तुतिर्देवताः । (१-१५, १६-२६, २८-२९)
प्रथमादिपञ्चदशर्चामेकोनविंश्याद्यष्टानामष्टाविंश्येकोनत्रिंशयोश्च गायत्री, (१६-१८)
षोडश्यादितृचस्य द्विपदा गायत्री, (२७, ३१-३२)

सप्तविंश्येकत्रिंशीद्वात्रिंशीनामनुष्टुप्, (३०) त्रिंश्याश्च पुर उष्णिक् छन्दांसि
त्वं सौमासि धारयु मन्द्र ओजिष्ठो अध्वरे । पवस्व मंहयद्रयिः १
त्वं सुतो नृमार्दनो दधन्वान् मत्सरिन्तमः । इन्द्राय सूरिरन्धसा २
त्वं सुष्वाणो अद्रिभि रभ्यर्ष कर्निक्रदत् । द्युमन्तं शुष्ममुत्तमम् ३
इन्दुर्हिन्वानो अर्षति तिरो वाराण्यव्यया । हरिर्वाजमचिक्रदत् ४
इन्दो व्यव्यमर्षसि वि श्रवांसि वि सौभगा । वि वाजान् त्सोम गोमंतः ५
आ न इन्दो शतृग्विनं रयिं गोमन्तमश्विनम् । भरा सोम सहस्त्रिणम् ६
पवमानास इन्दव स्तिरः पवित्रमाशर्वः । इन्द्रं यामेभिराशत ७
ककुहः सोम्यो रस इन्दुरिन्द्राय पूर्व्यः । आयुः पवत आयवे ८

हिन्वन्ति सूरमुस्रयः पर्वमानं मधुश्चुतम् । अभि गिरा समस्वरन् ६
 अविता नो अजाश्वः पूषा यामनियामनि । आ भक्षत् कन्यासु नः १०
 अयं सोमः कपर्दिने घृतं न पवते मधु । आ भक्षत् कन्यासु नः ११
 अयं त आघृणे सुतो घृतं न पवते शुचि । आ भक्षत् कन्यासु नः १२
 वाचो जन्तुः कवीनां पर्वस्व सोम धारया । देवेषु रत्नधा असि १३
 आ कलशेषु धावति श्येनो वर्म वि गाहते । अभि द्रोणा कर्निक्रदत् १४
 परि प्र सोम ते रसो ऽसर्जि कलशे सुतः । श्येनो न तक्तो अर्षति १५
 पर्वस्व सोम मन्दय त्रिन्द्राय मधुमत्तमः १६
 असृग्रन् देववीतये वाजयन्तो रथा इव १७
 ते सुतासो मदिन्तमाः शक्रा वायुमसृक्षत १८
 ग्राव्णा तुन्नो अभिष्टुतः पवित्रं सोम गच्छसि । दधत् स्तोत्रे सुवीर्यम् १९
 एष तुन्नो अभिष्टुतः पवित्रमति गाहते । रक्षोहा वारमव्ययम् २०
 यदन्ति यच्च दूरके भयं विन्दति मामिह । पर्वमानु वि तज्जहि २१
 पर्वमानुः सो अद्य नः पवित्रेण विचर्षणिः । यः पोता स पुनातु नः २२
 यत् तै पवित्रमर्चिष्यग्ने विततमन्तरा । ब्रह्म तेन पुनीहि नः २३
 यत् तै पवित्रमर्चिवदग्ने तेन पुनीहि नः । ब्रह्मसवैः पुनीहि नः २४
 उभाभ्यां देव सवितः पवित्रेण सवेन च । मां पुनीहि विश्वतः २५
 त्रिभिष्टुं देव सवितुर्वर्षिष्ठैः सोम धामभिः । अग्ने दक्षैः पुनीहि नः २६
 पुनन्तु मां देवजनाः पुनन्तु वसवो धिया । विश्वे देवाः पुनीत मा जातवेदः
 पुनीहि मां २७
 प्र प्यायस्व प्र स्यन्दस्व सोम विश्वेभिरंशुभिः । देवेभ्य उत्तमं हविः २८
 उप प्रियं पनिप्रतं युवानमाहुतीवृधम् । अगन्म बिभ्रतो नमः २९
 अलाय्यस्य परशुर्ननाश त मा पवस्व देव सोम । आखुं चिदेव देव सोम
 ३०
 यः पावमानीरध्ये त्यृषिभिः संभृतं रसम् । सर्वं स पूतमश्नाति स्वदितं
 मातरिश्चना ३१
 पावमानीर्यो अध्ये त्यृषिभिः संभृतं रसम् । तस्मै सरस्वती दुहे क्षीरं
 सर्पिर्मधूदकम् ३२

चतुर्थोऽनुवाकः

। सू० ६८-८५ ।

(६८) अष्टषष्टितमं सूक्तम्

(१-१०) दशर्चस्यास्य सूक्तस्य भालन्दनो वत्सप्रिर्ऋषिः । पवमानः सोमो देवता ।

(१-६) प्रथमादिनवर्चा जगती, (१०) दशम्याश्च त्रिष्टुप् छन्दसी

प्र देवमच्छा मधुमन्त इन्दवो ऽसिष्यदन्त गाव आ न धेनवः ।
बर्हिषदौ वचनावन्त ऊर्धभिः परिस्त्रुतमुस्त्रिया निर्णिजं धिरे १
स रोर्बुवदभि पूर्वा अचिक्रद दुपारुहः श्रथयन् त्स्वादते हरिः ।
त्रिः पवित्रं परियन्नुरु ज्ञयो नि शर्याणि दधते देव आ वरम् २
वि यो म्मे यम्या संयती मदः साकंवृधा पर्यसा पिन्वदक्षिता ।
मही अपारे रजसी विवेविद दभिव्रजन्नक्षितं पाज आ ददे ३
स मातरा विचरन् वाजयन्नपः प्र मेधिरः स्वधया पिन्वते पदम् ।
अंशुर्यवैन पिपिशे यतो नृभिः सं जामिभिर्नसते रक्षते शिरः ४
सं दक्षेण मनसा जायते कवि ऋतस्य गर्भो निहितो यमा पुरः ।
यूना ह सन्ता प्रथमं वि जज्ञतु गुहा हितं जनिम् नेममुद्यतम् ५
मन्द्रस्य रूपं विविदुर्मनीषिणः श्येनो यदन्धो अभरत् परावतः ।
त मर्जयन्त सुवृधं नदीष्वाँ उशन्तमंशुं परियन्तमृग्मयम् ६
त्वां मृजन्ति दश योषणः सुतं सोम ऋषिभिर्मतिभिर्धीतिभिर्हितम् ।
अव्यो वारैभिरुत देवहूतिभिर्नृभिर्यतो वाजमा दर्षि सातयै ७
परिप्रयन्तं वृष्यं सुषंसदं सोमं मनीषा अभ्यनूषत स्तुभः ।
यो धारया मधुमाँ ऊर्मिणा दिव इयति वाचं रयिषाळमर्त्यः ८
अयं दिव इयति विश्वमा रजः सोमः पुनानः कलशेषु सीदति ।
अद्भिर्गोभिर्मृज्यते अद्रिभिः सुतः पुनान इन्दुर्वरिवो विदत् प्रियम् ९
एवा नः सोम परिषिच्यमानो वयो दधच्चित्रतमं पवस्व ।
अद्वेषे द्यावापृथिवी हुवेम देवा धत्त रयिमस्मे सुवीरम् १०

(६९) एकोनसप्ततितमं सूक्तम्

(१-१०) दशर्चस्यास्य सूक्तस्याङ्गिरसो हिरण्यस्तूप ऋषिः । पवमानः सोमो देवता

। (१-८) प्रथमाद्यष्टर्चा जगती, (९-१०) नवमीदशम्योश्च त्रिष्टुप् छन्दसी

इषुर्न धन्वन् प्रति धीयते मतिर्वत्सो न मातुरुपं सज्यूर्धनि ।
उरुधारिव दुहे अग्र आयत्यस्य वृतेष्वपि सोमं इष्यते १

उपौ मतिः पृच्यते सिच्यते मधु मन्द्रार्जनी चोदते अन्तरासनि ।
 पवमानः संतनिः प्रघ्नतामिव मधुमान् द्रुप्सः परि वारमर्षति २
 अव्ये वधूयुः पवते परि त्वचि श्रंथनीते नृमीरदितेर्भृतं यते ।
 हरिरक्रान् यजतः संयतो मदो नृम्णा शिशानो महिषो न शौभते ३
 उक्षा मिमाति प्रति यन्ति धेनवो देवस्य देवीरुपं यन्ति निष्कृतम् ।
 अत्यक्रमीदर्जुनं वारमव्य यमत्कं न नित्तं परि सोमो अव्यत ४
 अमृक्तेन रुशता वाससा हरि रमत्यो निर्णिजानः परि व्यत ।
 दिवस्पृष्टं बर्हणा निर्णिजे कृतो पुस्तरणं चम्बोर्नभस्मयम् ५
 सूर्यस्यैव रश्मयो द्रावयिषवो मत्सरासः प्रसुपः साकमीरते ।
 तन्तु ततं परि सर्गास आशवो नेन्द्रादृते पवते धाम किं चन ६
 सिन्धौरिव प्रवणे निम्न आशवो वर्षच्युता मदासो गातुमाशत ।
 शं नो निवेशे द्विपदे चतुष्पदे ऽस्मे वाजाः सोम तिष्ठन्तु कृष्टयः ७
 आ नः पवस्व वसुमद्धिरणयव दक्षावद्गोमद्यवमत् सुवीर्यम् ।
 यूयं हि सोम पितरो मम स्थनं दिवो मूर्धानः प्रस्थिता वयस्कृतः ८
 एते सोमाः पवमानास इन्द्रं रथा इव प्र ययुः सातिमच्छ ।
 सुताः पवित्रमति यन्त्यव्यं हित्वी वृषिं हरितौ वृष्टिमच्छ ९
 इन्द्रविन्द्राय बृहते पवस्व सुमृळीको अनवद्यो रिशादाः ।
 भरा चन्द्राणि गृणते वसूनि देवैर्द्यावापृथिवी प्रावतं नः १०

(७०) सप्ततितमं सूक्तम्

(१-१०) दशर्चस्यास्य सूक्तस्य वैश्वामित्रो रेणुर्ऋषिः । पवमानः सोमो देवता ।

(१-६) प्रथमादिनवर्चा जगती, (१०) दशम्याश्च त्रिष्टुप् छन्दसी
 त्रिरस्मै सप्त धेनवो दुदुहे सत्यामाशिरं पूर्व्ये व्योमनि ।
 चत्वार्यन्या भुवनानि निर्णिजे चारुणि चक्रे यदृतैरवर्धत १
 स भिक्षमाणो अमृतस्य चारुण उभे द्यावा काव्येना वि शश्रथे ।
 तेजिष्ठा अपो मंहना परि व्यत यदी देवस्य श्रवसा सदो विदुः २
 ते अस्य सन्तु केतवो ऽमृत्यवो ऽदाभ्यासो जनुषी उभे अनु ।
 येभिर्नृम्णा च देव्यां च पुनत आदिद्राजानं मनना अगृभ्णत ३
 स मृज्यमानो दशभिः सुकर्मभिः प्र मध्यमासु मातृषु प्रमे सचा ।
 वृतानि पानो अमृतस्य चारुण उभे नृचक्षा अनु पश्यते विशौ ४

स मर्मृजान इन्द्रियाय धायस ओभे अन्ता रोदसी हर्षते हितः ।
वृषा शुष्मैण बाधते वि दुर्मती रादेदिशानः शर्यहेव शरुधः ५
स मातरा न ददृशान उस्त्रियो नानददेति मरुतामिव स्वनः ।
जानन्नृतं प्रथमं यत् स्वर्णरं प्रशस्तये कर्मवृणीत सुक्रतुः ६
रुवर्ति भीमो वृषभस्तविष्यया शृङ्गे शिशानो हरिणी विचक्षणः ।
आ योनिं सोमः सुक्रतं नि षीदति गव्ययी त्वग्भवति निर्णिगव्ययी ७
शुचिः पुनानस्तन्वमरेपस मव्ये हरिन्यधाविष्ट सानवि ।
जुष्टो मित्राय वरुणाय वायवे त्रिधातु मधु क्रियते सुकर्मभिः ८
पवस्व सोम देववीतये वृषे न्द्रस्य हार्दि सोमधानमा विश ।
पुरा नो बाधाद्दुरिताति पारय क्षेत्रविद्धि दिश आहा विपृच्छते ९
हितो न सप्तिरभि वाजमर्षेन द्रस्येन्दो जठरमा पवस्व ।
नावा न सिन्धुमति पर्षि विद्वा ज्छूरो न युध्यन्नव नो निद स्पः १०

(७१) एकसप्ततितमं सूक्तम्

(१-६) नवर्चस्यास्य सूक्तस्य वैश्वामित्र ऋभव ऋषिः । पवमानः सोमो देवता ।

(१-८) प्रथमाद्यष्टर्चा जगती, (९) नवम्याश्च त्रिष्टुप् छन्दसी
आ दक्षिणा सृज्यते शष्म्याइसदं वेति द्रुहो रक्षसः पाति जागृविः ।
हरिरोपशं कृणुते नभस्पय उपस्तिरै चम्बोइर्ब्रह्म निर्णिजे १
प्र कृष्टिहेव शूष एति रोखुव दसुर्यं वणं नि रिणीते अस्य तम् ।
जहाति वृत्रं पितुरैति निष्कृत मुपप्रुतं कृणुते निर्णिजं तना २
अद्रिभिः सुतः पवते गर्भस्त्यो वृषायते नभसा वेपते मृती ।
स मोदते नसते साधते गिरा नैनिक्ते अप्सु यजते परीमणि ३
परि द्युक्षं सहसः पर्वतावृधं मध्वः सिञ्चन्ति हर्म्यस्य सक्षणिम् ।
आ यस्मिन् गावः सुहुताद् ऊर्धनि मूर्धञ्छुचफट्टीणन्त्यग्रियं वरीमभिः ४
समी रथं न भुरिजौरहेषत् दश स्वसौरो अदितेरुपस्थ आ ।
जिगादुपे जयति गोरपीच्यं पदं यदस्य मृतुथा अजीजनन् ५
श्येनो न योनिं सदनं धिया कृतं हिरण्ययमासदं देव एषति ।
ए रिणन्ति ब्रिर्हिषि प्रियं गिरा ऽश्वो न देवाँ अप्येति यज्ञियः ६
परा व्यक्तो अरुषो दिवः कवि वृषा त्रिपृष्ठो अनविष्ट गा अभि ।
सहस्रणीतिर्यतिः परायती रेभो न पूर्वीरुषसो वि राजति ७

त्वेषं रूपं कृणुते वर्णो अस्य स यत्राशयत् समृता सेधति स्त्रिधः ।
 अप्सा याति स्वधया दैव्यं जनं सं सुष्टुती नसते सं गोअग्रया ८
 उक्षेव यूथा परियन्नरावी दधि त्विर्षीरधित् सूर्यस्य ।
 दिव्यः सुपर्णोऽव चक्षत् क्षां सोमः परि क्रतुना पश्यते जाः ९

(७२) द्विसप्ततितमं सूक्तम्

(१-६) नवर्चस्यास्य सूक्तस्याङ्गिरसो हरिमन्त ऋषिः । पवमानः सोमो देवता ।

जगती छन्दः

हरिं मृजन्त्यरुषो न युज्यते सं धेनुभिः कलशे सोमो अज्यते ।
 उद्वाचमीरयति हिन्वते मृती पुरुष्टुतस्य कर्ति चित् परिप्रियः १
 साकं वेदन्ति ब्रह्मवो मनीषिण इन्द्रस्य सोमं जठरे यदादुहुः ।
 यदी मृजन्ति सुगभस्तयो नरः सनीळाभिर्दशभिः काम्यं मधु २
 अरममाणो अत्यैति गा अभि सूर्यस्य प्रियं दुहितुस्तिरो रवम् ।
 अन्वस्मै जोषमभरद्विनंगृसः सं द्वयीभिः स्वसृभिः क्षेति जामिभिः ३
 नृधूतो अद्रिषुतो बर्हिषि प्रियः पतिर्गवां प्रदिव इन्दुर्भृत्वियः ।
 पुरन्धिवान् मनुषो यज्ञसाधनः शुचिर्धिया पवते सोम इन्द्र ते ४
 नृबाहुभ्यां चोदितो धारया सुतो ऽनुष्वधं पवते सोम इन्द्र ते ।
 आप्राः क्रतून् त्समजैरध्वरे मृती वेर्न दुषञ्चम्बोऽरासदुद्धरिः ५
 अंशं दुहन्ति स्तनयन्तमक्षितं कविं कवयोऽपसो मनीषिणः ।
 समी गावो मृतयो यन्ति संयतं ऋतस्य योना सदने पुनर्भुवः ६
 नाभा पृथिव्या धरुणो महो दिवोऽपामूर्मो सिन्धुष्वन्तरुक्षितः ।
 इन्द्रस्य वज्रो वृषभो विभूर्वसुः सोमो हृदे पवते चारु मत्सरः ७
 स तू पवस्व परि पार्थिवं रजैः स्तोत्रे शिक्तीन्नाधून्वते च सुक्रतो ।
 मा नो निर्भाग्वसुनः सादनस्पृशो रयिं पिशङ्गं बहुलं वसीमहि ८
 आ तू न इन्दो शतदात्वश्चयं सहस्रदातु पशमद्विरशयवत् ।
 उप मास्व बृहती रेवतीरिषो ऽधि स्तोत्रस्य पवमान नो गहि ९

(७३) त्रिसप्ततितमं सूक्तम्

(१-६) नवर्चस्यास्य सूक्तस्याङ्गिरसः पवित्र ऋषिः । पवमानः सोमो देवता ।

जगती छन्दः

स्रक्वे द्रुप्सस्य धर्मतः समस्वर नृतस्य योना समरन्त नाभयः ।
 त्रीन् त्स मूर्ध्नो असुरश्चक्र आरभै सत्यस्य नावः सुकृतमपीपरन् १
 सम्यक् सम्यञ्चो महिषा अहेषत् सिन्धौरूर्मावर्धि वेना अवीविपन् ।
 मधोर्धाराभिर्जनयन्तो अर्कमित् प्रियामिन्द्रस्य तन्वमवीवृधन् २
 पवित्रवन्तः परि वार्चमासते पितैर्षा प्रतो अभि रक्षति वृतम् ।
 महः समुद्रं वरुणस्तिरो दधे धीरा इच्छैकुर्धरुणेष्वारभम् ३
 सहस्रधारेऽव ते समस्वरन् दिवो नाके मधुजिह्वा असञ्चतः ।
 अस्य स्पशो न नि मिषन्ति भूर्णयः पुदेपदे पाशिनः सन्ति सेतवः ४
 पितुर्मातुरध्या ये समस्वर नृचा शोचन्तः संदहन्तो अवृतान् ।
 इन्द्रद्विष्टामप धमन्ति मायया त्वचमसिक्नीं भूमनो दिवस्परि ५
 प्रतान्मानादध्या ये समस्वर ञ्छलोकयनत्रासो रभसस्य मन्तवः ।
 अपान्नासौ बधिरा अहासत ऋतस्य पनथां न तरन्ति दुष्कृतः ६
 सहस्रधारे वितते पवित्र आ वार्च पुनन्ति कवयो मनीषिणः ।
 रुद्रास एषामिषिरासौ अद्रुहः स्पशः स्वञ्चः सुदृशौ नृचक्षसः ७
 ऋतस्य गोपा न दभाय सुक्रतु स्त्री ष पवित्रो हृद्यन्तरा दधे ।
 विद्वान् त्स विश्वा भुवनाभि पश्य त्यवाजुष्टान् विध्यति कर्ते अवृतान् ८
 ऋतस्य तन्तुर्विततः पवित्र आ जिह्वाया अग्रे वरुणस्य मायया ।
 धीराश्चित् तत् समिनक्षन्त आशताऽत्रा कर्तमव पदात्यप्रभुः ९

(७४) चतुःसप्ततितमं सूक्तम्

(१-६) नवर्चस्यास्य सूक्तस्य दैर्घतमसः कक्षीवान् ऋषिः । पवमानः सोमो देवता
 । (१-७, ६) प्रथमादिसप्तर्चा नवम्याश्च जगती, (८) अष्टम्याश्च त्रिष्टुप् छन्दसी
 शिशर्न जातोऽव चक्रदद्वने स्वर्श्यद्वाज्यरुषः सिषासति ।
 दिवो रेतसा सचते पयोवृधा तमीमहे सुमती शर्म सप्रथः १
 दिवो यः स्कम्भो धरुणः स्वातत आपूर्णो अंशुः पर्येति विश्वतः ।
 सेमे मही रोदसी यक्षदावृता समीचीने दाधार समिषः कविः २
 महि प्सरः सुकृतं सोम्यं मधू र्वी गव्यूतिरदितेऋतं यते ।
 ईशे यो वृष्टेरित उस्त्रियो वृषा ऽपां नेता य इतऊतिऋग्मियः ३
 आत्मन्वन्नभौ दुह्यते घृतं पर्य ऋतस्य नाभिरमृतं वि जायते ।
 समीचीनाः सुदानवः प्रीणन्ति तं नरो हितमव मेहन्ति परवः ४

अरावीदंशुः सचमान ऊर्मिणा देवाव्यंश् मनुषे पिन्वति त्वचम् ।
 दधाति गर्भमदितेरुपस्थ आ येन तोकं च तनयं च धामहे ५
 सहस्रंधारेऽव ता असश्चत स्तृतीयै सन्तु रजसि प्रजावतीः ।
 चतस्रो नाभो निहिता अबो दिवो हविर्भरन्त्यमृतं घृतश्चुतः ६
 श्वेतं रूपं कृणुते यत् सिषासति सोमो मीढ्वाँ असुरो वेद् भूमनः ।
 धिया शमी सचते सेमभि प्रवद् दिवस्क्वन्धमव दर्षदुद्रिणम् ७
 अर्धं श्वेतं कलशं गोभिरक्तं कार्ष्णन्ना वाज्यक्रमीत् सस्वान् ।
 आ हिन्विरे मनसा देवयन्तः कक्षीवते शतहिमायु गोनाम् ८
 अब्धिः सोम पृचानस्य ते रसो ऽव्यो वारं वि पवमान धावति ।
 स मृज्यमानः कविभिर्मदिन्तम् स्वदस्वेन्द्राय पवमान पीतयै ९

(७५) पञ्चसप्ततितमं सूक्तम्

(१-५) पञ्चर्चस्यास्य सूक्तस्य भार्गवः कविर्ऋषिः । पवमानः सोमो देवता ।

जगती छन्दः

अभि प्रियाणि पवते चनोहितो नामानि युहो अधि येषु वर्धते ।
 आ सूर्यस्य बृहतो बृहन्नधि रथं विष्वञ्चमरुहद्विचक्षणः १
 ऋतस्य जिह्वा पवते मधु प्रियं वक्ता पतिर्धियो अस्या अदाभ्यः ।
 दधाति पुत्रः पित्रोरपीच्यंश् नामं तृतीयमधि रोचने दिवः २
 अव द्युतानः कलशाँ अचिक्रद् नृभिर्येमानः कोश आ हिरण्ययै ।
 अभीमृतस्य दोहना अनूषता ऽधि त्रिपृष्ठ उषसो वि राजति ३
 अर्द्रिभिः सुतो मतिभिश्चनोहितः प्ररोचयन् रोदसी मात्रा शुचिः ।
 रोमाण्यव्याँ समया वि धावति मधोर्धारा पिन्वमाना दिवेदिवे ४
 परि सोम प्र धन्वा स्वस्तये नृभिः पुनानो अभि वासयाशिरम् ।
 ये ते मदा आहनसो विहायस स्तेभिरिन्द्रं चोदयु दातवे मघम् ५
 तृतीयोऽध्यायः

। व० १-२६ ।

(७६) षट्सप्ततितमं सूक्तम्

(१-५) पञ्चर्चस्यास्य सूक्तस्य भार्गवः कविर्ऋषिः । पवमानः सोमो देवता ।

जगती छन्दः

धर्ता दिवः पवते कृत्वो रसो दत्तौ देवानामनुमाद्यो नृभिः ।
हरिः सृजानो अत्यो न सत्वभिर्वृथा पाजांसि कृणुते नदीष्व १
शूरो न धत्त आयुधा गभस्त्योः स्वशः सिषासन् रथिरो गर्विष्ठिषु ।
इन्द्रस्य शुष्ममीरयन्नपस्युभि रिन्दुर्हिन्वानो अज्यते मनीषिभिः २
इन्द्रस्य सोम पवमान ऊर्मिणां तविष्यमाणो जठरेष्व विश ।
प्र णाः पिन्व विद्युदध्रेव रोदसी धिया न वाजाँ उपे मासि शश्वतः ३
विश्वस्य राजा पवते स्वर्दृशं ऋतस्य धीतिमृषिषाळवीवशत् ।
यः सूर्यस्यासिरेण मृज्यते पिता मतीनामसमष्टकाव्यः ४
वृषैव यूथा परि कोशमर्ष स्यपामुपस्थे वृषभः कर्निक्रदत् ।
स इन्द्राय पवसे मत्सरिन्तौ यथा जेषाम समिथे त्वोतयः ५

(७७) सप्तसप्ततितमं सूक्तम्

(१-५) पञ्चर्चस्यास्य सूक्तस्य भार्गवः कविर्ऋषिः । पवमानः सोमो देवता ।

जगती छन्दः

एष प्र कोशे मधुमाँ अचिक्रद् दिन्द्रस्य वज्रो वपुषो वपुष्टरः ।
अभीमृतस्य सुदुघा घृतश्चुतो वाश्रा अर्षन्ति पर्यसेव धेनवः १
स पूर्व्यः पवते यं दिवस्परि श्येनो मथायदिषितस्तिरो रजः ।
स मध्व आ युवते वेर्विजान इत् कृशानोरस्तुर्मनसाहं बिभ्युषा २
ते नः पूर्वास उपरास इन्दवो महे वाजाय धन्वन्तु गोमते ।
ईक्षेण्यासो अह्योर्इ न चारवो ब्रह्मब्रह्म ये जुजुषुर्हविर्विः ३
अयं नो विद्वान् वेनवद्वनुष्यत इन्दुः सत्राचा मनसा पुरुष्टतः ।
इनस्य यः सदेने गर्भमादधे गर्वामुरुब्जमभ्यर्षति वृजम् ४
चक्रिर्दिवः पवते कृत्वो रसो महाँ अदब्धो वरुणो हुरुग्यते ।
असावि मित्रो वृजनैषु यज्ञियो ऽत्यो न यूथे वृषयुः कर्निक्रदत् ५

(७८) अष्टसप्ततितमं सूक्तम्

(१-५) पञ्चर्चस्यास्य सूक्तस्य भार्गवः कविर्ऋषिः । पवमानः सोमो देवता ।

जगती छन्दः

प्र राजा वाचं जनयन्नसिष्यद् दुपो वसानो अभि गा इयक्षति ।
गृष्णाति रिप्रमविरस्य तान्वां शुद्धो देवानामुप याति निष्कृतम् १

इन्द्राय सोमं परि षिच्यसे नृभिर्नृचक्षा ऊर्मिः कविरज्यसे वने ।
 पूर्वीर्हि ते स्तुतयुः सन्ति यातवे सहस्रमश्वा हरयश्चमूषदः २
 समुद्रिया अप्सरसौ मनीषिणा मासीना अन्तरभि सोममक्षरन् ।
 ता ई हिन्वन्ति हर्म्यस्य सक्षणिं याचन्ते सुम्रं पवमानमक्षितम् ३
 गोजिन्नः सोमो रथजिद्धिरणयजित् स्वर्जिदब्जित् पवते सहस्रजित् ।
 यं देवासश्चक्रिरे पीतये मदं स्वादिष्टं द्रप्समरुणं मयोभुवम् ४
 एतानि सोमं पवमानो अस्मयुः सत्यानि कृणवन् द्रविणान्यर्षसि ।
 जहि शत्रुमन्तिके दूरके च य उर्वी गव्यूतिमभयं च नस्कृधि ५

(७६) एकोनाशीतितमं सूक्तम्

(१-५) पञ्चर्चस्यास्य सूक्तस्य भार्गवः कविर्ऋषिः । पवमानः सोमो देवता ।

जगती छन्दः

अचोदसौ नो धन्वन्त्वन्देवः प्र सुवानासौ बृहदिवेषु हरयः ।
 वि च नशन् न इषो अरातयो ऽर्यो नशन्त सनिषन्त नो धियः १
 प्र णौ धन्वन्त्वन्देवो मदच्युतो धना वा येभिरर्वतो जुनीमसि ।
 तिरो मर्तस्य कस्य चित् परिह्वति वयं धनानि विश्वधा भरेमहि २
 उत स्वस्या अरात्या अरिर्हि ष उतान्यस्या अरात्या वृको हि षः ।
 धन्वन् न तृष्णा समरीत तां अभि सोमं जहि पवमान दुराध्यः ३
 दिवि ते नाभा परमो य आददे पृथिव्यास्तै रुरुहुः सान्वि क्षिप ।
 अद्रयस्त्वा बप्सति गोरधि त्व च्येप्सु त्वा हस्तैर्दुदुहर्मनीषिणः ४
 एवा त इन्दो सुभ्वं सुपेशसं रसं तुञ्जन्ति प्रथमा अभिश्रियः ।
 निर्दनिदं पवमानं नि तारिष आविस्ते शुष्मो भवतु प्रियो मदः ५

(८०) अशीतितमं सूक्तम्

(१-५) पञ्चर्चस्यास्य सूक्तस्य भारद्वाजो वसुर्ऋषिः । पवमानः सोमो देवता ।

जगती छन्दः

सोमस्य धारा पवते नृचक्षस ऋतेन देवान् हवते दिवस्परि ।
 बृहस्पते र्वथैना वि दिद्युते समुद्रासो न सर्वनानि विव्यचुः १
 यं त्वा वाजिन्नघ्न्या अभ्यनूषता ऽर्योहतं योनिमा रोहसि द्युमान् ।

म॒घोना॒मायुः॑ प्र॒तिर॑न् म॒हि श्र॒व इन्द्रा॑य सोम पवसे वृषा म॒दः २
 एन्द्र॑स्य कु॒क्षा प॑वते म॒दिन्त॑म् ऊ॒र्ज व॑सानुः श्रव॑से सु॒मङ्ग॑लः ।
 प्र॒त्यङ् स॑ वि॒श्वा भु॑र्वना॒भि प॑प्रथे क्री॒ळन् ह॑रि॒रत्यः॑ स्यन्दते वृषा ३
 तं त्वा॑ दे॒वेभ्यो॑ म॒धुम॑त्त॒मं नरः॑ स॒हस्र॑धारं दु॒हते॑ द॒श क्षि॑पः ।
 नृ॒भिः सो॒म प्र॑च्युतो॒ ग्राव॑भिः सु॒तो वि॒श्वान् दे॒वाँ आ॑ प॒वस्वा॑ सहस्रजित् ४
 तं त्वा॑ ह॒स्ति॒नो म॑धु॒मन्त॑म॒द्रिभि॑ दु॒हन्त्य॑प्सु वृष॒भं द॑श क्षि॒पः ।
 इन्द्र॑ सोम मा॒दय॑न् दै॒व्यं ज॑नं सि॒न्धौरि॑वो॒र्मिः प॑र्व॒मानो॑ अ॒र्षसि ५

(८१) एकाशीतितमं सूक्तम्

(१-५) पञ्चर्चस्यास्य सूक्तस्य भारद्वाजो वसु॒र्ऋषिः॑ । पवमानः सोमो देवता ।
 (१-४) प्रथमादिचतुर्ऋचां जगती, (५) पञ्चम्याश्च त्रिष्टुप् छन्दसी
 प्र सोम॑स्य प॒र्व॒मान॑स्यो॒र्मय॑ इन्द्र॑स्य यन्ति ज॒ठरं॑ सु॒पेश॑सः ।
 द॒ध्ना यदी॑मु॒न्नीता॑ य॒शसा॑ ग॒वां दाना॑य शूर॑मु॒दम॑न्दिषुः सु॒ताः १
 अ॒च्छा हि॑ सोमः क॒लशाँ॑ अ॒सिष्य॑द् द॒त्यो न॑ वोळ॒हा र॒घुव॑र्त॒निर्वृ॑षा ।
 अ॒र्था दे॒वाना॑मु॒भय॑स्य ज॒न्म॑नो वि॒द्वाँ अ॒श्नो॑त्य॒मुत॑ इ॒तश्च॑ यत् २
 आ नः॑ सो॒म प॑र्व॒मानः॑ कि॒रा व॑स्वि॒न्दो भ॑र्व॒म॒घवा॑ रा॒धसो॑ म॒हः ।
 शि॒क्षा व॑यो॒धो व॑स॒वे सु॑ चे॒तुना॑ मा नो ग॒यमा॑रे अ॒स्मत् परा॑ सि॒चः ३
 आ नः॑ पू॒षा प॑र्व॒मानः॑ सु॒रात॑यो॒ मित्रो॑ ग॒च्छन्तु॑ वरु॒णः स॒जोष॑सः ।
 बृ॒हस्प॑र्ति॒र्मरु॑तो वा॒युर॑श्चि॒ना त्व॑ष्टा॒ सवि॑ता सु॒यमा॑ सर॑स्वती ४
 उ॒भे द्या॑वा॒पृथि॑वी वि॒श्वमि॑न्वे अ॒र्य॑मा दे॒वो अ॑दि॒तिर्वि॑धा॒ता ।
 भ॒गो नृ॑शांस॒ उ॒र्व॑न्त॒रि॒क्षं वि॑श्वे दे॒वाः प॑र्व॒मानं॑ जुषन्त ५

(८२) द्व्यशीतितमं सूक्तम्

(१-५) पञ्चर्चस्यास्य सूक्तस्य भारद्वाजो वसु॒र्ऋषिः॑ । पवमानः सोमो देवता ।
 (१-४) प्रथमादिचतुर्ऋचां जगती, (५) पञ्चम्याश्च त्रिष्टुप् छन्दसी
 अ॒सावि॑ सोमो अ॒रुषो॑ वृषा ह॒री राजै॑व द॒स्मो अ॒भि गा॑ अ॒चि॒क्रद॑त् ।
 पु॒नानो॑ वा॒रं प॑र्ये॒त्यव्य॑र्यं श्ये॒नो न॑ योनिं घृ॒तव॑न्त॒मास॑दम् १
 क॒विर्वे॑ध॒स्या प॑र्ये॒षि मा॑हि॒न् म॒त्यो न॑ मृ॒ष्टो अ॒भि वा॑ज॒मर्ष॑सि ।
 अ॒प॒सेध॑न् दु॒रिता॑ सौ॒म मृ॑ळ॒य घृ॑तं व॒सानुः॑ परि॒ यासि॑ नि॒र्णिज॑म् २
 प॒र्जन्यः॑ पि॒ता म॑हि॒षस्य॑ प॒र्णि॒नो ना॑भा॒ पृथि॑व्या गि॒रिषु॑ क्ष॒यं द॑धे ।

स्वसार आपो अभि गा उतासरन् त्सं ग्रावभिर्नसते वीते अर्ध्वरे ३
जायेव पत्यावधि शेव मंहसे पजाया गर्भ शृणुहि ब्रवीमि ते ।
अन्तर्वाणीषु प्र चरा सु जीवसे ऽनिनद्यो वृजनै सोम जागृहि ४
यथा पूर्वेभ्यः शतसा अमृधः सहस्रसाः पर्यया वाजमिन्दो ।
एवा पवस्व सुविताय नव्यसे तव व्रतमन्वापः सचन्ते ५

(८३) त्र्यशीतितमं सूक्तम्

(१-५) पञ्चर्चस्यास्य सूक्तस्याङ्गिरसः पवित्र ऋषिः । पवमानः सोमो देवता ।
जगती छन्दः

पवित्रं ते विततं ब्रह्मणस्पते प्रभुर्गात्राणि पर्येषि विश्वतः ।
अतप्ततनूर्न तदामो अश्नुते शृतास इद्वहन्तस्तत् समाशत १
तपोष्पवित्रं विततं दिवस्पदे शोचन्तो अस्य तन्तवो व्यस्थिरन् ।
अर्वन्त्यस्य पवीतारमाशवो दिवस्पृष्ठमधि तिष्ठन्ति चेतसा २
अरूरुचदुषसः पृश्नरग्रिय उक्षा बिभर्ति भुवनानि वाजयुः ।
मायाविनो ममिरे अस्य मायया नृचक्षसः पितरो गर्भमा दधुः ३
गन्धर्व इत्था पदमस्य रक्षति पार्ति देवानां जनिमान्यद्भुतः ।
गृष्णार्ति रिपुं निधया निधापतिः सुकृत्तमा मधुनो भक्षमाशत ४
हविर्हविष्मो महि सद्य दैव्यं नभो वसानुः परि यास्यध्वरम् ।
राजा पवित्ररथो वाजमारुहः सहस्रभृष्टिर्जयसि श्रवो बृहत् ५

(८४) चतुरशीतितमं सूक्तम्

(१-५) पञ्चर्चस्यास्य सूक्तस्य वाच्यः प्रजापतिर्ऋषिः । पवमानः सोमो देवता ।
जगती छन्दः

पवस्व देवमार्दनो विचर्षणि रप्सा इन्द्राय वरुणाय वायवे ।
कृधी नो अद्य वरिवः स्वस्तिम दुरुक्षितौ गृणीहि दैव्यं जनम् १
आ यस्तस्थौ भुवनान्यमर्त्यो विश्वानि सोमः परि तान्यर्षति ।
कृणवन् त्संचृतं विचृतमभिष्टय इन्दुः सिषक्त्युषसं न सूर्यः २
आ यो गोभिः सृज्यत ओषधीष्वा देवानां सुम्न इषयन्नुपावसुः ।
आ विद्युता पवते धारया सुत इन्द्रं सोमो मादयन् दैव्यं जनम् ३
एष स्य सोमः पवते सहस्रजि द्विन्वानो वाचमिषिरामुषुर्बुधम् ।

इन्दुः समुद्रमुदियति वायुभि रेन्द्रस्य हार्दि कलशेषु सीदति ४
अभि त्यं गावः पयसा पयोवृधं सोमं श्रीणन्ति मृतिभिः स्वर्विदम् ।
धनंजयः पवते कृत्वो रसो विप्रः कविः काव्येना स्वर्चनाः ५

(८५) पञ्चाशीतितमं सूक्तम्

(१-१२) द्वादशर्चस्यास्य सूक्तस्य भार्गवो वेन ऋषिः । पवमानः सोमो देवता ।
(१-१०) प्रथमादिदशर्चा जगती, (११-१२) एकादशीद्वादशयोश्च त्रिष्टुप् छन्दसी
इन्द्राय सोम सुषुतः परि स्रवाऽपामीवा भवतु रक्षसा सह ।
मा ते रसस्य मत्सत द्वयाविनो द्रविणस्वन्त इह सन्त्विन्दवः १
अस्मान् त्समर्ये पवमान चोदय दक्षो देवानामसि हि प्रियो मर्दः ।
जहि शत्रूरभ्या भन्दनायतः पिबेन्द्र सोममर्वा नो मृधौ जहि २
अदध इन्दो पवसे मदिन्तम आत्मेन्द्रस्य भवसि धासिरुत्तमः ।
अभि स्वरन्ति ब्रहवो मनीषिणो राजानमस्य भुवनस्य निंसते ३
सहस्रणीथः शतधारो अद्भुत इन्द्रायेन्दुः पवते काम्यं मधु ।
जयन् क्षेत्रमभ्यर्षा जयन्नप उरुं नो गातुं कृणु सोम मीद्वः ४
कनिक्रदत् कलशे गोभिरज्यसे व्यश्वययं समया वारमर्षसि ।
मर्मृज्यमानो अत्यो न सानसि रिन्द्रस्य सोम जठरे समक्षरः ५
स्वादुः पवस्व दिव्याय जन्मने स्वादुरिन्द्राय सुहवीतुनाम्ने ।
स्वादुर्मित्राय वरुणाय वायवे बृहस्पतये मधुमा अदाभ्यः ६
अत्यं मृजन्ति कलशे दश क्षिपः प्र विप्राणां मृतयो वाच ईरते ।
पवमाना अभ्यर्षन्ति सुष्टति मेन्द्रं विशन्ति मदिरास इन्दवः ७
पवमानो अभ्यर्षा सुवीर्ये मुर्वी गव्यूतिं महि शर्म सप्रथः ।
मार्किर्नो अस्य परिषूतिरीशते न्दो जयैम त्वया धनं धनम् ८
अधि द्यामस्थादृषभो विचक्ष्णो ऽरुरुचद्वि दिवो रौचना कविः ।
राजा पवित्रमत्यैति रोरुवद् दिवः पीयूषं दुहते नृचक्षसः ९
दिवो नाके मधुजिह्वा असञ्चतौ वेना दुहन्त्युक्षरं गिरिष्ठाम् ।
अप्सु द्रप्सं वावृधानं समुद्र आ सिन्धौरूमा मधुमन्तं पवित्र आ १०
नाके सुपर्णमुपपत्तिवांसं गिरो वेनानामकृपन्त पूर्वीः ।
शिशं रिहन्ति मृतयः पनिप्रतं हिरण्ययं शकुनं क्षामणि स्थाम् ११
ऊर्ध्वो गन्धर्वो अधि नाके अस्थाद् विश्वा रूपा प्रतिचक्ष्णो अस्य ।

भानुः शुक्रेण शोचिषा व्यद्यौत् प्रारूरुचद्रोदसी मात्रा शुचिः १२
पञ्चमोऽनुवाकः
। सू० ८६-९६ ।

(८६) षडशीतितमं सूक्तम्

(१-४८) अष्टचत्वारिंशदृचस्यास्य सूक्तस्य (१-१०) प्रथमादिदशर्चामकृष्टा
माषाः, (११-२०) एकादश्यादिदशानां सिकता निवावरी, (२१-३०)
एकविंश्यादिदशानां पृश्नयोऽजाः, (३१-४०) एकत्रिंश्यादिदशानामत्रेयः, (४१-
४५) एकचत्वारिंश्यादिपञ्चानां भौमोऽत्रिः, (४६-४८) षट्चत्वारिंश्यादितृचस्य च
भार्गवः शौनको गृत्समद ऋषयः । पवमानः सोमो देवता । जगती छन्दः
प्र त आशवः पवमान धीजवो मदा अर्षन्ति रघुजा इव त्मना ।
दिव्याः सुपर्णा मधुमन्त इन्दवो मदिन्तमासः परि कोशमासते १
प्र ते मदासो मदिरास आशवो ऽसृक्षत रथ्यासो यथा पृथक् ।
धेनुर्न वत्सं पर्यसाभि वज्रिण मिन्द्रमिन्दवो मधुमन्त ऊर्मयः २
अत्यो न हियानो अभि वाजमर्ष स्वर्वित् कोशं दिवो अद्रिमातरम् ।
वृषा पवित्रे अधि सानो अव्यये सोमः पुनान इन्द्रियाय धार्यसे ३
प्र त आश्विनीः पवमान धीजुवो दिव्या असृगृन् पर्यसा धरीमणि ।
प्रान्तर्षयः स्थाविरीरसृक्षत ये त्वा मृजन्त्यृषिषाण वेधसः ४
विश्वा धामानि विश्वचक्ष ऋभ्वसः प्रभोस्ते सतः परि यन्ति केतवः ।
व्यानशिः पवसे सोम धर्मभिः पतिर्विश्वस्य भुवनस्य राजसि ५
उभयतः पवमानस्य रश्मयो ध्रुवस्य सतः परि यन्ति केतवः ।
यदी पवित्रे अधि मृज्यते हरिः सत्ता नि योना कलशेषु सीदति ६
यज्ञस्य केतुः पवते स्वध्वरः सोमो देवानामुप याति निष्कृतम् ।
सहस्रधारः परि कोशमर्षति वृषा पवित्रमत्यैति रोरुवत् ७
राजा समुद्रं नद्योर् वि गाहते ऽपामूर्मि संचते सिन्धुषु श्रितः ।
अध्यस्थात् सानु पवमानो अव्ययं नाभा पृथिव्या धरुणो महो दिवः ८
दिवो न सानु स्तनयन्नचिक्रदद् द्यौश्च यस्य पृथिवी च धर्मभिः ।
इन्द्रस्य सख्यं पवते विवेविदत् सोमः पुनानः कलशेषु सीदति ९
ज्योतिर्यज्ञस्य पवते मधु प्रियं पिता देवानां जनिता विभूर्वसुः ।
दधाति रत्नं स्वधयौरपीच्यं मदिन्तमो मत्सर इन्द्रियो रसः १०

अभिक्रन्दन् कलशं वाज्यर्षति पतिर्दिवः शतधारो विचक्षणः ।
 हरिर्मित्रस्य सदानेषु सीदति मर्मज्ञानोऽविभिः सिन्धुभिर्वृषा ११
 अग्रे सिन्धूनां पर्वमानो अर्षत्यग्रे वाचो अग्रियो गोषु गच्छति ।
 अग्रे वाजस्य भजते महाधनं स्वायुधः सोतृभिः पूयते वृषा १२
 अयं मृतवाञ्छकुनो यथा हितो ऽव्यै ससार पर्वमान ऊर्मिणा ।
 तव क्रत्वा रोदसी अन्तरा कवे शुचिर्धिया पवते सोम इन्द्र ते १३
 द्रापिं वसानो यजतो दिविस्पृशं मन्तरिक्षप्रा भुवनेष्वर्पितः ।
 स्वर्जज्ञानो नभसाभ्यक्रमीत् प्रत्नस्य पितरमा विवासति १४
 सो अस्य विशे महि शर्म यच्छति यो अस्य धामं प्रथमं व्यानशे ।
 पदं यदस्य परमे व्योमन् यतो विश्वा अभि सं याति संयतः १५
 प्रो अयासीदिन्दुरिन्द्रस्य निष्कृतं सखा सख्युर्न प्र मिनाति संगिरम् ।
 मर्य इव युवतिभिः समर्षति सोमः कलशे शतयाम्ना पथा १६
 प्र वो धियो मन्द्रयुवो विपन्युवः पनस्युवः संवसनेष्वक्रमुः ।
 सोमं मनीषा अभ्यनूषत् स्तुभो ऽभि धेनवः पर्यसेमशिश्रयुः १७
 आ नः सोम संयतं पिप्युषीमिष मिन्दो पर्वस्व पर्वमानो अस्त्रिधम् ।
 या नो दोहते त्रिरहन्नसंश्रुषी क्षुमद्वाजवन्मधुमत् सुवीर्यम् १८
 वृषा मतीनां पवते विचक्षणः सोमो अहः प्रतरीतोषसो दिवः ।
 क्राणा सिन्धूनां कलशां अवीवश दिन्द्रस्य हाद्याविशन् मनीषिभिः १९
 मनीषिभिः पवते पूर्यः कवि नृभिर्यतः परि कोशां अचिक्रदत् ।
 त्रितस्य नाम जनयन् मधु क्षरदिन्द्रस्य वायोः सख्याय कर्तवे २०
 अयं पुनान उषसो वि रौचय द्यं सिन्धुभ्यो अभवदु लोककृत् ।
 अयं त्रिः सप्त दुदुहान आशिरं सोमो हृदे पवते चारु मत्सरः २१
 पर्वस्व सोम दिव्येषु धामसु सृजान इन्दो कलशे पवित्र आ ।
 सीदन्नन्द्रस्य जठरे कनिक्रद नृभिर्यतः सूर्यमारौहयो दिवि २२
 अद्रिभिः सुतः पवसे पवित्र आँ इन्द्रविन्द्रस्य जठरैष्वाविशन् ।
 त्वं नृचक्षा अभवो विचक्षण सोमं गोत्रमङ्गिरोभ्योऽवृणोरप २३
 त्वां सौम पर्वमानं स्वाध्यो ऽनु विप्रासो अमदन्नवस्यवः ।
 त्वां सुपर्ण आभरद् दिवस्परीन्दो विश्वाभिर्मतिभिः परिष्कृतम् २४
 अव्यै पुनानं परि वारं ऊर्मिणा हरिं नवन्ते अभि सप्त धेनवः ।
 अपामुपस्थे अध्यायवः कवि मृतस्य योनां महिषा अहेषत २५

इन्दुः पुनानो अति गाहते मृधो विश्वानि कृणवन् त्सुपथानि यज्यवे ।
 गाः कृणवानो निर्गिर्ज ह्यतः कवि रत्यो न क्रीळन् परि वारमर्षति २६
 असश्चतः शतधारा अभिश्रियो हरिं नवन्तेऽव ता उद्वन्युवः ।
 क्षिपौ मृजन्ति परि गोभिरावृतं तृतीयै पृष्ठे अधि रोचने दिवः २७
 तवेमाः प्रजा दिव्यस्य रेतसु स्त्वं विश्वस्य भुवनस्य राजसि ।
 अथेदं विश्वं पवमान ते वशे त्वमिन्दो प्रथमो धाम्धा असि २८
 त्वं समुद्रो असि विश्ववित् कवे तवेमाः पञ्च प्रदिशो विधर्मणि ।
 त्वं द्यां च पृथिवीं चाति जभ्रिषे तव ज्योतीषि पवमान सूर्यः २९
 त्वं पवित्रे रजसो विधर्मणि देवेभ्यः सोम पवमान पूयसे ।
 त्वामुशिजः प्रथमा अगृभ्णात् तुभ्येमा विश्वा भुवनानि येमिरे ३०
 प्र रेभ एत्यति वारमव्ययं वृषा वनेष्वव चक्रदद्धरिः ।
 सं धीतयो वावशाना अनूषत् शिशं रिहन्ति मृतयः पनिप्रतम् ३१
 स सूर्यस्य रश्मिभिः परि व्यत् तन्तुं तन्वानस्त्रिवृतं यथा विदे ।
 नयन्नृतस्य प्रशिषो नवीयसीः पतिर्जनीनामुप याति निष्कृतम् ३२
 राजा सिन्धूनां पवते पतिर्दिव अतस्य याति पृथिभिः कनिक्रदत् ।
 सहस्रधारः परि षिच्यते हरिः पुनानो वाचं जनयन्नुपावसुः ३३
 पवमान मह्यर्णो वि धावसि सूरौ न चित्रो अव्ययानि पव्यया ।
 गर्भस्तिपूतो नृभिरद्रिभिः सुतो महे वाजाय धन्याय धन्वसि ३४
 इषमूर्जं पवमानाभ्यर्षसि श्येनो न वंसु कलशेषु सीदसि ।
 इन्द्राय मद्वा मद्यो मदः सुतो दिवो विष्टम्भ उपमो विचक्षणः ३५
 सप्त स्वसारो अभि मातरः शिशं नवं जज्ञानं जेन्यं विपश्चितम् ।
 अपां गन्धर्वं दिव्यं नृचक्षसं सोमं विश्वस्य भुवनस्य राजसे ३६
 ईशान इमा भुवनानि वीर्यसे युजान इन्दो हरितः सुपर्यः ।
 तास्तै क्षरन्तु मधुमद्घृतं पयस्तव वृते सौम तिष्ठन्तु कृष्टयः ३७
 त्वं नृचक्षा असि सोम विश्वतः पवमान वृषभ ता वि धावसि ।
 स नः पवस्व वसुमद्धिरण्यवद् वयं स्याम भुवनेषु जीवसे ३८
 गोवित् पवस्व वसुविद्धिरण्यविद् रेतोधा इन्दो भुवनेष्वर्षितः ।
 त्वं सुवीरौ असि सोम विश्ववित् तं त्वा विप्रा उप गिरेम आसते ३९
 उन्मध्वं ऊर्मिर्वनना अतिष्ठिप दपो वसानो महिषो वि गाहते ।
 राजा पवत्रथो वाजमारुहत् सहस्रभृष्टिर्जयति श्रवो बृहत् ४०

स भुन्दना उदियति प्रजावती विश्वायुर्विश्वाः सुभरा अहर्दिवि ।
 ब्रह्म प्रजावद्रयिमश्वपस्त्यं पीत इन्द्रविन्द्रमस्मभ्ये याचतात् ४१
 सो अग्रे अह्नां हरिर्हर्यतो मदः प्र चेतसा चेतयते अनु द्युभिः ।
 द्वा जना यातयन्नन्तरीयते नरा च शंसं दैव्यं च धर्तरि ४२
 अञ्जते व्यञ्जते समञ्जते क्रतुं रिहन्ति मधुनाभ्यञ्जते ।
 सिन्धौरुच्छवासे पतर्यन्तमुक्षणं हिरण्यपावाः पशुमांसु गृभ्णते ४३
 विपश्चिते पर्वमानाय गायत मही न धारात्यन्धौ अर्षति ।
 अहिर्न जूर्णामति सर्पति त्वच मत्यो न क्रीळन्नसरद्रूषा हरिः ४४
 अग्रेगो राजाप्यस्तविष्यते विमानो अह्नां भुवनेष्वर्षितः ।
 हरिर्घृतस्रुः सुदृशीको अर्णवो ज्योतीरथः पवते राय ओक्यः ४५
 असर्जि स्कम्भो दिव उद्यतो मदः परि त्रिधातुर्भुवनान्यर्षति ।
 अंशं रिहन्ति मृतयुः पनिप्रतं गिरा यदि निर्णिजमृग्मिणौ ययुः ४६
 प्र ते धारा अत्यश्वानि मेष्यः पुनानस्य संयतौ यन्ति रंहयः ।
 यद्गोभिरिन्दो चम्बोः समज्यस आ सुवानः सौम कलशेषु सीदसि ४७
 पर्वस्व सोम क्रतुविन्न उक्थ्यो ऽव्यो वारे परि धाव मधु प्रियम् ।
 जहि विश्वान् रक्षस इन्दो अत्रिणौ बृहद्वदेम विदथे सुवीराः ४८

(८७) सप्ताशीतितमं सूक्तम्

(१-६) नवर्चस्यास्य सूक्तस्य काव्य उशना ऋषिः । पवमानः सोमो देवता ।

त्रिष्टुप् छन्दः

प्र तु द्रव् परि कोशं नि षीद् नृभिः पुनानो अभि वाजमर्ष ।
 अश्वं न त्वा वाजिनं मर्जयन्तो ऽच्छा बर्ही रशनाभिर्नयन्ति १
 स्वायुधः पवते देव इन्दु रशस्तिहा वृजनं रक्षमाणः ।
 पिता देवानां जनिता सुदक्षो विष्टम्भो दिवो धरुणः पृथिव्याः २
 ऋषिर्विप्रः पुरेता जनाना मृभुर्धरि उशना काव्येन ।
 स चिद्विवेद निहितं यदासा मपीच्यं गुह्यं नाम गोनाम् ३
 एष स्य ते मधुमाँ इन्द्र सोमो वृषा वृष्णे परि पवित्रे अक्षाः ।
 सहस्रसाः शतसा भूरिदावा शश्वत्तमं बर्हिरा वाज्यस्थात् ४
 एते सोमा अभि गव्या सहस्रा महे वाजायामृताय श्रवांसि ।

प॒वित्रै॑भिः प॒र्वमा॑ना असृ॒ग्र ञ्छ्र॑व॒स्यवो॑ न पृ॒तना॑जो अ॒त्याः ५
 परि॒ हि ष्मा॑ पुरु॒हूतो॑ ज॒नानां॑ वि॒श्वासर॑द्भो॒जना॑ पू॒यमानः॑ ।
 अथा॑ भ॒र श्ये॑नभृ॒त प्रया॑सि र॒यिं तु॒ञ्जानो॑ अ॒भि वा॒जम॑र्ष ६
 एष॑ सु॒वानः॑ परि॒ सोमः॑ प॒वित्रे॑ स॒र्गो न॑ सृ॒ष्टो अ॒दधा॑व॒दवा॑ ।
 ति॒ग्मे शि॑शानो म॒हिषो॑ न शृ॒ङ्गे गा॑ ग॒व्यन्न॑भि शू॒रो न॑ स॒त्वा ७
 एषा॑ य॒यौ प॒रमा॑द॒न्तर॑द्रेः कू॒चित् स॒तीरू॑र्वे गा वि॒वेद॑ ।
 दि॒वो न॑ वि॒द्युत् स्त॑न॒यन्त्रैः॑ सोम॑स्य ते पव॒त इन्द्र॑ धारा॑ ८
 उ॒त स्म॑ रा॒शिं परि॑ या॒सि गो॒ना मि॒न्द्रेण॑ सोम॒ स॒रथं॑ पु॒नानः॑ ।
 पूर्वी॑रिषो॑ बृ॒हती॑र्जी॒रदानो॑ शि॒क्षा श॑ची॒वस्तव॑ ता उ॒प॒ष्टुत् ९

(८८) अष्टाशीतितमं सूक्तम्

(१-८) अष्टर्चस्यास्य सूक्तस्य काव्य उशना ऋषिः । पवमानः सोमो देवता ।

त्रिष्टुप् छन्दः

अ॒यं सोम॑ इन्द्र॒ तुभ्य॑ सु॒न्वे तु॒भ्यं पव॑ते॒ त्वम॑स्य पा॒हि ।
 त्वं ह॒ यं च॑कृ॒षे त्वं व॑वृ॒ष इन्द्रुं॑ म॒दाय॑ यु॒ज्याय॑ सोम॑म् १
 स ई॑ रथो॒ न भृ॑रिषाळ॒योजि॑ म॒हः पु॒रूणि॑ सा॒तये॑ व॒सूनि॑ ।
 आ॒दीं वि॒श्वा न॑हु॒ष्याणि॑ जा॒ता स्व॑र्षा॒ता व॑न॒ ऊ॒र्ध्वा न॑वन्त २
 वा॒युर्न॑ यो नि॒युत्वा॑ इ॒ष्ट्यामा॑ ना॒सत्ये॑व॒ हव॑ आ शं॒भवि॑ष्ठः ।
 वि॒श्ववा॑रो द्रवि॒णोदा॑ इ॒व त्मन्॑ पू॒षेव॑ धी॒जर्व॑नोऽसि सोम ३
 इन्द्रो॑ न यो म॒हा क॑र्मा॒णि च॑क्रि॒ हन्ता॑ वृ॒त्राणा॑मसि सोम॒ पू॒र्भित् ।
 पै॒द्वो न॑ हि त्वम॒हिना॑म्नां ह॒न्ता वि॒श्वस्या॑सि सोम॒ दस्योः॑ ४
 अ॒ग्निर्न॑ यो व॒न आ॑ सृ॒ज्यमानो॑ वृ॒था पा॑जा॒सि कृ॑णुते न॒दीषु॑ ।
 ज॒नो न॑ यु॒ध्वा मह॑त उ॒प॒ब्दि रि॑य॒र्ति सोमः॑ प॒र्वमान॑ ऊ॒र्मिम् ५
 ए॒ते सोमा॑ अ॒ति वा॒रा॒ण्यव्या॑ दि॒व्या न॑ कोशा॒सो अ॒भ्रव॑र्षाः ।
 वृ॒था स॑मु॒द्रं सि॒न्धवो॑ न नी॒चीः सु॑तासो॒ अ॒भि क॑लशाँ असृ॒ग्रन् ६
 श॒ष्मी श॑र्धो॒ न मा॑रु॒तं पव॑स्वा॒ऽन॑भि॒शस्ता॑ दि॒व्या यथा॑ वि॒ट् ।
 आ॒पो न॑ म॒द्भू सु॑म॒तिर्भ॑वा नः स॒हस्रा॑प्साः पृ॒तना॑षा॒णन॑ य॒ज्ञः ७
 रा॒ज्ञो नु॑ ते वरु॒णस्य॑ वृ॒तानि॑ बृ॒हद्भ॑भीरं तव॑ सोम॒ धाम॑ ।
 शु॒चि॒ष्ट्वम॑सि प्रि॒यो न॑ मि॒त्रो द॒क्षा॒य्यो अ॒र्यमे॑वा॒सि सोम॑ ८

(८६) एकोननवतितमं सूक्तम्

(१-७) सप्तर्चस्यास्य सूक्तस्य काव्य उशना ऋषिः । पवमानः सोमो देवता ।

त्रिष्टुप् छन्दः

प्रो स्य वह्निः पृथ्याभिरस्यान् दिवो न वृष्टिः पर्वमानो अक्षाः ।
सहस्रधारो असदनन्यश्स्मे मातुरुपस्थे वन आ च सोमः १
राजा सिन्धूनामवसिष्टे वासं ऋतस्य नावमारुहद्रजिष्ठाम् ।
अप्सु द्रप्सो वावृधे श्येनजूतो दुह ई इंपता दुह ई इंपतुर्जाम् २
सिंहं नसन्त मध्वो अयासं हरिमरुषं दिवो अस्य पतिम् ।
शूरो युत्सु प्रथमः पृच्छते गा अस्य चक्षसा परि पात्युक्षा ३
मधुपृष्ठं घोरमयासमश्वं रथे युञ्जन्त्युरुचक्र ऋष्वम् ।
स्वसार ई जामयो मर्जयन्ति सनाभयो वाजिनमूर्जयन्ति ४
चतस्र ई घृतदुहः सचन्ते समाने अन्तर्धरुणे निषत्ताः ।
ता ईमर्षन्ति नमसा पुनाना स्ता ई विश्वतः परि षन्ति पूर्वीः ५
विष्टम्भो दिवो धरुणः पृथिव्या विश्वा उत क्षितयो हस्तै अस्य ।
असत् त उत्सो गूणते नियुत्वान् मध्वो अंशुः पंवत इन्द्रियाय ६
वन्वन्नवातो अभि देववीति मिन्द्राय सोम वृत्रहा पंवस्व ।
शुग्धि महः पुरुश्चन्द्रस्य रायः सुवीर्यस्य पतयः स्याम ७

(६०) नवतितमं सूक्तम्

(१-६) षडृचस्यास्य सूक्तस्य मैत्रावरुणिर्वसिष्ठ ऋषिः । पवमानः सोमो देवता ।

त्रिष्टुप् छन्दः

प्र हिन्वानो जनिता रोदस्यो रथो न वाजं सनिष्यन्नयासीत् ।
इन्द्रं गच्छन्नायुधा संशिशानो विश्वा वसु हस्तयोरादधानः १
अभि त्रिपृष्ठं वृषणं वयोधा माङ्गूषाणामवावशन्त वाणीः ।
वना वसानो वरुणो न सिन्धून् वि रत्नधा दयते वार्याणि २
शूरग्रामः सर्ववीरः सहावा जेता पवस्व सनिता धनानि ।
तिग्मायुधः क्षिप्रधन्वा समत्स्व षाळहः साह्वान् पृतनासु शत्रून् ३
उरुगव्यूतिरभयानि कृणवन् त्समीचीने आ पवस्वा पुरंधी ।
अपः सिषासन्नुषसः स्वर्गाः सं चिक्रदो महो अस्मभ्यं वाजान् ४
मत्सि सोम वरुणं मत्सि मित्रं मत्सीन्द्रमिन्दो पवमान् विष्णुम् ।

मत्सि शर्धो मारुतं मत्सि देवान् मत्सि महामिन्द्रमिन्द्रो मदाय ५
 एवा राजैव क्रतुमाँ अमैन् विश्वा घनिघ्नदुरिता पवस्व ।
 इन्द्रो सूक्ताय वचसे वयो धा यूयं पात स्वस्तिभिः सदा नः ६
 चतुर्थोऽध्यायः
 । व० १-२८ ।

(६१) एकनवतितमं सूक्तम्

(१-६) षडृचस्यास्य सूक्तस्य मारीचः कश्यप ऋषिः । पवमानः सोमो देवता ।
 त्रिष्टुप् छन्दः

असर्जि वक्वा रथ्ये यथाजौ धिया मनोता प्रथमो मनीषी ।
 दश स्वसारो अधि सानो अव्ये ऽजन्ति वह्निं सदानान्यच्छ १
 वीती जनस्य दिव्यस्य क्व्यै रधि सुवानो नहुष्येभिरिन्दुः ।
 प्र यो नृभिरमृतो मर्त्येभिर्मर्मजानोऽविभिर्गोभिरद्भिः २
 वृषा वृष्णे रोरुवदंशुरस्मै पवमानो रुशदीर्ते पयो गोः ।
 सहस्रमृक्वा पथिभिर्वचोवि दध्वस्मभिः सूरु अरवं वि याति ३
 रुजा दृळ्हा चिद्रक्षसः सदासि पुनान इन्द्र ऊर्गुहि वि वाजान् ।
 वृश्चोपरिष्ठात् तुजता वधेन ये अन्ति दूरादुपनायमेषाम् ४
 स प्रवन्नव्यसे विश्ववार सूक्ताय पथः कृणुहि प्राचः ।
 ये दुष्पहासो वनुषा बृहन्त स्ताँस्तै अश्याम पुरुकृत् पुरुक्षो ५
 एवा पुनानो अपः स्वर्गा अस्मभ्यं तोका तनयानि भूरि ।
 शं नः क्षेत्रमुरु ज्योतीषि सोम ज्योङ्गनः सूर्यं दृशये रिरीहि ६

(६२) द्विनवतितमं सूक्तम्

(१-६) षडृचस्यास्य सूक्तस्य मारीचः कश्यप ऋषिः । पवमानः सोमो देवता ।
 त्रिष्टुप् छन्दः

परि सुवानो हरिरंशुः पवित्रे रथो न सर्जि सनये हियानः ।
 आपृच्छलोकमिन्द्रियं पूयमानः प्रति देवाँ अजुषत् प्रयोभिः १
 अच्छा नृचक्षा असरत् पवित्रे नाम दधानः कविरस्य योनौ ।
 सीदन् होतैव सदाने चमूषू पैमग्मनृषयः सप्त विप्राः २

प्र सुमे॒धा गा॑तुविद्वि॒श्वदै॑वः सोमः पुना॒नः सद॑ एति॒ नित्य॑म् ।
 भुव॒द्विश्वे॑षु का॒व्येषु॑ रन्ता ऽनु॒ जनान्॑ यतते॒ पञ्च॑ धीरः ३
 तव॒ त्से सो॑म पवमान॒ निशये॑ विश्वे॒ देवास्त्रय॑ एकाद॒शासः॑ ।
 दश॑ स्व॒धाभिर॑धि॒ सानो॑ अ॒व्ये मृ॑जन्ति॒ त्वा न॒द्यः स॒प्त य॒ह्वीः ४
 तन्न॒ सत्यं॑ पवमानस्यास्तु॒ यत्र॑ विश्वे॒ कारवः॑ संनसन्त ।
 ज्योति॑र्यदह्ने अ॒कृणो॑दु॒ लोकं॑ प्राव॒न्मनुं॑ दस्य॒वे कर॑भीकम् ५
 परि॒ सद्यै॑व पशमान्ति॒ होता॑ राजा॒ न सत्यः॑ समितीरि॒यानः॑ ।
 सोमः॑ पुना॒नः क॒लशाँ॑ अयासीत् सीदन् मृ॒गो न म॑हिषो वनेषु ६

(६३) त्रिनवतितमं सूक्तम्

(१-५) पञ्चर्चस्यास्य सूक्तस्य गौतमो नोधा ऋषिः । पवमानः सोमो देवता ।
 त्रिष्टुप् छन्दः

सा॒कमु॒क्षो म॑र्जयन्त॒ स्वसारो॑ दश॒ धीर॑स्य धी॒तयो॑ धनु॒त्रीः ।
 हरिः॑ पर्य॒द्रव॒जाः सूर्य॑स्य॒ द्रोणं॑ नन॒क्षे अ॒त्यो न वा॒जी १
 सं मा॒तृभिर्न॑ शिशु॒र्वाव॑शानो वृषा॒ दध॑न्वे पुरु॒वारो॑ अ॒द्भिः ।
 मर्यो॑ न योषाम॒भि निष्कृतं॑ यन् त्सं गच्छते॒ कल॑शा॒ उ॒स्त्रिया॑भिः २
 उ॒त प्र पि॑प्य॒ ऊ॒धर॑घ्न॒र्चाया॑ इन्दु॒र्धारा॑भिः सचते सुमे॒धाः ।
 मूर्धा॑नुं गावः॒ पर्यसा॑ च॒मू॒ष्व॒भि श्री॑णन्ति॒ वसु॑भिर्न॒ नित्तैः॑ ३
 स नो॑ दे॒वेभिः॑ पवमान॒ रदे॒न्दो र॒यिम॑श्चिर्न॒ वाव॑शानः ।
 रथि॑रायता॒मुश॑ती पुर॒धि र॑स्म॒द्रय॑शा॒गा दा॑वने॒ वसू॑नाम् ४
 नू नो॑ र॒यिमु॑प॒ मास्व॑ नृवन्त॒ पुना॑नो॒ वा॒ताप्य॑ विश्व॒श्चन्द्र॑म् ।
 प्र व॑न्दि॒तुरि॑न्दो॒ तार्या॑युः प्रा॒तर्म॑क्षू॒ धिया॑व॒सुर्जग॑म्यात् ५

(६४) चतुर्नवतितमं सूक्तम्

(१-५) पञ्चर्चस्यास्य सूक्तस्याङ्गिरसः कशव ऋषिः । पवमानः सोमो देवता ।
 त्रिष्टुप् छन्दः

अधि॒ यद॑स्मिन् वा॒जिनी॑व॒ शुभः॑ स्पर्धन्ते॒ धियः॑ सूर्ये॒ न विशः॑ ।
 अ॒पो वृ॑णानः॒ पवते॑ क॒वीयन्॑ वृ॒जं न प॑शव॒र्धना॑य॒ मन्म॑ १
 द्वि॒ता व्यू॑र्षव॒न्नमृ॑तस्य॒ धाम॑ स्व॒र्विदे॑ भुव॒नानि॑ प्रथन्त ।
 धियः॑ पि॒न्वानाः॑ स्व॒सरे॑ न गाव॒ ऋता॑यन्ती॒रभि॑ वा॒वश्च॑ इन्दु॒म् २

परि यत् कविः काव्या भरते शूरो न रथो भुवनानि विश्वा ।
 देवेषु यशो मर्ताय भूषन् दक्षाय रायः पुरुभूषु नव्यः ३
 श्रिये जातः श्रिय आ निरियाय श्रियं वयौ जरितृभ्यो दधाति ।
 श्रियं वसाना अमृतत्वमायन् भवन्ति सत्या समिथा मितद्रौ ४
 इषमूर्जमभ्यर्षाश्वं गा मुरु ज्योतिः कृणुहि मत्सि देवान् ।
 विश्वानि हि सुषहा तानि तुभ्यं पवमान् बाधसे सोम शत्रून् ५

(६५) पञ्चनवतितमं सूक्तम्

(१-५) पञ्चर्चस्यास्य सूक्तस्य काणवः प्रस्काणव ऋषिः । पवमानः सोमो देवता ।

त्रिष्टुप् छन्दः

कनिक्रन्ति हरिरा सृज्यमानः सीदन् वनस्य जठरै पुनानः ।
 नृभिर्यतः कृणुते निर्णिजं गा अतो मृतीर्जनयत स्वधाभिः १
 हरिः सृजानः पथ्यामृतस्ये यति वाचमरितेव नार्वम् ।
 देवो देवानां गुह्यानि नामा ऽऽविष्कृणोति बर्हिषि प्रवाचै २
 अपामिवेदूर्मयस्तर्तुराणाः प्र मनीषा ईरते सोममच्छ ।
 नमस्यन्तीरुप च यन्ति सं चा ऽऽ च विशन्त्युशतीरुशन्तम् ३
 तं मर्मजानं महिषं न साना वंशं दुहन्त्युक्षणं गिरिष्ठाम् ।
 तं वावशानं मतयः सचन्ते त्रितो बिभर्ति वरुणं समुद्रे ४
 इष्यन् वाचमुपवक्तेव होतुः पुनान इन्दो वि ष्या मनीषाम् ।
 इन्द्रश्च यत् क्षयथः सौभगाय सुवीर्यस्य पतयः स्याम ५

(६६) षण्णवतितमं सूक्तम्

(१-२४) चतुर्विंशत्यृचस्यास्य सूक्तस्य दैवोदासिः प्रतर्दन ऋषिः । पवमानः सोमो

देवता । त्रिष्टुप् छन्दः

प्र सेनानीः शूरो अग्रे रथानां गव्यन्नैति हर्षते अस्य सेना ।
 भद्रान् कृणवन्निन्द्रहवान् त्सखिभ्य आ सोमो वस्त्रा रभसानि दत्ते १
 समस्य हरिं हरयो मृजन्त्य श्वहयैरनिशितं नमोभिः ।
 आ तिष्ठति रथमिन्द्रस्य सर्वा विद्वाँ एना सुमतिं यात्यच्छ २
 स नो देव देवताते पवस्व महे सोम प्सरस इन्द्रपानः ।
 कृणवन्नपो वर्षयन् द्यामुतेमा मुरोरा नो वरिवस्या पुनानः ३

अजीतयेऽहतये पवस्व स्वस्तये सर्वतातये बृहते ।
 तदुशन्ति विश्वं इमे सखायस्तदहं वंश्मि पवमान सोम ४
 सोमः पवते जनिता मतीनां जनिता दिवो जनिता पृथिव्याः ।
 जनिताग्रेर्जनिता सूर्यस्य जनितेन्द्रस्य जनितोत विष्णोः ५
 ब्रह्मा देवानां पदवीः कवीनामृषिर्विप्राणां महिषो मृगाणाम् ।
 श्येनो गृध्राणां स्वधितिर्वनानां सोमः पवित्रमत्यैति रेभन् ६
 प्रावीविपद्वाच ऊर्मिं न सिन्धुर्गिरः सोमः पवमानो मनीषाः ।
 अन्तः पश्यन् वृजनेमावरा रया तिष्ठति वृषभो गोषु जानन् ७
 स मत्सरः पृत्सु वन्वन्नवातः सहस्ररेता अभि वाजमर्ष ।
 इन्द्रायेन्द्रो पवमानो मनीष्यंशोरूमिमीरय गा इषुरयन् ८
 परि प्रियः कलशै देववात इन्द्राय सोमो रणयो मदाय ।
 सहस्रधारः शतवाज इन्दुर्वाजी न सप्तिः समना जिगाति ९
 स पूर्वो वसुविज्जायमानो मृजानो अप्सु दुदुहानो अद्रौ ।
 अभिशस्तिपा भुवनस्य राजा विदद्वातुं ब्रह्मणे पूयमानः १०
 त्वया हि नः पितरः सोम पूर्वे कर्माणि चक्रुः पवमान धीराः ।
 वन्वन्नवातः परिधीरपौरु वीरेभिरश्वैर्मघवा भवा नः ११
 यथापवथा मनवे वयोधा अमित्रहा वरिवोविद्धविष्मान् ।
 एवा पवस्व द्रविणं दधान इन्द्रे सं तिष्ठ जनयार्युधानि १२
 पवस्व सोम मधुमां ऋतावा ऽपो वसानो अधि सानो अव्ये ।
 अव द्रोणानि घृतवान्ति सीद मदिन्तमो मत्सर इन्द्रपानः १३
 वृष्टिं दिवः शतधारः पवस्व सहस्रसा वाजयुर्देववीतौ ।
 सं सिन्धुभिः कलशै वावशानः समुस्त्रियाभिः प्रतिरन् न आयुः १४
 एष स्य सोमो मतिभिः पुनानो ऽत्यो न वाजी तरीदरातीः ।
 पयो न दुग्धमदितेरिषिर मुर्विव गातुः सुयमो न वोळहा १५
 स्वायुधः सोतृभिः पूयमानो ऽभ्यर्ष गुह्यं चारु नाम ।
 अभि वाजं सप्तिरिव श्रवस्या ऽभि वायुमभि गा देव सोम १६
 शिशुं जज्ञानं हर्यतं मृजन्ति शम्भन्ति वह्निं मरुतो गृणेन ।
 कविर्गीर्भिः काव्यैना कविः सन् त्सोमः पवित्रमत्यैति रेभन् १७
 ऋषिमना य ऋषिकृत् स्वर्षाः सहस्रणीथः पदवीः कवीनाम् ।
 तृतीयं धाम महिषः सिषासन् त्सोमो विराजमनु राजति ष्टु १८

च॒मूष॒च्छये॒नः श॑कु॒नो वि॒भृत्वा॑ गो॒विन्दु॑र्द्र॒प्स आ॒यु॒धानि॑ बिभ्रत् ।
 अ॒पामूर्मि॑ स॒च॒मानः॑ स॒मुद्रं॑ तु॒रीयं॑ धाम॒ महि॑षो वि॒वक्ति॑ १६
 म॒र्यो न श॑भ्र॒स्तन्व॑ मृ॒जानो॑ ऽत्यो न सृ॒त्वा स॒नये॑ ध॒र्नानाम् ।
 वृषे॑व यू॒था परि॑ को॒शम॑र्षन् क॒निक्र॑द॒ञ्चम्बो॑ऽऱरा वि॒वेश २०
 प॒र्वस्वे॒न्दो प॒र्वमा॒नो महौ॑भिः क॒निक्र॑दत् परि॒ वारा॑ण्यर्ष ।
 क्रीळ॑ञ्च॒म्बोऽऱरा॑ वि॒श पू॒यमा॑न् इन्द्रं॑ ते र॒सो म॑दि॒रो म॑मत्तु २१
 प्रा॒स्य धा॑रा बृ॒हती॑र॒सृग्र॑ न॒क्तो गो॑भिः क॒लशाँ॑ आ वि॒वेश ।
 साम॑ कृ॒गवन् त्सा॑म॒न्यो वि॒पश्चित् क्र॑न्द॒न्नेत्य॑भि स॒ख्युर्न जा॑मिम् २२
 अ॒प॒घ्न॒र्त्रेषि॑ प॒वमा॑न् श॒त्रून् प्रि॒यां न जा॑रो अ॒भिगी॑त् इन्द्रुः ।
 सी॒दन् व॑नेषु श॒कुनो॑ न प॒त्वा सोमः॑ पु॒नानः॑ क॒लशै॑षु स॒त्ता २३
 आ ते॒ रुचः॑ प॒र्वमा॑नस्य सोम॒ योषे॑व यन्ति सु॒दुघाः॑ सु॒धाराः॑ ।
 ह॒रि॒रानी॑तः पु॒रु॒वारो॑ अ॒प्स्व चि॑क्रदत् क॒लशै॑ दे॒वयू॑नाम् २४

षष्ठोऽनुवाकः

। सू० ६७-१०३ ।

(६७) सप्तनवतितमं सूक्तम्

(१-५८) अष्टपञ्चाशदृचस्यास्य सूक्तस्य (१-३) प्रथमादितृचस्य
 मैत्रावरुणिर्वसिष्ठः, (४-६) चतुर्थ्यादितृचस्य वासिष्ठ इन्द्रप्रमतिः, (७-९)
 सप्तम्यादितृचस्य वासिष्ठो वृषगणः, (१०-१२) दशम्यादितृचस्य वासिष्ठो मन्युः,
 (१३-१५) त्रयोदश्यादितृचस्य वासिष्ठ उपमन्युः, (१६-१८) षोडश्यादितृचस्य
 वासिष्ठो व्याघ्रपात्, (१९-२१) एकोनविंश्यादितृचस्य वासिष्ठः शक्तिः, (२२-
 २४) द्वाविंश्यादितृचस्य वासिष्ठः कर्णश्रुत्, (२५-२७) पञ्चविंश्यादितृचस्य
 वासिष्ठो मृळीकः, (२८-३०) अष्टाविंश्यादितृचस्य वासिष्ठो वसुकः, (३१-४४)
 एकत्रिंश्यादिचतुर्दशर्चा शाक्त्यः पराशरः, (४५-५८)

पञ्चचत्वारिंश्यादिचतुर्दशानाञ्चाङ्गिरसः कुत्स ऋषयः । पवमानः सोमो देवता ।

त्रिष्टुप् छन्दः

अस्य॑ प्रेषा हे॒मना॑ पू॒यमा॑नो दे॒वो दे॒वेभिः॑ स॒मपृ॑क्त॒ रस॑म् ।
 सु॒तः प॒वित्रं॑ प॒र्येति॑ रे॒भन् मि॒तेव॑ स॒द्यं प॑श॒मान्ति॑ होता १
 भ॒द्रा व॑स्त्रा॒ सम॒न्याऽ॑ व॒सानो॑ म॒हान् क॒वि॒र्नि॒वच॑नानि शंसन् ।
 आ व॑च्यस्व च॒म्बोः॑ पू॒यमा॑नो वि॒चक्ष॑णो जा॒गृ॒वि॒र्दे॒ववी॑तौ २
 समु॑ प्रि॒यो मृ॑ज्यते॒ सानो॑ अव्यै॒ यश॑स्त॒रो य॒शसा॑ं चै॒तौ अ॒स्मे ।

अ॒भि स्व॑र॒ धन्वा॑ पू॒यमा॑नो यू॒यं पा॑त स्व॒स्तिभिः॑ सदा॑ नः ३
 प्र गा॑यता॒भ्यर्चाम॑ दे॒वान् त्सो॑मं हि॒नोत॑ मह॒ते धना॑य ।
 स्वा॒दुः प॑वाते अति॒ वार॑मव्य॒ मा सी॑दाति क॒लशं॑ दे॒वयु॑र्नः ४
 इ॒न्दुर्दे॑वाना॒मुप॑ स॒ख्यमा॑यन् त्स॒हस्र॑धारः पवते॒ मदा॑य ।
 नृ॒भिः स्तवा॑नो अनु॒ धाम॑ पूर्वं म॒गन्नि॑न्द्रं मह॒ते सौ॑भगाय ५
 स्तो॒त्रे रा॒ये हरि॑रर्षा पु॒नान॑ इन्द्रं॒ मदी॑ गच्छतु ते भ॒राय॑ ।
 दे॒वैर्या॑हि स॒रथं॑ राधो अ॒च्छा यू॒यं पा॑त स्व॒स्तिभिः॑ सदा॑ नः ६
 प्र का॑व्यमु॒शनै॑व ब्रुवा॒णो दे॒वो दे॒वानां॑ जनि॒मा वि॑वक्ति ।
 महि॑व्रतः शुचि॒बन्धुः पा॑वकः प॒दा व॑राहो अ॒भ्यैति॑ रेभन् ७
 प्र हं॑सास॒स्तृप॑लं म॒न्युम॑च्छा॒ माद॑स्तं वृष॒गणा॑ अयासुः ।
 आ॒ङ्गूष्य॑र्ष॒ पव॑मानं सखा॒यो दु॑र्मर्षं सा॒कं प्र व॑दन्ति वा॒णम् ८
 स र॑हत उरुगा॒यस्य॑ जूतिं वृथा॒ क्रीळ॑न्तं मि॒मते॑ न गावः ।
 प॒रीण॑सं कृ॒णुते॑ ति॒ग्मशृ॑ङ्गो दि॒वा हरि॑र्ददृ॒शे नक्त॑मृ॒जः ९
 इ॒न्दुर्वा॑जी पवते गो॒न्यौघा॑ इ॒न्द्रे सो॑मः सह इ॒न्वन् मदा॑य ।
 हन्ति॑ र॒क्षो बा॑र्धते पर्य॒राती॑ वरि॒वः कृ॑णवन् वृ॒जन॑स्य॒ राजा॑ १०
 अध॑ धार॒या म॑ध्वा पृ॒चान॑ स्ति॒रो रो॑र्म पवते अ॒द्रिदु॑ग्धः ।
 इ॒न्दुरि॑न्द्रस्य स॒ख्यं जु॑षा॒णो दे॒वो दे॒वस्य॑ मत्स॒रो मदा॑य ११
 अ॒भि प्रि॒याणि॑ पवते पु॒नानो॑ दे॒वो दे॒वान् त्स्वे॑न् रसे॒न पृ॑ञ्चन् ।
 इ॒न्दुर्ध॑र्मा॒णय॑तुथा वसा॒नो द॑श॒ क्षि॒पो अव्य॑त॒ सानो॑ अव्यै १२
 वृषा॑ शो॒णो अ॒भिक॑नि॒क्रद्द्वा॑ न॒दय॑न्नेति पृथि॒वीमु॑त द्याम् ।
 इ॒न्द्रस्ये॑व व॒ग्नुरा॑ शृ॒णव॑ आ॒जौ प्र॑चे॒तय॑न्नर्षति वा॒चमे॑माम् १३
 र॒साय्यः॑ पर्य॒सा पि॑न्व॒मान॑ ई॒रय॑न्नेषि मधु॒मन्त॑मंशुम् ।
 प॒वमा॑नः संत॒निमै॑षि कृ॒णव॑न्नि॒न्द्राय॑ सोम परि॒षिच्य॑मानः १४
 ए॒वा प॑वस्व म॒दिरो॑ म॒दायो॑ द॒ग्राभ॑स्य॒ नम॑यन् व॒धस्त्रैः॑ ।
 परि॑ व॒र्णं भ॑र॒माणो॑ रु॒शन्तं॑ ग॒व्युर्नो॑ अ॒र्षं परि॑ सोम सि॒क्तः १५
 जु॒ष्टी न॑ इ॒न्दो सु॑पथा॒ सुगा॑ न्युरौ प॑वस्व वरि॒वांसि॑ कृ॒णवन्॑ ।
 घ॒नेव॑ वि॒ष्वग्दु॑रि॒तानि॑ वि॒घ्नन्न॑धि ष्णु॒ना ध॑न्व॒ सानो॑ अव्यै १६
 वृ॒ष्टिं नो॑ अ॒र्ष दि॒व्यां जि॑ग॒तु मि॑ळा॒वतीं॑ शं॒गयीं॑ जी॒रदा॑नुम् ।
 स्तु॒कैव॑ वी॒ता ध॑न्वा वि॒चिन्व॑न् बन्धू॒रिमाँ॑ अ॒वराँ॑ इ॒न्दो वा॑यून् १७
 ग्र॒न्थिं न॑ वि ष्यं ग्र॒थितं॑ पु॒नान॑ ऋ॒जुं च॑ गा॒तु वृ॑जिनं च॒ सोम॑ ।

अत्यो न क्रदो हरिरा सृजानो मर्यो देव धन्व पस्त्यावान् १८
 जुष्टो मदाय देवतात इन्दो परि ष्णुना धन्व सानो अव्यै ।
 सहस्रधारः सुरभिरदब्धः परि स्रव वाजसातौ नृषह्यै १९
 अरश्मानो यैऽरथा अयुक्ता अत्यासो न संसृजानास आजौ ।
 एते शक्रासौ धन्वन्ति सोमा देवासस्ताँ उप याता पिबध्यै २०
 एवा न इन्दो अभि देववीतिं परि स्रव नभो अर्णश्चमूषु ।
 सोमो अस्मभ्यं काम्यं बृहन्त रयिं ददातु वीरवन्तमुग्रम् २१
 तक्षद्यदी मनसो वेनतो वाग ज्येष्ठस्य वा धर्मणि क्षोरनीके ।
 आदीमायन् वरमा वावशाना जुष्टं पतिं कलशे गाव इन्दुम् २२
 प्र दानुदो दिव्यो दानुपिन्व ऋतमृताय पवते सुमेधाः ।
 धर्मा भुवद्रुजन्त्यस्य राजा प्र रश्मिभिर्दशभिर्भारि भूम २३
 पवित्रैभिः पवमानो नृचक्षा राजा देवानामुत मर्त्यानाम् ।
 द्विता भुवद्रयिपती रयीणा मृतं भरत् सुभृतं चार्विन्दुः २४
 अवाँ इव श्रवसे सातिमच्छेन्द्रस्य वायोरभि वीतिमर्ष ।
 स नः सहस्रा बृहतीरिषोदा भवाँ सोम द्रविणोवित् पुनानः २५
 देवाव्यो नः परिषिच्यमानाः क्षयं सुवीरं धन्वन्तु सोमाः ।
 आयज्यवः सुमतिं विश्ववारा होतारो न दिवियजो मन्द्रतमाः २६
 एवा देव देवताते पवस्व महे सोम प्सरसे देवपानः ।
 महश्चिद्धि ष्मसिं हिताः समर्ये कृधि सुष्ठाने रोदसी पुनानः २७
 अश्चो न क्रदो वृषभिर्युजानः सिंहो न भीमो मनसो जवीयान् ।
 अर्वाचीनैः पृथिभिर्ये रजिष्ठा आ पवस्व सौमनसं न इन्दो २८
 शतं धारा देवजाता असृग्रन् त्सहस्रमेनाः कवयो मृजन्ति ।
 इन्दो सनित्रं दिव आ पवस्व पुरएतासिं महतो धनस्य २९
 दिवो न सर्गा अससृग्रमह्नां राजा न मित्रं प्र मिनाति धीरः ।
 पितुर्न पुत्रः क्रतुभिर्यतान आ पवस्व विशे अस्या अर्जीतिम् ३०
 प्र ते धारा मधुमतीरसृग्रन् वारान् यत् पूतो अत्येष्यव्यान् ।
 पवमान् पवसे धाम् गोनां जज्ञानः सूर्यमपिन्वो अर्कैः ३१
 कर्निक्रददनु पनथामृतस्य शक्रो वि भास्यमृतस्य धाम् ।
 स इन्द्राय पवसे मत्सरवान् हिन्वानो वाचं मतिभिः कवीनाम् ३२
 दिव्यः सुपर्णोऽव चक्षि सोम पिन्वन् धाराः कर्मणा देववीतौ ।

ए॒न्दो॑ वि॒श क॒लशं॑ सोम॒धानं॑ क्र॒न्दन्नि॒हि सूर्य॑स्योप॒ र॒श्मिम् ३३
 ति॒स्रो वाचं॑ ईर॒यति॑ प्र व॒ह्नि ऋ॒तस्य॑ धी॒तिं ब्र॒ह्म॑णो म॒नीषाम् ।
 गावो॑ यन्ति गोप॑तिं पृ॒च्छमा॑नाः सोमं॑ यन्ति म॒तयौ॑ वाव॒शानाः ३४
 सोमं॑ गावो॑ धे॒नवो॑ वाव॒शानाः॑ सोमं॑ वि॒प्रा म॒तिभिः॑ पृ॒च्छमा॑नाः ।
 सोमः॑ सु॒तः पू॒यते॑ अ॒ज्यमा॑नः सोमै॑ अ॒र्कास्त्रि॑ष्टुभः सं न॑वन्ते ३५
 ए॒वा नः॑ सोम॒ परि॑षि॒च्यमा॑न आ प॑वस्व पू॒यमा॑नः स्व॒स्ति ।
 इन्द्र॑मा वि॒श बृ॒हता॑ र॒वेण॑ व॒र्धया॑ वाचं॒ जन॑या पु॒रधि॑म् ३६
 आ जा॑गृ॒विर्वि॑प्र ऋ॒ता म॑ती॒नां सोमः॑ पु॒नानो॑ अ॒सद॑ञ्चमू॒षु ।
 स॒प॒न्ति॒ यं मि॑थु॒नासो॑ नि॒का॒मा अ॒ध्व॒र्यवो॑ रथि॒रासः॑ सु॒हस्ताः॑ ३७
 स पु॑नान उ॒प सू॒रे न॑ धातो॒भे अप्रा॑ रोद॑सी वि ष अ॒विः ।
 प्रि॒या चि॒द्यस्य॑ प्रि॒यसा॑स ऊ॒ती स॒ तू ध॑नं का॒रिणे॑ न प्र य॑सत् ३८
 स व॑र्धि॒ता व॑र्धनः पू॒यमा॑नः सोमो॑ मी॒ढ्वाँ अ॒भि नो॑ ज्योति॑षावीत् ।
 येना॑ नः पू॒र्वे पि॑तरः प॒द॒ज्ञाः स्व॑र्वि॒दो अ॒भि गा॑ अ॒द्रिमु॑ष्णन् ३९
 अ॒क्रान्॑ त्समु॒द्रः प्र॑थ॒मे वि॑ध॒र्म॒ञ्जन॑यन् प्र॒जा भु॑र्व॒नस्य॑ राजा ।
 वृषा॑ प॒वित्रे॑ अ॒धि सा॑नो अ॒व्ये बृ॒हत् सोमो॑ वावृ॒धे सु॒वान॑ इन्द्रुः ४०
 म॒हत् तत् सोमो॑ म॒हिष॑श्च॒कारा॑ ऽपां य॒द्गर्भो॑ ऽवृ॒णीत॑ दे॒वान् ।
 अ॒द॒धादि॑न्द्रे प॑र्व॒मान् ओ॒जो ऽज॑नयत् सू॒र्ये ज्योति॑रिन्द्रुः ४१
 मत्सि॑ वा॒युमि॑ष्टये राध॑से च॒ मत्सि॑ मि॒त्रावरु॑णा पू॒यमा॑नः ।
 मत्सि॑ श॒र्धो मारु॑तं मत्सि॑ दे॒वान् मत्सि॑ द्यावा॑पृथि॒वी दे॒व सोम ४२
 ऋ॒जुः प॑वस्व वृ॒जिन॑स्य॒ हन्ता॑ ऽपा॒मीवां॑ बाध॑मानो मृ॒धश्च॑ ।
 अ॒भि॒श्री॑णन् प॒यः प॑यसा॒भि गो॑ना॒मिन्द्र॑स्य॒ त्वं तव॑ व॒यं सखा॑यः ४३
 म॒ध्वः सू॑दं प॑वस्व वस्व॒ उत्सं॑ वी॒रं च॑ न॒ आ प॑वस्वा भ॒गं च॑ ।
 स्व॒द॒स्वेन्द्रा॑य॒ पर्व॑मान इन्द्रो र॒यिं च॑ न॒ आ प॑वस्वा स॒मुद्रा॑त् ४४
 सोमः॑ सु॒तो धा॑र॒यात्यो॑ न हि॒त्वा सि॒न्धु॒र्न नि॒म्रम॑भि वा॒ज्य॑क्षाः ।
 आ यो॑निं व॒न्य॑मसदत् पु॒नानः॑ स॒मिन्दु॑र्गो॒भिर॑सरत् स॒म॒द्भिः ४५
 एष॑ स्य तै॑ प॒वत॑ इन्द्र॒ सोम॑श्चमू॒षु धी॑र उ॒शते॑ तव॑स्वान् ।
 स्व॑र्च॒क्षा रथि॑रः स॒त्यशु॑ष्मः का॒मो न॑ यो दे॒वय॑तामस॑र्जि ४६
 एष॑ प्र॒त्नेन॑ व॒यसा॑ पु॒नान॑ स्ति॒रो व॑र्षा॒सि दु॑हि॒तु॒र्दधानः॑ ।
 व॑सा॒नः श॑र्म त्रि॒वरू॑थम॒प्सु हो॑तै॒व या॑ति स॒र्मने॑षु रे॒भन् ४७
 नू न॑स्त्वं रथि॒रो दे॒व सोम॑ परि॒ स्रव॑ च॒म्बोः पू॒यमा॑नः ।

अप्सु स्वादिष्ठो मधुमाँ ऋतावा देवो न यः सविता सत्यमन्मा ४८
 अभि वायुं वीत्यर्षा गृणानोर्इ ऽभि मित्रावरुणा पूयमानः ।
 अभी नरं धीजवनं रथेष्ठा मभीन्द्रं वर्षणं वज्रबाहुम् ४९
 अभि वस्त्रा सुवसनान्यर्षा ऽभि धेनूः सुदुघाः पूयमानः ।
 अभि चन्द्रा भर्तवे नो हिरण्या ऽभ्यश्चान् रथिनो देव सोम ५०
 अभी नो अर्ष दिव्या वसू न्यभि विश्वा पार्थिवा पूयमानः ।
 अभि येन द्रविणमृश्नवामा ऽभ्यार्षेयं जमदग्निवन्नः ५१
 अया पवा पवस्वैना वसूनि माँश्चत्व इन्दो सरसि प्र धन्व ।
 ब्रधश्चिदत्र वातो न जूतः पुरुमेधश्चित् तकवे नरं दात् ५२
 उत न एना पव्या पवस्वा ऽधि श्रुते श्रवाय्यस्य तीर्थे ।
 षष्टिं सहस्रा नैगुतो वसूनि वृक्षं न पक्वं धूनवृद्रणाय ५३
 महीमे अस्य वृषनाम शूषे माँश्चत्वे वा पृशने वा वधत्रे ।
 अस्वापयन्निगुतः स्नेहयच्चा ऽपामित्राँ अपाचितौ अचेतः ५४
 सं त्री पवित्रा विततान्येष्य न्वेकं धावसि पूयमानः ।
 असि भगो असि दात्रस्य दाता ऽसि मघवा मघवञ्च इन्दो ५५
 एष विश्ववित् पवते मनीषी सोमो विश्वस्य भुवनस्य राजा ।
 द्रप्साँ ईरयन् विदथेष्विन्दुर्वि वारमव्यं समयाति याति ५६
 इन्दुं रिहन्ति महिषा अदब्धाः पदे रैभन्ति कवयो न गृध्राः ।
 हिन्वन्ति धीरा दशभिः क्षिपाभिः समञ्जते रूपमपां रसेन ५७
 त्वया व्यं पवमानेन सोम भरे कृतं वि चिनुयाम् शश्वत् ।
 तन्नो मित्रो वरुणो मामहन्ता मदितिः सिन्धुः पृथिवी उत द्यौः ५८

(६८) अष्टनवतितमं सूक्तम्

(१-१२) द्वादशर्चस्यास्य सूक्तस्य वार्षागिरोऽम्बरीषो भारद्वाज ऋजिश्वा च ऋषी ।
 पवमानः सोमो देवता । (१-१०, १२) प्रथमादिदशर्चा द्वादश्याश्चानुष्टुप्, (११)
 एकादश्याश्च बृहती छन्दसी

अभि नो वाजसातमं रयिमर्ष पुरुस्पृहम् ।
 इन्दो सहस्रभर्णसं तुविद्युमं विभ्वासहम् १
 परि ष्य सुवानो अव्ययं रथे न वर्माव्यत ।
 इन्दुरभि द्रुणा हितो हियानो धाराभिरक्षाः २

परि ष्य सुवानो अक्षा इन्दुरव्ये मदच्युतः ।
 धारा य ऊर्ध्वो अर्ध्वरे भ्राजा नैति गव्ययुः ३
 स हि त्वं देव शश्वते वसु मर्ताय दाशुषे ।
 इन्दो सहस्त्रिणं रयिं शतात्मानं विवाससि ४
 वयं ते अस्य वृत्रहन् वसो वस्वः पुरुस्पृहः ।
 नि नेदिष्ठतमा इषः स्याम सुम्रस्याधिगो ५
 द्विर्यं पञ्च स्वयंशसं स्वसारो अद्रिसंहतम् ।
 प्रियमिन्द्रस्य काम्यं प्रस्त्रापयन्त्यूर्मिणम् ६
 परि त्यं हर्यतं हरिं बभ्रुं पुनन्ति वारैण ।
 यो देवान् विश्वाँ इत् परि मदेन सह गच्छति ७
 अस्य वो ह्यवसा पान्तो दक्षसाधनम् ।
 यः सूरिषु श्रवो बृहद् दधे स्वर्णं हर्यतः ८
 स वो यज्ञेषु मानवी इन्दुर्जनिष्ट रोदसी ।
 देवो देवी गिरिष्ठा अस्त्रैधन् तं तुविष्वणि ९
 इन्द्राय सोम पातवे वृत्रघ्ने परि षिच्यसे ।
 नरे च दक्षिणावते देवाय सदानासदे १०
 ते प्रतासो व्युष्टिषु सोमाः पवित्रै अक्षरन् ।
 अपप्रोथन्तः सनुतर्हुरश्चितः प्रातस्ताँ अप्रचेतसः ११
 तं संखायः पुरोरुचं यूयं वयं च सूरयः ।
 अश्याम् वाजगन्ध्यं सनेम् वाजपस्त्यम् १२

(६६) नवनवतितमं सूक्तम्

(१-८) अष्टर्चस्यास्य सूक्तस्य काश्यपौ रेभसून् ऋषी । पवमानः सोमो देवता ।

(१) प्रथमर्चो बृहती, (२-८) द्वितीयादिसप्तानाञ्चानुष्टुप् छन्दसी

आ हर्यताय धृष्णवे धनुस्तन्वन्ति पौंस्यम् ।
 शक्रां वयन्त्यसुराय निर्णिजं विपामग्रे महीयुवः १
 अर्धं क्षपा परिष्कृतो वाजाँ अभि प्र गाहते ।
 यदी विवस्वतो धियो हरिं हिन्वन्ति यातवे २
 तमस्य मर्जयामसि मदो य इन्द्रपातमः ।
 यं गाव आसभिर्दधुः पुरा नूनं च सूरयः ३

तं गार्थया पुराणया पुनानमभ्यनूषत ।
 उतो कृपन्त धीतयौ देवानां नाम् बिभ्रतीः ४
 तमुक्षमाणमव्यये वारं पुनन्ति धर्णसिम् ।
 दूतं न पूर्वचित्तय आ शासते मनीषिणः ५
 स पुनानो मदिन्तमः सोमश्चमूषु सीदति ।
 पशौ न रेत आदधत् पतिर्वचस्यते धियः ६
 स मृज्यते सुकर्मभिर्देवो देवेभ्यः सुतः ।
 विदे यदासु संददिर्मुहीरपो वि गहिते ७
 सुत इन्दो पवित्र आ नृभिर्यतो वि नीयसे ।
 इन्द्राय मत्सरिन्तमश्चमूष्वा नि षीदसि ८

(१००) शततमं सूक्तम्

(१-६) नवर्चस्यास्य सूक्तस्य काश्यपौ रेभसूनु ऋषी । पवमानः सोमो देवता ।

अनुष्टुप् छन्दः

अभी नवन्ते अद्दुहः प्रियमिन्द्रस्य काम्यम् ।
 वृत्सं न पूर्वं आयुनि जातं रिहन्ति मातरः १
 पुनान इन्द्रवा भर सोमं द्विबर्हसं रयिम् ।
 त्वं वसूनि पुष्यसि विश्वानि दाशुषौ गृहे २
 त्वं धियं मनोयुजं सृजा वृष्टिं न तन्यतुः ।
 त्वं वसूनि पार्थिवा दिव्या च सोम पुष्यसि ३
 परि ते जिग्युषौ यथा धारा सुतस्य धावति ।
 रंहमाणा व्यश्व्ययं वारं वाजीवं सानसिः ४
 क्रत्वे दक्षाय नः कवे पर्वस्व सोम धारया ।
 इन्द्राय पातवे सुतो मित्राय वरुणाय च ५
 पर्वस्व वाजसातमः पवित्रे धारया सुतः ।
 इन्द्राय सोम विष्णावे देवेभ्यो मधुमत्तमः ६
 त्वां रिहन्ति मातरो हरिं पवित्रे अद्दुहः ।
 वृत्सं जातं न धेनवः पर्वमानु विधर्मणि ७
 पर्वमानु महि श्रवं श्चित्रेभिर्यासि रश्मिभिः ।
 शर्धन् तमासि जिघ्रसे विश्वानि दाशुषौ गृहे ८

त्वं द्यां च महिब्रत पृथिवीं चाति जग्धिषे ।
प्रति द्रापिममुञ्चथाः पर्वमान महित्वना ६

पञ्चमोऽध्यायः

। व० १-३३ ।

(१०१) एकोत्तरशततमं सूक्तम्

(१-१६) षोडशर्चस्यास्य सूक्तस्य (१-३) प्रथमादितृचस्य श्यावाश्विरन्धीगुः,
(४-६) चतुर्थ्यादितृचस्य नाहुषो ययाति, (७-९) सप्तम्यादितृचस्य राजर्षिर्मानवो
नहूषः, (१०-१२) दशम्यादितृचस्य सांवरणो मनुः, (१३-१६)
त्रयोदश्यादिचतुर्ऋचस्य च वैश्वामित्रो वाच्यो वा प्रजापतिर्ऋषयः । पवमानः सोमो
देवता । (१, ४-१६) प्रथमर्चश्चतुर्थ्यादित्रयोदशानाञ्चानुष्टुप्, (२-३)

द्वितीयातृतीययोश्च गायत्री छन्दसी

पुरोजिती वो अन्धसः सुताय मादयिब्रवे ।
अप श्वानं शनथिष्टन् सखायो दीर्घजिह्वयम् १
यो धारया पावकया परिप्रस्यन्दते सुतः । इन्दुरश्वो न कृत्व्यः २
तं दुरोषमभी नरः सोमं विश्वाच्या धिया । यज्ञं हिन्वन्त्यद्रिभिः ३
सुतासो मधुमत्तमाः सोमा इन्द्राय मन्दिनः ।
पवित्रवन्तो अक्षरन् देवान् गच्छन्तु वो मदाः ४
इन्दुरिन्द्राय पवत इति देवासौ अब्रुवन् ।
वाचस्पतिर्मखस्यते विश्वस्येशान् ओजसा ५
सहस्रधारः पवते समुद्रो वाचमीङ्खयः ।
सोमः पती रयीणां सखेन्द्रस्य दिवेदिवे ६
अयं पूषा रयिर्भगुः सोमः पुनानो अर्षति ।
पतिर्विश्वस्य भूमनो व्यख्यद्रोदसी उभे ७
समु प्रिया अनूषत गावो मदायु घृष्वयः ।
सोमासः कृणवते पथः पर्वमानास इन्दवः ८
य ओजिष्ठस्तमा भर पर्वमान श्रवाय्यम् ।
यः पञ्च चर्षणीरभि रयिं येन वनामहै ९
सोमाः पवन्त इन्दवो ऽस्मभ्यं गातुवित्तमाः ।
मित्राः सुवाना अरेपसः स्वाध्यः स्वर्विदः १०

सुष्वाणासो व्यद्रिभिश्चिताना गोरधि त्वचि ।
 इषमस्मभ्यमभितः समस्वरन् वसुविदः ११
 एते पूता विपश्चितः सोमासो दध्याशिरः ।
 सूर्यासो न दर्शतासौ जिगृत्वो ध्रुवा घृते १२
 प्र सुन्वानस्यान्धसो मर्तो न वृत तद्वचः ।
 अपश्चानमराधसं हता मुखं न भृगवः १३
 आ जामिरत्के अव्यत भुजे न पुत्र ओरयोः ।
 सरंज्जारो न योषणां वरो न योनिमासदम् १४
 स वीरो दक्षसाधनो वि यस्तस्तम्भ रोदसी ।
 हरिः पवित्रे अव्यत वेधा न योनिमासदम् १५
 अव्यो वारैभिः पवते सोमो गव्ये अधि त्वचि ।
 कर्निक्रदद्वेषा हरि रिन्द्रस्याभ्येति निष्कृतम् १६

(१०२) द्व्युत्तरशततमं सूक्तम्

(१-८) अष्टर्चस्यास्य सूक्तस्याप्तयस्त्रित ऋषिः । पवमानः सोमो देवता ।

उष्णिक छन्दः

क्राणा शिशुर्महीनां हिन्वन्नृतस्य दीधितिम् । विश्वा परि प्रिया भुवदधं द्विता
 १
 उप त्रितस्य पाष्योर्भक्त यद्गुहा पदम् । यज्ञस्य सप्त धामभिरधं प्रियम् २
 त्रीणि त्रितस्य धारया पृष्ठेष्वेरया रयिम् । मिमीते अस्य योजना वि सुक्रतुः
 ३
 जज्ञानं सप्त मातरौ वेधामशासत श्रिये । अयं ध्रुवो रयीणां चिकेत यत् ४
 अस्य वृते सजोषसो विश्वे देवासौ अद्गुहः । स्पार्हा भवन्ति रन्तयो जुषन्त
 यत् ५
 यमी गर्भमृतावृधौ दृशे चारुमजीजनन् । कविं मंहिष्ठमध्वरे पुरुस्पृहम् ६
 समीचीने अभि त्मना यही ऋतस्य मातरा । तन्वाना यज्ञमानुषगयदञ्जते ७
 क्रत्वा शुक्रेभिरक्षभि ऋणोरप वृजं दिवः । हिन्वन्नृतस्य दीधितिं प्राध्वरे ८

(१०३) त्र्युत्तरशततमं सूक्तम्

(१-६) षड्चस्यास्य सूक्तस्याप्तयस्त्रित ऋषिः । पवमानः सोमो देवता । उष्णिक

छन्दः

प्र पु॒नानाय॑ वे॒धसे॑ सोमा॒य व॒च उ॒द्यतम् । भृ॒तिं न भ॑रा म॒तिभिर्जु॑जौषते १
परि॑ वारा॒ण्यव्यया॑ गोभि॒रञ्जानो॑ अ॒र्षति । त्री॑ ष॒धस्था॑ पु॒नानः॑ कृ॒णुते॑ हरिः २
परि॑ को॒शं मधु॑श्रु॒तं म॒व्यये॑ वारै॑ अ॒र्षति । अ॒भि वा॒णीर्ऋ॒षीणां॑ स॒प्त नू॑षत ३
परि॑ शे॒ता म॑ती॒नां वि॒श्वदे॒वो अ॒दाभ्यः॑ । सोमः॑ पु॒नानश्च॑म्वो॒र्विश॑द्धरिः ४
परि॑ दै॒वीरनु॑ स्व॒धा इन्द्रै॑ण याहि॒ सर॒थम् । पु॒नानो॑ वा॒घद्वाघ॑द्भिर॒मर्त्यः॑ ५
परि॑ स॒मिर्न वा॑ज॒युर्दे॒वो दे॒वेभ्यः॑ सु॒तः । व्या॒न॒शिः प॑र्व॒मानो॒ वि धा॑वति ६
सप्तमोऽनुवाकः

। सू० १०४-११४ ।

(१०४) चतुरुत्तरशततमं सूक्तम्

(१-६) षडृचस्यास्य सूक्तस्य काण्वौ पर्वतनारदौ काश्यप्यौ शिखण्डिन्यावप्सरसौ
वा ऋषिके । पवमानः सोमो देवता । उष्णिक छन्दः

सखा॒य आ॑ नि षी॒दत पु॒नानाय॑ प्र गायत । शिशुं॑ न य॒ज्ञैः परि॑ भूषत श्रिये १
समी॑ व॒त्सं न मा॒तृभिः॑ सृ॒जता॑ गय॒साध॑नम् । दे॒वाव्यं॑ म॒दम॒भि द्वि॑शवसम्
२

पु॒नाता॑ द॒क्षसा॑ध॒नं यथा॑ श॒र्धाय॑ वी॒तयै॑ । यथा॑ मि॒त्राय॑ वरु॒णाय॑ श॒न्तमः॑ ३
अ॒स्मभ्य॑ त्वा वसु॒विद॑ म॒भि वा॒णीर॑नूषत । गोभि॑ष्टे॒ वर्ण॑म॒भि वा॑सयामसि
४

स नो॑ म॒दानां॑ प॒तु इन्द्रो॑ दे॒वप्स॑रा असि । सखै॑व॒ सख्यै॑ गा॒तुवित्त॑मो भव ५
सने॑मि कृ॒ध्यश्म॒दा र॒क्षसं॑ कं चि॒द॒त्रिण॑म् । अ॒पादे॑वं द्रु॒युम॑हो॒ युयो॑धि नः ६

(१०५) पञ्चोत्तरशततमं सूक्तम्

(१-६) षडृचस्यास्य सूक्तस्य काण्वौ पर्वतनारदावृषी । पवमानः सोमो देवता ।
उष्णिक छन्दः

तं वः॑ सखा॒यो म॑दा॒य पु॒नान॑म॒भि गाय॑त । शिशुं॑ न य॒ज्ञैः स्व॑दयन्त गूर्ति॒भिः
१
सं व॒त्स इ॑व मा॒तृभि॑ रि॒न्दुर्हि॑न्वा॒नो अ॑ज्यते । दे॒वावी॑र्मदो॒ म॒तिभिः॑ परि॑ष्कृतः
२

अ॒यं द॒क्षा॒य सा॑ध॒नो ऽयं॑ श॒र्धाय॑ वी॒तयै॑ । अ॒यं दे॒वेभ्यो॑ मधु॒मत्त॑मः सु॒तः ३

गोमन्न इन्द्रो अश्ववत् सुतः सुदक्ष धन्व । शुचिं ते वर्णमधि गोषु दीधरम् ४
 स नो हरीणां पतु इन्द्रो देवप्सरस्तमः । सखैव सख्ये नयो रुचे भव ५
 सनेमि त्वमस्मदाँ अदैवं कं चिदत्रिणम् । साहाँ इन्द्रो परि बाधो अप ह्ययुम्
 ६

(१०६) षडुत्तरशततमं सूक्तम्

(१-१४) चतुर्दशर्चस्यास्य सूक्तस्य (१-३, १०-१४) प्रथमादितृचस्य
 दशम्यादिपञ्चानाञ्च चान्नुषोऽग्निः, (४-६) चतुर्थ्यादितृचस्य मानवश्चक्षुः, (७-९)
 सप्तम्यादितृचस्य चाप्सवो मनुर्ऋषयः । पवमानः सोमो देवता । उष्णिक् छन्दः
 इन्द्रमच्छ सुता इमे वृषणं यन्तु हरयः । श्रुष्टी जातास इन्द्रवः स्वर्विदः १
 अयं भराय सानसि रिन्द्राय पवते सुतः । सोमो जैत्रस्य चेतति यथा विदे
 २
 अस्येदिन्द्रो मदेष्वा ग्राभं गृभ्णीत सानसिम् । वज्रं च वृषणं भरत्
 समप्सुजित् ३
 प्र धन्वा सोम जागृवि रिन्द्रायेन्द्रो परि स्रव । द्युमन्तं शुष्ममा भरा
 स्वर्विदम् ४
 इन्द्राय वृषणं मदं पवस्व विश्वदर्शतः । सहस्रयामा पथिकृद्विचक्षणः ५
 अस्मभ्यं गातुवित्तमो देवेभ्यो मधुमत्तमः । सहस्रं याहि पृथिभिः कनिक्रदत्
 ६
 पवस्व देववीतय इन्द्रो धाराभिरोजसा । आ कलशं मधुमान् त्सोम नः सदः
 ७
 तव द्रप्सा उदप्रुत् इन्द्रं मदाय वावृधुः । त्वां देवासो अमृताय कं पपुः ८
 आ नः सुतास इन्द्रवः पुनाना धावता रयिम् । वृष्टिद्यावो रीत्यापः स्वर्विदः
 ९
 सोमः पुनान ऊर्मिणा ऽव्यो वारं वि धावति । अग्रे वाचः पवमानः
 कनिक्रदत् १०
 धीभिर्हिन्वन्ति वाजिनं वने क्रीळन्तमत्यविम् । अभि त्रिपृष्ठं मतयः
 समस्वरन् ११
 असर्जि कलशाँ अभि मीळहे सप्तिर्न वाजयुः । पुनानो वाचं जनयन्नसिष्य-
 दत् १२

पवते हर्यतो हरि रति हरांसि रंध्या । अभ्यर्षन् तस्तोतृभ्यो वीरवृद्यशः १३
अया पवस्व देव्युर्मधोर्धारा असृक्षत । रेभन् पवित्रं पर्येषि विश्वतः १४

(१०७) सप्तोत्तरशततमं सूक्तम्

(१-२६) षड्विंशत्यृचस्यास्य सूक्तस्य बार्हस्पत्यो भरद्वाजः, मारीचः कश्यपः,
राहूगणो गोतमः, भौमोऽत्रिः, गाथिनो विश्वामित्रः, भार्गवो जमदग्निः,
मैत्रावरुणिर्वसिष्ठश्च सप्तर्षयः । पवमानः सोमो देवता । (१-२, ४-७, १०-१५,
१७-२६) प्रथमाद्वितीययोर्ऋचोश्चतुर्थ्यादिचतसृणां दशम्यादिषण्णां
सप्तदश्यादिदशानाञ्च प्रगाथः ((१, ४, ६, १०, १२, १४, १७, १९, २१, २३, २५)
प्रथमाचतुर्थाषष्ठीदशमीद्वादशीचतुर्दशीसप्तदशयेकोनविंशयेकविंशीत्रयोविंशीपञ्चविंशी
नां बृहती, (२, ५, ७, ११, १३, १५, १८, २०, २२, २४, २६)
द्वितीयापञ्चमीसप्तम्येकादशीत्रयोदशीपञ्चदश्याष्टादशीविंशीद्वाविंशीचतुर्विंशीषड्विंशी
नां सतोबृहती), (३) तृतीयाया भुरिग्विराड् द्विपदा (८-९) अष्टमीनवम्योर्बृहती,
(१६) षोडश्याश्च द्विपदा विराट् छन्दांसि

परीतो षिञ्चता सुतं सोमो य उत्तमं हविः ।
दधन्वाँ यो नर्यो अप्स्वश्न्तरा सुषाव सोममद्रिभिः १
नूनं पुनानोऽविभिः परि स्रवाऽदब्धः सुरभितरः ।
सुते चित् त्वाप्सु मंदांमो अन्धसा श्रीणन्तो गोभिरुत्तरम् २
परि सुवानश्चक्षसे देवमादनः क्रतुरिन्दुर्विचक्षणः ३
पुनानः सौम धारया ऽपो वसानो अर्षसि ।
आ रत्नधा योनिमृतस्य सीद स्युत्सो देव हिरण्ययः ४
दुहान ऊर्धर्दिव्यं मधु प्रियं प्रत्नं सधस्थमासदत् ।
आपृच्छयं धरुणं वाज्यर्षति नृभिर्धूतो विचक्षणः ५
पुनानः सौम जागृवि रव्यो वारे परि प्रियः ।
त्वं विप्रो अभवोऽङ्गिरस्तमो मध्वा यज्ञं मिमिक्ष नः ६
सोमो मीढ्वान् पवते गातुवित्तं ऋषिर्विप्रो विचक्षणः ।
त्वं कविरभवो देववीतम् आ सूर्यं रोहयो दिवि ७
सोम उ षुवाणः सोतृभिरधि ष्णुभिरवीनाम् ।
अश्वयेव हरिता याति धारया मन्द्रया याति धारया ८
अनूपे गोमान् गोभिरक्षाः सोमो दुग्धाभिरक्षाः ।
समुद्रं न संवरणान्यग्मन् मन्दी मदाय तोशते ९

आ सोम सुवानो अद्रिभिस्तिरो वाराण्यव्यया ।
 जनो न पुरि चम्बोर्विशद्धरिः सदो वनेषु दधिषे १०
 स मामृजे तिरो अणवानि मेष्यो मीळ्हे सप्तिर्न वाजयुः ।
 अनुमाद्यः पवमानो मनीषिभिः सोमो विप्रैभिर्ऋक्वभिः ११
 प्र सोम देववीतये सिन्धुर्न पिप्ये अर्णसा ।
 अंशोः पर्यसा मद्रो न जागृविरच्छा कोशं मधुश्चुतम् १२
 आ हर्यतो अर्जुने अत्के अव्यत प्रियः सूनुर्न मर्ज्यः ।
 तमीं हिन्वन्त्यपसो यथा रथं नदीष्वा गर्भस्त्योः १३
 अभि सोमांस आयवः पवन्ते मद्यं मदम् ।
 समुद्रस्याधि विष्टपि मनीषिणौ मत्सरासः स्वर्विदः १४
 तर्त्तु समुद्रं पवमान ऊर्मिणा राजा देव ऋतं बृहत् ।
 अर्षन्मित्रस्य वरुणस्य धर्मणा प्र हिन्वान ऋतं बृहत् १५
 नृभिर्येमानो हर्यतो विचक्षणो राजा देवः समुद्रियः १६
 इन्द्राय पवते मदः सोमो मरुत्वन्ते सुतः ।
 सहस्रधारो अत्यव्यमर्षति तमीं मृजन्त्यायवः १७
 पुनानश्चमू जनयन् मतिं कविः सोमो देवेषु रणयति ।
 अपो वसानः परि गोभिरुत्तरः सीदन् वनेष्वव्यत १८
 तवाहं सोम ररण सख्य इन्दो दिवेदिवे ।
 पुरुणि बभ्रो नि चरन्ति मामव परिधीरति तां इहि १९
 उताहं नक्तमुत सोम ते दिवा सख्याय बभ्र ऊर्धनि ।
 घृणा तपन्तमति सूर्यं परः शकुना इव पप्तिम २०
 मृज्यमानः सुहस्त्य समुद्रे वाचमिन्वसि ।
 रयिं पिशङ्गं बहुलं पुरुस्पृहं पवमानाभ्यर्षसि २१
 मृजानो वारे पवमानो अव्यये वृषाव चक्रदो वने ।
 देवानां सोम पवमान निष्कृतं गोभिरञ्जानो अर्षसि २२
 पवस्व वाजसातये ऽभि विश्वानि काव्या ।
 त्वं समुद्रं प्रथमो वि धारयो देवेभ्यः सोम मत्सरः २३
 स तू पवस्व परि पार्थिवं रजो दिव्या च सोम धर्मभिः ।
 त्वां विप्रांसो मतिभिर्विचक्षण शभ्रं हिन्वन्ति धीतिभिः २४
 पवमाना असृक्षत पवित्रमति धारया ।

मरुत्वन्तो मत्सरा इन्द्रिया हया मेधामभि प्रयासि च २५
अपो वसानः परि कोशमर्षतीन्दुर्हियानः सोतृभिः ।
जनयञ्ज्योर्तिर्मन्दना अवीवशद् गाः कृशवानो न निर्णिजम् २६

(१०८) अष्टोत्तरशततमं सूक्तम्

(१-१६) षोडशर्चस्यास्य सूक्तस्य (१-२) प्रथमाद्वितीययोर्ऋचोः शाक्त्यो
गौरिवीतिः, (३, १४-१६) तृतीयायाश्चतुर्दश्यादितृचस्य च वासिष्ठः शक्तिः, (४-
५) चतुर्थीपञ्चम्योराङ्गिरस ऊरुः, (६-७) षष्ठीसप्तम्योर्भारद्वाज ऋजिश्वा, (८-९)
अष्टमीनवम्योराङ्गिरस ऊर्ध्वसद्या, (१०-११) दशम्येकादशयोराङ्गिरसः कृतयशाः,
(१२-१३) द्वादशीत्रयोदशयोश्च राजर्षिऋणञ्चय ऋषयः । पवमानः सोमो देवता ।

काकुभः प्रगाथः (विषमर्चा ककुप्, समर्चा सतोबृहती), (१३) त्रयोदश्या
यवमध्या गायत्री छन्दः

पर्वस्व मधुमत्तम् इन्द्राय सोम क्रतुवित्तमो मदः ।
महि द्युत्तमो मदः १
यस्य ते पीत्वा वृषभो वृषायते ऽस्य पीता स्वर्विदः ।
स सुप्रकैतो अभ्यक्रमीदिषो ऽच्छा वाजं नैतशः २
त्वं ह्यश्ङ्ग दैव्या पवमानं जनिमानि द्युमत्तमः । अमृतत्वाय घोषयः ३
येना नवग्वो दध्यङ्ङपोर्णुते येन विप्रोस आपिरे ।
देवानां सुप्ते अमृतस्य चारुणो येन श्रवास्यानुशुः ४
एष स्य धारया सुतो ऽव्यो वारैभिः पवते मदिन्तमः । क्रीळन्नूर्मिरपामिव ५
य उस्त्रिया अप्या अन्तरश्मनो निर्गा अकृन्तदोजसा ।
अभि व्रजं तत्रिषे गव्यमश्वयं वर्मीव धृष्णावा रुज ६
आ सोता परि षिञ्चताऽश्वं न स्तोमममुरं रजस्तुरम् । वनक्रत्तमुदप्रुतम् ७
सहस्रधारं वृषभं पयोवृधं प्रियं देवाय जन्मने ।
ऋतेन य ऋतजातो विवावृधे राजा देव ऋतं बृहत् ८
अभि द्युम्नं बृहद्यश इषस्पते दिदीहि देव देवयुः । वि कोशं मध्यमं युव ९
आ वच्यस्व सुदत्त चम्बोः सुतो विशां वह्निर्न विश्पतिः ।
वृष्टिं दिवः पवस्व रीतिमुपां जिन्वा गविष्टये धियः १०
एतमु त्यं मदच्युतं सहस्रधारं वृषभं दिवो दुहुः । विश्वा वसूनि बिभ्रतम् ११
वृषा वि जज्ञे जनयन्नमर्त्यः प्रतपञ्ज्योर्तिषा तमः ।

स सुष्टुतः कृविभिर्निर्णिजं दधे त्रिधात्वस्य दंससा १२
स सुन्वे यो वसूनां यो रायामानेता य इळानाम् । सोमो यः सुक्षितीनाम्
१३

यस्य न इन्द्रः पिबाद्यस्य मरुतो यस्य वार्यमणा भगः ।
आ येन मित्रावरुणा करामह एन्द्रमवसे महे १४
इन्द्राय सोम पातवे नृभिर्यतः स्वायुधो मदिन्तमः । पवस्व मधुमत्तमः १५
इन्द्रस्य हार्दि सोमधानमा विश समुद्रमिव सिन्धवः ।
जुष्टो मित्राय वरुणाय वायवे दिवो विष्टम्भ उत्तमः १६

(१०६) नवोत्तरशततमं सूक्तम्

(१-२२) द्वाविंशत्यृचस्यास्य सूक्तस्यैश्वरयो धिष्ण्याग्रय ऋषयः । पवमानः सोमो
देवता । द्विपदा विराट् छन्दः

परि प्र धन्वेन्द्राय सोम स्वादुर्मित्राय पूष्णे भर्गाय १
इन्द्रस्ते सोम सुतस्य पेयाः क्रत्वे दक्षाय विश्वे च देवाः १ २
एवामृताय महे क्षयाय स शक्रो अर्ष दिव्यः पीयूषः ३
पवस्व सोम महान् त्समुद्रः पिता देवानां विश्वाभि धाम २ ४
शक्रः पवस्व देवेभ्यः सोम दिवे पृथिव्यै शं च प्रजायै ५
दिवो धर्तासि शक्रः पीयूषः सत्ये विधर्मन् वाजी पवस्व ३ ६
पवस्व सोम द्युम्नी सुधारो महामवीनामनु पूर्व्यः ७
नृभिर्येमानो जज्ञानः पूतः क्षरद्विश्वाणि मन्द्रः स्वर्वित् ४ ८
इन्दुः पुनानः प्रजामुराणः करद्विश्वाणि द्रविणानि नः ९
पवस्व सोम क्रत्वे दक्षायाऽश्वो न नित्तो वाजी धनाय ५ १०
तं तै सोतारो रसं मदाय पुनन्ति सोमं महे द्युम्नाय ११
शिशुं जज्ञानं हरिं मृजन्ति पवित्रे सोमं देवेभ्य इन्दुम् ६ १२
इन्दुः पविष्टं चारुर्मदायाऽपामुपस्थे कृविर्भर्गाय १३
बिभर्ति चार्विन्द्रस्य नाम येन विश्वानि वृत्रा जघान ७ १४
पिबन्त्यस्य विश्वे देवासो गोभिः श्रीतस्य नृभिः सुतस्य १५
प्र सुवानो अक्षाः सहस्रधारस्तिरः पवित्रं वि वारमव्यम् ८ १६
स वाज्यक्षाः सहस्रैरिता अद्भिर्मृजानो गोभिः श्रीणानः १७
प्र सोम याहीन्द्रस्य कुक्षा नृभिर्येमानो अद्भिः सुतः ९ १८

असर्जि वाजी त्रिः पवित्रमिन्द्राय सोमः सहस्रधारः १६
अञ्जन्त्यैनं मध्वो रसेनेन्द्राय वृष्ण इन्दुं मदाय १० २०
देवेभ्यस्त्वा वृथा पार्जसे ऽपो वसानं हरिं मृजन्ति २१
इन्दुरिन्द्राय तोशते नि तोशते श्रीणन्नुग्रो रिणन्नपः ११ २२

(११०) दशोत्तरशततमं सूक्तम्

(१२) द्वादशर्चस्यास्य सूक्तस्य त्रैवृष्णस्त्र्यरुणः पौरुकुत्स्यस्त्रसदस्युर्ऋषी ।
पवमानः सोमो देवता । (१-३) प्रथमादितृचस्य पिपीलिकमध्यानुष्टुप्, (४-६)
चतुर्थ्यादितृचद्वयस्योर्ध्वबृहती, (१०-१२) दशम्यादितृचस्य च विराट् छन्दांसि
पर्यु षु प्र धन्व वाजसातये परि वृत्राणि सक्षणिः ।
द्विषस्तरध्या ऋणया न ईयसे १
अनु हि त्वा सुतं सौम मदांसि महे समर्यराज्ये ।
वाजाँ अभि पवमान प्र गाहसे २
अजीजनो हि पवमान सूर्य विधारे शक्मना पर्यः ।
गोजीरया रंहमाणः पुरंध्या ३
अजीजनो अमृत मर्त्येष्वाँ ऋतस्य धर्मन्नमृतस्य चारुणः ।
सदासरो वाजमच्छा सनिष्यदत् ४
अभ्यभि हि श्रवसा ततर्दिथोत्सं न कं चिञ्जन्पानमक्षितम् ।
शर्याभिर्न भरमाणो गर्भस्त्योः ५
आदी के चित् पश्यमानास आप्यं वसुरुचो दिव्या अभ्यनूषत ।
वारं न देवः सविता व्यूरुते ६
त्वे सौम प्रथमा वृक्तबर्हिषो महे वाजाय श्रवसे धियं दधुः ।
स त्वं नो वीर वीर्याय चोदय ७
दिवः पीयूषं पूर्यं यदुक्थ्यं महो गाहादिव आ निरधुक्षत ।
इन्द्रमभि जायमानं समस्वरन् ८
अध यदिमे पवमान रोदसी इमा च विश्वा भुवनाभि म्ज्मना ।
यूथे न निःष्ठा वृषभो वि तिष्ठसे ९
सोमः पुनानो अव्यये वारे शिशर्न क्रीळन् पवमानो अक्षाः ।
सहस्रधारः शतवाज इन्दुः १०
एष पुनानो मधुमाँ ऋतावेन्द्रायेन्दुः पवते स्वादुरूर्मिः ।

वाजसनिर्वरिवोविद्वयोधाः ११
स पवस्व सहमानः पृतन्यून त्सेधन् रक्षांस्यप दुर्गहाणि ।
स्वायुधः सासहान् त्सौम शत्रून् १२

(१११) एकादशोत्तरशततमं सूक्तम्

(१-३) तृचस्यास्य सूक्तस्य पारुच्छेपिरनानत ऋषिः । पवमानः सोमो देवता ।

अत्यष्टिश्छन्दः

अया रुचा हरिण्या पुनानो विश्वा द्वेषांसि तरति स्वयुग्वभिः सूरौ न
स्वयुग्वभिः ।
धारा सुतस्य रोचते पुनानो अरुषो हरिः विश्वा यद्रूपा परियात्यृक्वभिः
सप्तास्यैभिर्ऋक्वभिः १
त्वं त्यत् पणीनां विदो वसु सं मातृभिर्मर्जयसि स्व आ दम ऋतस्य
धीतिभिर्दमै ।
प्रावतो न साम तद् यत्रा रणन्ति धीतर्यः । त्रिधातुभिररुषीभिर्वयो दधे
रोचमानो वयो दधे २
पूर्वामनु प्रदिशं याति चेकितत् सं रश्मिभिर्यतते दर्शतो रथो । दैव्यो दर्शतो
रथः ।
अग्मन्नुक्थानि पौंस्येन्द्रं जैत्राय हर्षयन् । वज्रश्च यद्भवथो अनपच्युता
समत्स्वनपच्युता ३

(११२) द्वादशोत्तरशततमं सूक्तम्

(१-४) चतुर्ऋचस्यास्य सूक्तस्याङ्गिरसः शिशुर्ऋषिः । पवमानः सोमो देवता ।

पङ्क्तिश्छन्दः

नानानं वा उ नो धियो वि वृतानि जनानाम् ।
तक्षा रिष्टं रूतं भिषग् ब्रह्मा सुन्वन्तमिच्छतीन्द्रायेन्द्रो परि स्रव १
जरतीभिरोषधीभिः पर्णेभिः शकुनानाम् ।
कारारो अश्मभिर्द्युभिर्हिरण्यवन्तमिच्छतीन्द्रायेन्द्रो परि स्रव २
कारूरहं ततो भिषगुपलप्रक्षिणी नना ।
नानाधियो वसूयवो ऽनु गा इव तस्थिमेन्द्रायेन्द्रो परि स्रव ३
अश्वो वोळ्हा सुखं रथं हसनामुपमन्त्रिणः ।

शेपो रोमणवन्तौ भेदौ वारिन्मण्डूक इच्छतीन्द्रायेन्दो परि स्रव ४

(११३) त्रयोदशोत्तरशततमं सूक्तम्

(१-११) एकादशर्चस्यास्य सूक्तस्य मारीचः कश्यप ऋषिः । पवमानः सोमो देवता । पङ्क्तिश्छन्दः

शर्यणावति सोममिन्द्रः पिबतु वृत्रहा ।

बलं दधान आत्मनि करिष्यन् वीर्यं महदिन्द्रायेन्दो परि स्रव १

आ पवस्व दिशां पत आर्जीकात् सोम मीढ्वः ।

ऋतवाकेन सत्येन श्रद्धया तपसा सुत इन्द्रायेन्दो परि स्रव २

पर्जन्यवृद्धं महिषं तं सूर्यस्य दुहिताभरत् ।

तं गन्धर्वाः प्रत्यगृभ्णन् तं सोमे रसमादधुरिन्द्रायेन्दो परि स्रव ३

ऋतं वदन्नृतद्युम्न सत्यं वदन् त्सत्यकर्मन् ।

श्रद्धां वदन् त्सोम राजन् धात्रा सोम परिष्कृत इन्द्रायेन्दो परि स्रव ४

सत्यमुग्रस्य बृहतः सं स्रवन्ति संस्रवाः ।

सं यन्ति रसिनो रसाः पुनानो ब्रह्मणा हर इन्द्रायेन्दो परि स्रव ५

यत्र ब्रह्मा पवमान छन्दस्यांश्च वाचं वदन् ।

ग्राव्णा सोमै महीयते सोमै नानन्दं जनयन्निन्द्रायेन्दो परि स्रव ६

यत्र ज्योतिरजस्रं यस्मिन् लोके स्वर्हितम् ।

तस्मिन् मां धैहि पवमानाऽमृतै लोके अक्षित इन्द्रायेन्दो परि स्रव ७

यत्र राजा वैवस्वतो यत्रावरोर्धनं दिवः ।

यत्रामूर्यहतीरापस्तत्र माममृतं कृधीन्द्रायेन्दो परि स्रव ८

यत्रानुकामं चरणं त्रिनाके त्रिदिवे दिवः ।

लोका यत्र ज्योतिष्मन्तस्तत्र माममृतं कृधीन्द्रायेन्दो परि स्रव ९

यत्र कामा निकामाश्च यत्र ब्रध्नस्य विष्टपम् ।

स्वधा च यत्र तृप्तिश्च तत्र माममृतं कृधीन्द्रायेन्दो परि स्रव १०

यत्रानन्दाश्च मोदाश्च मुदः प्रमुद आसते ।

कामस्य यत्राप्ताः कामास्तत्र माममृतं कृधीन्द्रायेन्दो परि स्रव ११

(११४) चतुर्दशोत्तरशततमं सूक्तम्

(१-४) चतुर्ऋचस्यास्य सूक्तस्य मारीचः कश्यप ऋषिः । पवमानः सोमो देवता ।

पङ्क्तिश्लोकः

य इन्द्रोः पर्वमानस्याऽनु धामान्यक्रमीत् ।
 तर्माहुः सुप्रजा इति यस्तै सोमाविधन्मनु इन्द्रायेन्द्रो परि स्रव १
 ऋषे मनत्रकृतां स्तोमैः कश्यपोद्वर्धयन् गिरः ।
 सोमं नमस्य राजानं यो जज्ञे वीरुधां पतिरिन्द्रायेन्द्रो परि स्रव २
 सप्त दिशो नानासूर्याः सप्त होतार ऋत्विजः ।
 देवा आदित्या ये सप्त तेभिः सोमाभि रक्ष नु इन्द्रायेन्द्रो परि स्रव ३
 यत् तै राजञ्छृतं हविस्तेन सोमाभि रक्ष नः ।
 अरातीवा मा नस्तारीन्मो च नुः किं चनाममुदिन्द्रायेन्द्रो परि स्रव ४

इति नवमं मण्डलं समाप्तम्

मन्त्रसंख्या

अष्टममण्डलस्यान्तपर्यन्तं ७६६०

नवममण्डलस्य ११०८

सर्वयोगः ८७६८